

Asomafo No Nnwuma

Asafo No Mfiase

¹ M'adamfo pa Teofilo, me nhoma a edi kan a mekyerεw wo no mu no, mekaa Yesu nnwuma a ɔyεε ne ne nkyerεkyerε ² kosi bere a Onyankopɔn befaa no kɔɔ ɔsoro no ho asεm. Ansa na wɔrebεfa no akɔ ɔsoro no, ɔnam Honhom Kronkron tumi so kyerεkyerεε n'asuafo no. ³ Ne wusɔre akyi no, ɔtenaa asase so adaduanan, yii ne ho adi mpɛn pii kyerεε n'asuafo no de kyerεε wɔn se, ampa, ɔte ase. ɔkaa Onyankopɔn ahenni ho asεm nso kyerεε wɔn. ⁴ Da bi a ɔne wɔn redidi no ɔhyεε wɔn se, **“Mummfi Yerusalem, na montwεn** akyεde a m'Agya ahyε mo ho bɔ a maka ho asεm akyerε mo no. ⁵ **Yohane de,** ɔde nsu na εbɔɔ asu, nanso mo de εrenkyε, wɔde Honhom Kronkron no beɔɔ mo asu.”

Yesu Sorokɔ

⁶ Asuafo no nyinaa ne Yesu hyiaa mu no, wobisaa no se, “Awurade, bere yi mu na wode ahenni no beba Israel ana?”

⁷ Yesu buaa wɔn se, **“Eho nhia sε** mubehu bere a Agya no nam ne tumi so ahyehyε ato hɔ no. ⁸ **Na sε** Honhom Kronkron no ba mo so a, mubenya tumi na moayε me nnansefo wɔ Yerusalem ne Yudea nyinaa ne Samaria de kosi asase ano.”

⁹ ɔkasa wiee no asuafo no huu no sε ɔnam omununkum mu rekɔ ɔsoro na wɔanhu no bio.

¹⁰ Wogu so rehwe wim no, amono mu hɔ ara mmarima baanu bi a wɔhyehyε ntade fitafitaa begyinaa wɔn nkyεn, ¹¹ kae se, “Mo mmarima a mufi Galilea, adεn nti na mugyina ha rehwe wim? Yesu a wɔafa no afi mo nkyεn

kɔ ɔsoro no, sɛnea osi kɔɔ ɔsoro no, saa ara na ɔbɛsan aba.”

Woyi Matia sɛ Yuda Nanmusin

¹² Eyi akyi no, asuafo no fii Ngo Bepɔw no so baa Yerusalem. Efi Ngo Bepɔw no so ba Yerusalem no bɛyɛ kilomita baako ne fa. ¹³ Woduu hɔ no, wɔkɔɔ ɔdan bi a na ɛwɔ aban a na wɔte so mu. Nnipa a na wɔwɔ hɔ no ne:

Petro, Yohane, Yakobo ne Andrea;
Filipo, Toma,
Bartolomeo, Mateo,
Alfeo ba Yakobo, Simon Seloteni ne Yakobo ba Yuda.

¹⁴ Na saa asuafo yi nyinaa taa ne mmea bi te sɛ Yesu ne na Maria ne Yesu nuabarimanom hyia bɔ mpae.

¹⁵ Nna kakraa bi akyi no gyidifo no a wɔn dodow bɛyɛ sɛ ɔha aduonu no hyiae na Petro sɔre kasae se: ¹⁶ Me nuanom, ɛsɛ sɛ nkɔm a Honhom Kronkron no nam Dawid so hyɛ faa Yuda ho sɛ ɛnam ne so na wɔbɛkyere Yesu no ba mu. ¹⁷ Yɛn a Yesu yii yɛn no, na Yuda nso ka yɛn ho wɔ ɔsom no mu.

¹⁸ (Sika a Yuda nya fii ade bɔne a ɔyɛe no mu no, wɔde tɔɔ asase wɔ faako a owui hɔ. ɔtew bɛhwee fam ma ne mu pae maa ne nsono tu guu so. ¹⁹ Nnipa a na wɔte Yerusalem nyinaa tee saa asɛm no, wɔtoo asase no din wɔ wɔn ankasa kasa mu se Hekeldama a nkyerɛase ne, Mogya Asase.)

²⁰ Petro toaa so kae se, “Wɔakyerɛw wɔ Dawid nhoma mu se,

“Ne fi nyɛ amamfo,
na ɔfoforo nsi n’anan mu.’

²¹ Enti ɛsɛ sɛ yeyi nnipa a yɛne wɔn nantew bere a na Yesu ne yɛn di akɔneaba no nyinaa, ²² fi Yohane asubɔ adwuma no so de kosi bere a wɔfaa Yesu fii yɛn nkyɛn

kɔɔ ɔsoro no, efise eɛ se saa nnipa no mu baako beka yeɛ ho ne yeɛ di Yesu wusɔre no ho adanse.”

²³ Woyii nnipa baanu. ɔbaako din de Yosef a na wɔfrɛ no Barsaba,* na wɔtaa frɛ no Yusto nso. Nea na ɔka ho no nso din de Matia. ²⁴ Afei asuafo no bɔɔ mpae se, “Awurade, wunim obiara koma mu. Eno nti kyerɛ yeɛ nnipa baanu yi mu nea woayi no ²⁵ se ommesi Yuda a wanya ne baabi kɔ no anan mu mmɛyɛ asomafodwuma no.” ²⁶ Afei asuafo no bɔɔ wɔn so ntonto maa esii Matia. Enti wɔfaa no kaa asomafo dubaako no ho.

2

Pentekoste Da

¹ Pentekoste da* no duu no, na asuafo no nyinaa ahyia† wɔ faako.‡ ² Amono mu hɔ ara, nne bi te se ahum a ɛretu fi ɔsoro ba behyɛɛ ofi a na wɔwɔ mu no ma. ³ Ogya a ɛredɛw a ɛte se tɛkrɛma basisii wɔn so mmaako mmaako. ⁴ Honhom Kronkron no hyɛɛ wɔn nyinaa ma, na wɔkaa kasa foforo, sɛnea Honhom no maa wɔn ho kwan no.

⁵ Saa bere no na Yudafo bi a wɔfrɛ Nyame fi mmeaem-meaɛ aba Yerusalem. ⁶ Wɔtee nea ɛrekɔ so no, wɔbɔɔ twi behyiae, na ɛyɛɛ wɔn nwonwa ne ahodwiriw, efise obiara tee se wɔreka ne kurom kasa. ⁷ Enti wobisae se, “Na saa nnipa yi a wɔrekasa yi nyɛ Galileafo ana?”

* 1:23 Ase ne “Homeda babarima.” Saa din yi ye Yudafo Kristofo adikanfo baanu bi din. Wɔn mu baako ne Yosef. Nea ɔto so abien ne Yuda a na ɔye odiyifo wɔ Yerusalem. ɔne Sila na wɔsomaɛ wɔn kɔɔ Antiokia. (15.22,32). * 2:1 Twam Afahyɛ homeda no akyi nnaɛfa aduonum (3 Mose 23.15-16). † 2:1 Asuafo dodow a nea asi dedaw nti yeɛka wɔn ho aɛm ne dubaako no (ne Matia) nanso dodow yi na wɔbɔ wɔn din nyinaa 1.13-15. ‡ 2:1 ɛnyɛ abansoro dan a wɔte mu no (1.13) na mmom hyiadan no ho baabi. Efise bere biara a wɔabue hyiadan no, na asuafo no wɔ hɔ.

⁸ Na adɛn nti na yɛtɛ sɛ wɔrɛka Onyankopɔn anwon-wadwuma ho asɛm wɔ yɛn a yɛyɛ ⁹ Partifo, Mediafo ne Elamfo, ne wɔn a wɔtɛ Mesopotamia ne Yudea ne Kapadokia, Ponto, Asia, ¹⁰ Frigia ne Pamfilia, Misraim ne Libia fa a ɛbɛn Kirene ne ahɔho a wofi Roma, Yudafo ne wɔn a wɔasakra aba Yudasom mu, ¹¹ ne Kretafo ne Arabfo mu biara kasa mu yi?” ¹² Wɔde ahodwiriw bisae se, “Eyi ase ne dɛn?”

¹³ Afoforo nso dii wɔn ho fɛw se, “Saa nnipa yi abobow nsa.”

Petro Kasa Kyerɛ Dɔm No

¹⁴ Petro ne asomafo dubaako no sɔre gyinaa hɔ na ɔkasaa denneennen kyɛrɛɛ nnipa no se, “Me nuanom Yudafo ne mo a mote Yerusalem nyinaa, muntie asɛm a mereka yi. ¹⁵ Saa nnipa yi mmow nsa sɛnea mususuw no, efisɛ ade nnya nkyee a ɛsɛ sɛ obi nom nsa bow. ¹⁶ Asɛm a asi yi na odiyifo Yoel hyɛɛ ho nkɔm se:

¹⁷ “Onyankopɔn kae se, nna a edi akyiri no,
mehwie me Honhom no agu nnipa nyinaa so.

Mo mmabarima ne mo mmabea bɛhyɛ nkɔm,
mo mmerante nso ahu anisoade.
Na mo mpanyin nso asoso adae.

¹⁸ Saa mmere no mu no,
mehwie me Honhom agu m’asomfo mpo so,
mmarima ne mmea, ama wɔahyɛ nkɔm.

¹⁹ Mede mogya ne ogya ne wusiw kumɔnn
bɛyɛ anwonwade ne nsɛnkyɛrɛnne
wɔ ɔsoro ne asase so.

²⁰ Ansa na Awurade da kɛse no bɛba no,
owia beduru sum
na ɔsram nso ayɛ sɛ mogya.

²¹ Na obiara a ɔbɛbɔ
Awurade din no benya nkwa.’

²² “Israelfo, muntie! Yesu Nasareni no yε ɔbarima bi a ne dwuma kronkron a obedii no daa adi wɔ tumi ne anwonwade ne nsɛnkyerɛnne a Onyankopɔn nam ne so yεe a mo ankasa di ho adanse no mu. ²³ Onyankopɔn ankasa fi ne pε ne ne nhumu mu sii gyinae yii Yesu maa mo, na mode no maa nnebɔneyεfo ma wɔbɔɔ no asennua mu kum no. ²⁴ Nanso Onyankopɔn nyan no fii owu mu ma oyii no fii owuyaw mu, efisε owu antumi anni ne so.”

²⁵ Asɛm a Dawid ka faa ne ho ne sε,
 “Mihu Awurade wɔ m’ani so daa nyinaa.

Esiane sε ɔwɔ me nsa nifa nti,
 merenhinhim da.

²⁶ Eno nti me kra ani gye, na me tεkrɛma di ahurusi.
 Me nipadua nso bεhome asomdwoe mu.

²⁷ Efisε worennyaw me awufo mu.

Na woremma wo Kronkronni no mporɔw.

²⁸ Woakyerε me nkwaye kwan;
 na wobεma m’ani agye wɔ w’anim.

²⁹ “Anuanom, εsε sε meda m’adwene adi pefee wɔ yɛn panyin Dawid ho. Owui na wosiee no, na ne nna da so wɔ hɔ besi nnε. ³⁰ Na ɔyε odiyifo a onim bɔ bi a Onyankopɔn ahyε no no. Onyankopɔn hyεε bɔ se ɔbɛyε Dawid asefo no mu baako ɔhene, sɛnea Dawid yε ɔhene no ara pε. ³¹ Dawid huu nea Onyankopɔn rebɛyε no ɔkasa faa owusɔre a εfa Agyenkwa no ho se, ‘Wɔannyaw no awufo mu. Ne honam nso amporɔw.’ ³² Onyankopɔn anyan saa Yesu yi afi owu mu, na yɛn nyinaa yε saa asɛm yi ho nnansefo. ³³ Wɔahyε no anuonyam de no akɔtena Onyankopɔn nifa so ma ne nsa aka Honhom Kronkron no a Agya no hyεε no ho bɔ no; Eno na wahwie agu yɛn so, na εho nsɛnkyerɛnne na muhu na mote yi. ³⁴ Dawid ankasa de, wankɔ ɔsoro, na mmom ɔkae se,
 “‘Awurade ka kyereε me wura se,

“Tena me nsa nifa so ha,

³⁵ kosi sɛ mede w'atamfo
bɛyɛ w'anana ntiaso.”

³⁶ “Ɛsɛ sɛ nnipa a wɔwɔ Israel nyinaa hu sɛ, mo na mobɔɔ saa Yesu yi a Onyankopɔn ayɛ no Awurade ne Agyenkwa no asennua mu.”

³⁷ Bere a nnipa no tee saa asɛm yi, ɛhaw wɔn yiye. Enti wobisaa Petro ne asomafo a wɔaka no se, “Anuanom, dɛn na yɛnyɛ?”

³⁸ Petro ka kyerɛɛ wɔn se, “Monsakra mo adwene na momma wɔmmɔ mo asu wɔ Yesu Kristo din mu sɛnea ɛbɛyɛ a wɔde mo bɔne bɛkyɛ mo na moanya Onyankopɔn akyɛde a ɛyɛ Honhom Kronkron no. ³⁹Onyankopɔn hyɛɛ Honhom Kronkron yi ho bɔ maa mo ne mo mma ne wɔn a wɔtete akwirikyiri ne wɔn a Awurade, yɛn Nyankopɔn bɛfrɛ wɔn aba ne nkyɛn no nyinaa.”

⁴⁰ Petro kaa nsɛm bebree kyerɛɛ wɔn se, “Munnye mo ho mfi asotwe a ɛreba saa nnebɔneyɛfo yi so no mu.”

⁴¹ Wɔn mu dodow no ara gyee asɛm no di ma wɔbɔɔ wɔn asu. Saa da no, nnipa bɛyɛ mpensa na wɔbɛkaa agyidifo no ho.

Asafo No Asetena

⁴² Daa na wɔde wɔn adagyew nyinaa sua asomafo no nkyerɛkyerɛ. Wɔne wɔn nyaa ayɔnkofa, hyia didi bɔɔ mu ne wɔn bɔɔ mpae. ⁴³ Asomafo no yɛɛ anwonwade

ahorow bebree ma obiara a ohuu no ho dwiriw no. ⁴⁴ Gyidifo no nyinaa kɔɔ so tenaa ase sɛ nnipa koro, na wɔkyekyɛɛ wɔn ahode mu memaa wɔn ho wɔn ho.

⁴⁵ Wɔtɔn wɔn ahode kyekyɛɛ sika a wonya fii mu no maa wɔn ho wɔn ho sɛnea ɛho hia obiara. ⁴⁶ Daa na wɔbɔ mu hyia wɔ asɔredan mu de anigye ne koma pa bɔ mu didi wɔ wɔn afi mu. Wɔkamfoo Onyankopɔn, nyaa anuonyam wɔ

nnipa anim. ⁴⁷ Da biara na Awurade de wɔn a ogye wɔn nkwa no beka wɔn ho.

3

Obubuafo Bi Ayaresa

¹ Da bi Petro ne Yohane kɔɔ asɔredan mu awia nnɔnabiɛsa a na eyɛ bere a wɔde bɔ mpae. ² Wɔreyɛ adu asɔredan pon a wɔfrɛ no ɔpon Fɛfɛ ano no, wohuu obubuafo bi sɛ ɔda hɔ. Na wɔsoa saa obubuafo yi de no beɛto ɔpon yi ano da biara ma ɔsrɛsrɛ sika fi wɔn a wɔrekɔ asɔredan no mu no nkyɛn. ³ Bere a ohuu sɛ Petro ne Yohane rekɔ mu no, ɔsrɛɛ wɔn se wɔmma no biribi. ⁴ Wɔhwɛɛ n'anim dinn na Petro ka kyerɛɛ no se, "Hwɛ yɛn!" ⁵ ɔhwɛɛ wɔn susuw sɛ wɔbɛma no biribi.

⁶ Nanso Petro ka kyerɛɛ no se, "Sika de, minni bi; na nea mewɔ a mede bɛma wo ne sɛ Yesu Kristo Nasareni din mu, sɔre nantew!" ⁷ Afei Petro de ne nsa nifa soo no mu maa no so gyinaa hɔ. Prɛko pɛ, n'anan mu yɛɛ den. ⁸ Ohuruw gyinaa n'anan so na ofii ase nantewee. Afei ɔne wɔn nyinaa kɔɔ asɔredan no mu a ɔrehuruhuruw, rekamfo Onyankopɔn. ⁹ Nnipa no nyinaa huu no sɛ ɔnam reyi Onyankopɔn ayɛ. ¹⁰ Wohuu no no, wohuu sɛ ɔno ne ɔsrɛsrɛni a na ɔda asɔredan pon a wɔfrɛ no ɔpon Fɛfɛ no ano no, wɔn ho dwiriw wɔn.

Petro Kasa Kyerɛ Nnipa No

¹¹ Bere a nnipa no huu sɛ ɔbarima no ne Petro ne Yohane nam no, wɔn ho dwiriw wɔn; enti wotuu mmirika kɔɔ wɔn nkyɛn wɔ baabi a wɔfrɛ no Salomo Abrannaa no so hɔ. ¹² Bere a Petro huu nnipadɔm no, ɔka kyerɛɛ wɔn se, "Israelfo, adɛn na eyi yɛ mo nwonwa? Adɛn nti na mohwɛ yɛn, susuw sɛ yɛnam yɛn tumi anaa yɛn som pa so na asa ɔbarima yi yare?" ¹³ Abraham, Isak ne Yakob Nyankopɔn ne yɛn nenanom Nyankopɔn ama ne somfo

Yesu ɔsoro anuonyam. Mode no maa atumfo; na bere a Pilato yɛɛ sɛ obegyaa no no mpo, mopoo no wɔ n'anim. ¹⁴ Na ɔyɛ Kronkron, ɔtɛɛ; nanso mopoo no na mosrɛɛ Pilato sɛ ɔmfa odwotwafo mma mo. ¹⁵ Enti mukum obi a ogye nnipa kɔ nkwa mu. Nanso Onyankopɔn nyan no fii awufo mu na yɛyɛ eyi ho nnansefo. ¹⁶ Tumi a ɛwɔ ne din mu no na ɛmaa saa obubuafo yi nyaa ahoɔden. Gyidi a yɛwɔ wɔ ne din mu no na ɛma yetumi yɛɛ saa anwonwade a muhu yi. Gyidi a yɛwɔ wɔ Yesu din mu no na ama ne ho atɔ no a ogyina mo anim mprensɛn yi.

¹⁷ “Afei me nuanom, minim sɛ nea mo ne mo mpanyimfo yɛɛ Yesu no, na onim na munnim. ¹⁸ Tete no, Onyankopɔn nam n'adiyifo so kae se Agyenkwa no behu amane. Na ɔnam saa kwan yi so ma ɛbaa mu. ¹⁹ Monsakra mo adwene na momfa mo ho mma Onyankopɔn na wɔbɛpɛpa mo bɔne, na moanya foforoyɛ mmere afi Awurade ho, ²⁰ na wasoma Yesu a ɔyɛ Agyenkwa a wɔayi no ama mo no. ²¹ Sɛnea Onyankopɔn nam n'adiyifo akronkron so aka dedaw no, ɛsɛ sɛ ɔtena ɔsoro kosi sɛ nneɛma nyinaa bɛyɛ foforo. ²² Na Mose kae se, ‘Awurade, mo Nyankopɔn bɛsoma odiyifo aba mo nkyɛn sɛnea ɔsoma me a mifi mo mu no. ɛsɛ sɛ mutie aɛm biara a ɔbɛka akyerɛ mo. ²³ Obiara a wantie nea odiyifo no bɛka no, wobeyi no afi Onyankopɔn nkurɔfo ho na wɔasɛɛ no.’

²⁴ “Samuel ne adiyifo a akryiri no wɔbae no nyinaa nso aka aɛm a asi nnɛ yi ho aɛm pɛn. ²⁵ Onyankopɔn bɔ a ɔnam adiyifo so hyɛɛ no yɛ mo dea. Saa ara nso na mowɔ kyɛfa wɔ apam a Onyankopɔn ne mo agyanom pam no mu. Sɛnea ɔka kyerɛɛ Abraham se, ‘W’asefo so na menam behyira wiasefo nyinaa.’ ²⁶ Enti Onyankopɔn dii kan yii ne somfo somaa no baa mo nkyɛn sɛ ɔmmɛdom mo na mo nyinaa nnan mfi mo akwammɔne no so.”

4

Petro Ne Yohane Gyina Asennii

¹ Bere a Petro ne Yohane gu so rekasa akyerε nkurɔfo no, asɔfo ne ɔpanyin a ɔhwε awεmfo a wɔhwε asɔredan no so no ne Sadukifo baa wɔn nkyɛn. ² Wɔn bo fuw yiye, efisε na saa asomafo yi rekyerεkyerε nnipa no sε Yesu asɔre afi owu mu a εkyerε sε awufo tumi nyan ba nkwa mu. ³ Wɔkyeree asomafo no, nanso esiane sε na ade asa nti, wɔde wɔn guu afiase kosii adekyee. ⁴ Nanso nnipa a wɔtee aSEM no mu dodow no ara bεyε sε mpem anum gyee aSEM no dii.

⁵ Ade kyee no, Yudafo mpanyin, mpanyimfo ne KyerεwSEM no akyerεkyerεfo hyiaa wɔ Yerusalem. ⁶ Wohyiaa ɔsɔfopanyin Anas ne Kaiafa ne Yohane ne Aleksandro ne afoforo a wofi ɔsɔfopanyin no abusua mu. ⁷ Wɔma wɔde asomafo baanu yi baa wɔn anim bisaa wɔn se, “Tumi bɛn anaa hena din na mode yεε eyi?”

⁸ Petro a Honhom Kronkron ahyε no ma no buae se, “ɔman mpanyimfo ne atitiriw. ⁹ Sε nnε mugyina ha bisa yɛn ade pa a yεyε maa obubuafo no maa ne ho tɔɔ no no a, ¹⁰ εno de εsε sε mo ne Israelfo nyinaa hu sε saa onipa a ogyina ha yi, εnam Yesu Kristo a ofi Nasaret a mobɔɔ no asennua mu na Onyankopɔn nyan no fii awufo mu no tumi mu na ne ho ayε no den.” ¹¹ Yesu ne onipa a KyerεwSEM ka fa ne ho se, “‘ɔbo a mo adansifo poe no na abεyε tweatibo.’

¹² ɔno nko ara mu na nkwagye wɔ; efisε din biara nni wiase ha a nnipa nam so benya nkwagye.”

¹³ εyεε agyinatufo no ahodwiriw sε Petro ne Yohane a wonsuaa nhoma da na wɔyε nnipa teta no tumi kasaa akokoduru so saa. Wohuu sε saa asomafo yi ne Yesu

nantewee. ¹⁴ Nnipa no antumi anka aSEM biara bio, efise wohuu SE ɔbarima a na ne ho atɔ no no ne Petro ne Yohane gyina hɔ. ¹⁵ Wɔma wofii asennii hɔ ma wodwinnwen aSEM no ho. ¹⁶ Wobisabisaa wɔn ho wɔn ho se, “Dɛn na yɛnyɛ saa nnipa yi? Obiara a ɔwɔ Yerusalem ha ate se saa nnipa yi ayɛ anwonwade a yɛrentumi ntwaha ho nkontompo. ¹⁷ Sɛnea ɛbɛyɛ a saa nnipa yi remma saa aSEM yi ntrɛw nkɔ afoforo nkyɛn no, momma yɛmfɛ wɔn, mmɔ wɔn kɔkɔ, sɛnea ɛbɛyɛ a wɔremmɔ Yesu din nkyɛɛ obiara bio.”

¹⁸ Wɔfrɛɛ asomafo baanu yi bae, hyɛɛ wɔn se wonni ho kwan biara se wɔbɔ Yesu Kristo din anaa wɔkyerɛkyerɛ wɔ ne din mu. ¹⁹ Petro ne Yohane buaa wɔn se, “Sɛ yeбетie Onyankopɔn anaa yeбетie mo no, emu nea ɛwɔ he na eye? Mo ara mummua mfa. ²⁰ Nea yɛahu ne nea yɛate de, yɛrentumi nnyae ho aɛnka.”

²¹ Agyinatufɔ no bɔɔ wɔn kɔkɔ bio gyaa wɔn, efise wɔannya biribiara annyina so antwe wɔn aso; afei nso na nnipa no nyinaa rekamfo Onyankopɔn wɔ aSEM a asi no ho. ²² Na ɔbarima a wɔnam anwonwakwan so saa no yare no adi boro mfe aduanan.

Agyidifo No Mpaebɔ

²³ Wogyaa Petro ne Yohane pɛ na wɔkɔɔ agyidifo a wɔaka no nkyɛn kɔkaa nea asɔfo mpanyin ne mpanyimfo no kae no kyerɛɛ wɔn. ²⁴ Bere a wɔtee saa aSEM no, wɔn nyinaa bɔɔ mu bɔɔ mpae se, “Owura, ɔbɔade a wobɔɔ ɔsoro, asase ne po ne biribiara a ɛwɔ mu, ²⁵ wonam Honhom Kronkron so nam yɛn nena Dawid a ɔyɛ w’akoa no so ma ɔkae se,

“Adɛn nti na amanaman no hyehyɛ bɔne ho,

na nnipa no bɔ pɔw hunu yi?

²⁶ Asase so ahemfo sɔre gyina

na atumfo bɔ mu tu agyina

tia Awurade
ne Agyenkwa no.

²⁷ Ampa ara Herode ne Pontio Pilato ne amanamanmufo ne Israelfo hyiaa wɔ kurow kɛse yi mu sɔre tiaa Yesu a ɔyɛ ɔsomfo Kronkron a woatew ne ho no. ²⁸ Wohyia yɛɛ biribiara a wonam wo tumi ne wo pɛ so ahyɛ ato hɔ sɛ ɛbɛba mu no. ²⁹ Afei Awurade, hwɛ ahunahuna a wɔrehunahuna yɛn yi na ma yɛn a yɛyɛ w'asomfo yi mfa akokoduru nka w'asɛm yi. ³⁰ Ma wo nsa so fa sa nyarewa, na fa wo somfo Kronkron Yesu Kristo din so yɛ nsɛnkyerɛnne ne anwonwade.”

³¹ Wɔbɔɔ mpae wiewe no, faako a wohyiaa hɔ wosowee. Honhom Kronkron bɛhyɛɛ wɔn nyinaa ma ma na wofii ase de akokoduru kaa Onyankopɔn asɛm.

Agyidifo No Asetena

³² Agyidifo no nyinaa tenaa ase sɛ nnipa koro. Wɔn mu bi anka se n'ankasa ahode bi yɛ ɔno nko ara de; biribiara a wɔwɔ no, wɔn nyinaa kyekyɛɛ mu pɛ fae. ³³ Asomafo no nam tumi a emu yɛ den so dii Awurade Yesu wusɔre no ho adanse na Onyankopɔn hyiraa wɔn nyinaa. ³⁴ Biribiara ho anhia obiara a ɔfra kuw no mu, efisɛ wɔn a na wɔwɔ nsase ne afi no tontɔnee, de sika a wonya fii mu no ³⁵ brɛɛ asomafo no ma wɔkyekyɛɛ sɛnea ɛho hia obiara.

³⁶ Yosef a na ɔyɛ Lewini a ofi Kipro a na asomafo no frɛ no Barnaba, a ne nkyerɛase ne “Nkuranhyɛ Ba” no, ³⁷ tɔn n'asase de sika a onyae no brɛɛ asomafo no.

5

Anania Ne Safira

¹ ɔbarima bi a wɔfrɛ no Anania ne ne yere Safira kɔtɔn wɔn agyapade bi. ² ɔne ne yere yi yɛɛ adwene de sika a wonyae no bi siei, na wɔde nkae no brɛɛ asomafo no.

³ Petro bisaa no se, “Anania, adɛn nti na woama ɔbonsam ho kwan ama wabɛhyɛ wo mu na woadi atoro akyerɛ Honhom Kronkron no na wode sika a wunyaa no bi asie? ⁴ Ansa na worebɛtɔn agyapade no na ɛnyɛ w’ankasa wo de; wotɔn wiee no nso sika a wunyaɛ no, na ɛnyɛ wo de; na adɛn nti na woyɛɛ w’adwene sɛ wobɛyɛ nea woayɛ yi? ɛnyɛ nnipa na woadi atoro akyerɛ wɔn, na mmom woadi atoro akyerɛ Onyankopɔn.”

⁵ Anania tee saa asɛm yi ara pɛ, otwa hwee fam wui; na ehɔ kaa obiara a ɔtee saa asɛm no. ⁶ Wɔn mu mmerante no ba bɛkyekyeree amu no fii adi kosiee no.

⁷ ɛbɛyɛ nnɔnhwerew abiɛsa akyi no, ne yere a na onnim asɛm a asi no baa hɔ. ⁸ Petro bisaa no se, “Wo ne wo kunu, motɔn mo asase no, sika a munyae nyinaa ara ni? Ka kyerɛ me.”

Obuaa se, “Yiw ne nyinaa ne no.”

⁹ Petro ka kyerɛɛ no se, “Adɛn nti na wo ne wo kunu penee so sɛ mobɛsɔ Onyankopɔn Honhom ahwɛ? Hwɛ! Nnipa a wokosiee wo kunu no gyina ɔpon yi akyi, na saa ara na wo nso, wɔbɛsoa wo akosie wo.”

¹⁰ Amono mu hɔ ara, otwa hwee Petro anim wui. Mmerante no behuu sɛ wawu no, wɔsoaa no kosiee no wɔ ne kunu nkyɛn. ¹¹ Ehu kɛse bɔɔ asafa no nyinaa ne nnipa a wɔtee saa asɛm no.

Asomafo No Sa Nyarewa

¹² Na asomafo no taa hyia wɔ asɔredan no fa baabi a wɔfrɛ no “Salomo Abrannaa” so hɔ. Sɛ wohyia wɔ hɔ saa a, wɔyɛ anwonwade ahorow pii. ¹³ ɛwɔ mu sɛ na nnipa a wɔnka wɔn ho no di wɔn ho adanse pa de, nanso wɔn mu biara antumi amfa wɔn ho ankɔbɔ asomafo no ho. ¹⁴ Akyiri no, nnipa dodow a wogyee Awurade dii no bɛkaa agyidifo no ho. ¹⁵ Esiane anwonwade a na asomafo no reyɛ no nti, wɔsoaa ayarefo baa mmɔnten so de wɔn totoo mpa ne akɛtɛ so sɛnea ɛbɛyɛ a Petro sunsuma

βετω̄ w̄on mu bi so keke. ¹⁶ Nkurɔfo a wofifi nkurow a atwa Yerusalem ho ahyia no de w̄on ayarefo ne w̄on a ahonhommɔne w̄o w̄on mu no ba ma w̄osaa w̄on nyinaa yare.

W̄otaa Asomafo No

¹⁷ Ɔsɔfopanyin ne ne d̄om ne Sadukifo no ani beree asomafo no so yiye enti w̄oyee adwene se w̄obetwe w̄on aso. ¹⁸ Eno nti, w̄okyeree asomafo no de w̄on koguu afiase. ¹⁹ Da no ara anadwo, Awurade b̄ofo behiee afiase apon no dii asomafo no anim ka kyeree w̄on se, ²⁰ “Monkɔ asɔredan mu nkɔka nkwa foforo yi ho asem nkyere nnipa no.”

²¹ Asomafo no dii asem a ɔbɔfo no ka kyeree w̄on no so; enti anɔpahema no w̄akɔɔ asɔredan mu hɔ kofii ase kyerekyeree.

Ɔsɔfopanyin no ne ne d̄om no frɛe Yudafo mpanyin ma w̄oyee nhyiamu keese bi; afei w̄osoma ma w̄akɔɔ afiase hɔ se w̄onkɔfa asomafo no mmra w̄on anim. ²² Nanso, bere a nnipa no duu afiase hɔ no, w̄anhu asomafo no; enti w̄osan ba bebɔɔ w̄on amannee se, ²³ “Bere a yeduu afiase hɔ no, yehuu se w̄atoto afiase apon no nyinaa mu petee a awɛmfo no gynyagyna ano. Nanso yebuebee apon no, ye anhu obiara w̄o mu.” ²⁴ Bere a ɔpanyin a ɔhwe asɔredan mu awɛmfo no so ne asɔfo mpanyin no tee saa asem no, w̄on adwene mu yee w̄on naa, efise na wonhu asem a asi.

²⁵ Ankye koraa na ɔbarima bi baa hɔ beka kyeree w̄on se, “Nnipa a mode w̄on guu afiase no gynyagyna asɔredan no mu rekyerekyere nnipa no.” ²⁶ Awɛmfo no so panyin no tee asem no, ɔne ne nkurɔfo no kokyeree asomafo no de w̄on bae. Awɛmfo no so panyin no ne awɛmfo no amfa asomafo no amma ɔhye so, efise na wonim se, se w̄oye saa a, nnipa no besiw w̄on abo.

²⁷ Wɔde asomafo no begyinaa agyinatufu no anim ma ɔsofopanyin no ka kyerɛɛ wɔn se, ²⁸ “Yɛhyɛɛ mo sɛ monnkyerɛkyerɛ wɔ Yesu din mu, nanso moantie. Mode mo nkyerɛkyerɛ yi afa Yerusalem baabiara, na moɛ sɛ mokyɛ sɛ, yɛn na yekum saa ɔbarima no!”

²⁹ Petro ne asomafo a wɔka ne ho no buaa wɔn se, “ɛsɛ sɛ yetie Onyankopɔn na ɛnyɛ nnipa, ³⁰ efisɛ mobɔɔ Yesu asennua mu, kum no no, yɛn agyanom Nyankopɔn nyan no fii owu mu. ³¹ Onyankopɔn hyɛɛ no anuonyam de no tenaa ne nsa nifa so sɛ ɔhene ne Agyenkwa a ɛnam no so bɛma Israelfo asakra wɔn adwene na wɔde wɔn bɔne akyɛ wɔn. ³² Yɛne Honhom Kronkron a ɛyɛ akyɛde a Awurade de ma wɔn a wotie no no di eyi ho adanse.”

³³ Agyinatufu no tee asɛm no, wɔn bo fuwii, na wɔkae se wobekum asomafo no. ³⁴ Nanso wɔn mu baako a wɔfrɛ no Gamaliel a ɔyɛ Farisini na ɔsan yɛ Kyerɛwɛsɛm no kyerɛkyerɛfo a na nnipa bu no no sɔre gyina hyɛɛ sɛ wɔmfa asomafo no mfi adi. ³⁵ Afei, ɔkasa kyerɛɛ agyinatufu no se, “Me nuanom Israel mmarima, munnwen nea moɛ sɛ moyɛ saa nnipa yi ho yiye. ³⁶ ɛnkyɛɛ biara na ɔbarima bi a wɔfrɛ no Teuda sɔre kaa se ɔyɛ onipa titiriw bi maa nnipa bɛyɛ ahannan tu dii n’akyi. Nanso wokum no maa n’akyidifo no nyinaa bɔɔ ahwete. ³⁷ N’akyi na Yuda a ofi Galilea nso sɔree nnipakan bere no mu. ɔno nso nnipa pii dii n’akyi. Saa ara na ɔno nso wokum no maa n’akyidifo no bɔɔ ahwete. ³⁸ ɛno nti mitu mo fo se, munnyaa saa nnipa yi ma wɔnkɔ wɔn baabi. Sɛ wɔn nkyerɛkyerɛ ne wɔn nnwuma yi fi onipa a, ebegu. ³⁹ Nanso sɛ efi Onyankopɔn a, morentumi nsiw wɔn kwan. Mubehu sɛ moreko atia Onyankopɔn.”

⁴⁰ Agyinatufu no tie Gamaliel afotu no. Wɔma wɔde

asomafo no ba ma wɔbɔɔ wɔn mmaa* hyɛɛ wɔn sɛ wɔmmɔ Yesu din mfa nkyerɛkyerɛ bio. Afei wogyaa wɔn.

⁴¹ Esiane sɛ asomafo no huu sɛ ɛyɛ Onyankopɔn pɛ sɛ ɛsɛ sɛ wohu amane wɔ Yesu din mu no nti, wɔde anigye na efii asennii hɔ. ⁴² Wɔannyae Yesu Kristo ho asɛmpa no ka ne nkyerɛkyerɛ wɔ hyiadan ne afi mu da.

6

Woyi Asafo No Mu Asomfo

¹ Bere bi akyi a na asuafo no redɔɔso no, akasakasa sii Hebrifo a wɔka Arameike ne Hebrifo a wɔka Hela kasa no ntam. Na Hebrifo a wɔka Hela no asɛm ne sɛ, Hebrifo a wɔka Arameike no nhwɛ wɔn akunafo yiye. ² Enti asomafo dumien no frɛɛ asuafo no nyinaa ka kyerɛɛ wɔn se, “ɛnsɛ sɛ yegyae Onyankopɔn asɛnka kɔkyɛ aduan. ³ Enti anuanom, munyi mo mu nnipa baason a Honhom Kronkron ahyɛ wɔn ma na wonim nyansa na wɔahwɛ aka saa asɛm no. ⁴ Yɛn ankasa de, yɛde yɛn adagyew nyinaa bɛbɔ mpae aka Asɛmpa no.”

⁵ Nnipa no nyinaa penee adwene a asomafo no de bae no so. Enti, woyii Stefano a na gyidi ne Honhom Kronkron ahyɛ no ma no, ne Filipino, Prokoro, Nikanor, Timon, Pamina ne Nikolao a ofi Antiokia a na anka ɔwɔ Yudasom mu no. ⁶ Wɔde saa nnipa yi kyerɛɛ asuafo no ma wɔbɔɔ mpae de wɔn nsa guu wɔn so.

⁷ Nnipa pii gyee asɛm no di maa wɔn mu dodow no ara bɛkaa wɔn ho. Yudafo no mu pii nso gyee wɔn nkyerɛkyerɛ no dii.

Wɔkyere Stefano

* 5:40 Yudafo asotwe a ɛyɛ mmaabɔ aduanan a wɔayi so baako na wɔde hwee wɔn (2 Ko 11.24).

⁸ Stefano a Onyankopɔn adom ne tumi ahyɛ no ma no yɛɛ anwonwade ahorow bebree wɔ asafɔ no mu. ⁹ Nanso da koro bi, nnipa bi a wofi Yudafo hyiadan bi a wɔfrɛ no “Ahofadifo Hyiadan” no mu a wɔyɛ Yudafo a wofi Kirene ne Aleksandria ne wɔn a wofi Kilikia ne Asia no ne Stefano gyee akyinnye. ¹⁰ Nanso Honhom no maa Stefano nyansa ma ɔde kasae a obiara antumi anka hwee.

¹¹ Eno nti wɔka hyɛɛ nkurɔfo bi ano se, “Yɛtee sɛ ɔreka abususem atia Mose ne Onyankopɔn.”

¹² Wɔnam saa ɔkwan yi so maa nnipa no ne mpanyin no ne Kyerɛwsem no akyerɛkyerɛfo no sɔre tiaa Stefano. Wɔbɛkyeree Stefano de no kɔɔ baguafo anim. ¹³ Afei, wɔde nnipa ba bedii adansekurum tiaa Stefano se, “Saa onipa yi ka abususem tia yɛn asɔredan kronkron no ne Mose Mmara no daa. ¹⁴ Yɛtee mpo sɛ ɔreka se, saa Yesu Nasareni no bedwiriw yɛn asɔredan no agu na wasesa yɛn amanne a Mose de gyaw yɛn no!”

¹⁵ Nnipa a na wɔte bagua mu hɔ no nyinaa hwɛɛ Stefano anim, na wohuu sɛ n’anim ayɛ te sɛ ɔsoro ɔbɔfo anim.

7

Stefano Yi Ne Ho Ano

¹ Ɔsɔfopanyin no bisaa Stefano se, “Nsɛm a wɔaka agu wo so no nyinaa yɛ nokware ana?”

² Stefano buae se, “Anuanom ne agyanom, muntie me! Ansa na yɛn agya Abraham rebefi Mesopotamia akɔtena Haran no, Onyankopɔn daa n’anuonyam adi kyerɛɛ no, ³ ka kyerɛɛ no se, ‘Fi w’abusuafo nkyɛn ne w’asase so kɔ baabi a mɛkyerɛ wo no.’

⁴ “Enti ofii Kaldea asase so kɔtenaa Haran. Abraham agya wu akyi no Onyankopɔn ma ɔbɛtenaa asase a mote so mprenpren yi so. ⁵ Onyankopɔn amfa asase no fa baabiara ankyɛ Abraham sɛ n’ankasa de. Nanso

Onyankopɔn hyɛɛ no bɔ sɛ ɛbɛyɛ ɔne n’asefo nyinaa dea. Bere a Onyankopɔn hyɛɛ Abraham bɔ yi na onni mma. ⁶ Onyankopɔn ka kyerɛɛ Abraham se, ‘W’asefo bɛtena ananafo asase so ayɛ nkoa wɔ hɔ na wɔayɛ wɔn ayayade mfe ahannan. ⁷ Na mɛtwe ɔman a wɔbɛsom wɔn no aso; na ɛno akyi wobefi saa ɔman no mu abɛsom me wɔ ha.’ ⁸ Onyankopɔn ne Abraham yɛɛ apam na wɔde twetiatwa yɛɛ apam no ho nsɛnkyerɛnne. Eyi nti wɔwoo Isak nnaawɔtwe akyi na wotwaa no twetia; Isak nso twaa Yakob twetia, saa ara na Yakob twitwaa agyanom mpanyin dumien no nso twetia.

⁹ “Agyanom mpanyin no ani beree Yosef enti wɔtɔn no ma ɔkɔyɛɛ akɔa wɔ Misraim. Nanso esiane sɛ na Onyankopɔn wɔ n’afa nti ¹⁰ oyii no fii ne haw nyinaa mu. ɔmaa Yosef nyansa na Misraimhene Farao pɛɛ n’asɛm. Eyi maa Farao yɛɛ Yosef ɔman no so amrado ne ahemfi hɔ nyinaa sohwɛfo.

¹¹ “Saa bere no mu na ɔkɔm kɛse ne ahohia sii Misraim ne Kanaan asase nyinaa so a na yɛn agyanom nnya aduan mpo nni. ¹² Enti bere a Yakob tee sɛ aduan wɔ Misraim no, ɔsɔmaa ne mma a wɔyɛ yɛn agyanom ma wɔkɔɔ hɔ nea edi kan. ¹³ Wɔkɔɔ ne mprenu so no, Yosef daa ne ho adi kyerɛɛ ne nuanom, na ɛnam so ma Farao huu Yosef abusuafo. ¹⁴ Yosef kraa n’agya Yakob se ɔne n’abusuafo nyinaa mmra Misraim. Na wɔn nyinaa dodow yɛ aduɔson anum. ¹⁵ Afei, Yakob kɔtenaa Misraim na ɛhɔ na ɔne yɛn agyanom nyinaa wuwui. ¹⁶ Wɔde wɔn amu no kɔɔ Sekem kosiee wɔn wɔ Abraham asiei bi a ɔtɔ fii Hamor abusua mu no hɔ.

¹⁷ “Bɔ a Onyankopɔn hyɛɛ Abraham no bere redu no, na yɛn nkurɔfo a wɔwɔ Misraim no ase atrɛw. ¹⁸ Akyiri no, ɔhene foforo bi bedii ade wɔ Misraim a na onnim Yosef ho asɛm. ¹⁹ Saa ɔhene yi de atirimɔden dii yɛn

agyanom so, hyɛɛ wɔn ma wɔtotow wɔn mma gui sɛnea ɛbɛyɛ a wobewuwu.

²⁰ “Saa bere yi mu na wɔwoo Mose a na okura Onyankopɔn anuonyam no. Wɔhwɛɛ no wɔ n’agya fi asram abiɛsa, ²¹ na woyii no fii hɔ no, Farao babea kɔfaa no de no baa ne fi hwɛɛ no sɛ n’ankasa ne ba. ²² Wɔtetew no wɔ Misraimfo nimdeɛ mu ma ɔyɛɛ den wɔ ɔkasa ne nneyɛɛ mu.

²³ “Mose dii mfe aduanan no, ɔyɛɛ n’adwene sɛ ɔrekɔsra ne nuanom Israelfo. ²⁴ Oduu hɔ no ohuu sɛ Misraimni bi resisi ne nuanom mu baako bi. Mose kɔboaa ne nua no ma Mose kum Misraimni no. ²⁵ Mose susuw sɛ n’ankasa nkurɔfo behu sɛ Onyankopɔn nam ne so bɛma wɔade wɔn ho nanso wɔante ase. ²⁶ Ade kyee no, ohuu sɛ Israelfo baanu bi reko enti ɔkɔɔ hɔ sɛ ɔrekɔpata. Obisaa wɔn se, ‘Adɛn nti na moatwa mo ho reko? Munnim sɛ moyɛ anuanom ana?’

²⁷ “Nea ɔresisi ne yɔnko no sum Mose bisaa no se, ‘Hena na ɔyɛɛ wo yɛn so panyin ne otemmufo? ²⁸ Wopɛ sɛ wukum me sɛnea nnɛra wukum Misraimni no ana?’ ²⁹ Mose tee saa no, otu fii Misraim kɔtenaa Midian asase so. ɛhɔ na ɔwoo mmabarima baanu.

³⁰ “Mfe aduanan akyi no, ɔbɔfo nam wura bi gyafraama mu yii ne ho adi kyerɛɛ Mose wɔ sare bi a ɛbɛn bepɔw Sinai no so. ³¹ Nea Mose huu no maa ne ho dwiriw no enti otwiw bɛn ho pɛɛ sɛ ɔhwɛ no yiye. ɔtee Awurade nne se, ³² ‘Mene wo agyanom Abraham, Isak ne Yakob Nyankopɔn.’ Ehu kaa Mose nti wantumi anhwɛ.

³³ “Awurade ka kyerɛɛ Mose se, ‘Worɔw wo mpaboa, efise faako a wugyina no yɛ asase kronkron. ³⁴ Mahwɛ na mahu atirimɔden a wɔde yɛ me manfo a wɔwɔ Misraim no. Mate apini a wɔresi no nyinaa na maba sɛ merebegye wɔn. Yɛ ntɛm na mensoma wo nkɔ Misraim.’

³⁵ “Saa Mose yi ne obi a Israelfo poo no bere a wobisaa no se, ‘Hena na ɔyɛɛ wo yɛn so panyin ne otemmufo no?’

Ɔno na Onyankopɔn nam ɔbɔfo a oyii ne ho adi kyerɛɛ no wɔ nwura a Erehyew no gyaframa mu no, yɛɛ no ɔpanyin ne ogyefo. ³⁶ Ɔno na ɔnam anwonwade ne nsɛnkyerɛnne so yii Israelfo fii Misraim de wɔn twaa Po Kɔkɔɔ no, dii wɔn anim wɔ sare so mfe aduanan no.

³⁷ “Mose yi ara na ɔka kyerɛɛ Israelfo se, sɛnea Onyankopɔn somaa me no, saa ara na obeyi odiyifo a ɔte sɛ me afi mo mu aba mo nkyɛn. ³⁸ Ɔno ne obi a ɔne Israelfo yɛɛ nhyiamu wɔ sare no so hɔ; ɔne yɛn agyanom ne ɔbɔfo a ɔkasa kyerɛɛ wɔn wɔ Sinai Bepɔw no so no. Ne nsa kaa Onyankopɔn aɛm a nkwa wɔ mu no de brɛɛ yɛn.

³⁹ “Nanso yɛn agyanom antie no. Wɔpoo no pɛɛ sɛ wɔsan kɔ Misraim asase so bio. ⁴⁰ Enti wɔka kyerɛɛ Aaron se, ‘Yɛ ahoni bi a wobedi yɛn anim ma yɛn, efise yennim aɛm a ato saa Mose a oyii yɛn fii Misraim asase so no!’ ⁴¹ Wɔyɛɛ nantwi ba sɛso honi bi bɔɔ afɔre maa no, gyee wɔn ani sɛnea ɛsɛ. ⁴² Onyankopɔn twee ne ho fii wɔn ho ma wɔsom ɔsoro nsoromma sɛnea wɔakyerɛw wɔ adiyifo nhoma mu se,

“‘Israelfo, ɛnyɛ me na mode afɔrebɔde ne ayɛyɛde brɛɛ me mfe aduanan wɔ sare so ana?

⁴³ Mode mo ho nyinaa ato Molek nyame,
ne mo honi Rɛfan so;
wɔyɛ ahoni a moayɛ sɛ mobɛsom wɔn.

Saa nti mɛpam mo akogu Babilonia akyi.’

⁴⁴ “Saa bere no na ntamadan a edi adanse sɛ Onyankopɔn ka ne manfo ho no ka yɛn agyanom ho wɔ sare so hɔ. Mose sii ntamadan yi sɛnea Onyankopɔn kyerɛɛ no sɛ onsi no no ara pɛ. ⁴⁵ Akyiri no, yɛn agyanom a Yosua dii wɔn anim no de ntamadan no baa asase a Onyankopɔn pam so nnipa de maa wɔn no so. Esii hɔ ara kosii Dawid bere so. ⁴⁶ Onyankopɔn hyiraa Dawid

enti obisaa Onyankopɔn se ɔmma onsi asɔredan mma Yakob Nyankopɔn. ⁴⁷ Nanso Salomo na osii dan no maa Onyankopɔn.

⁴⁸ “Nanso ɔsorosoro Nyankopɔn nte ɔdan a nnipa asi mu, sɛnea odiyifo no ka se,

⁴⁹ “‘Ɔsoro yɛ m’ahengua,
Awurade na ose.

Na asase yɛ m’anan ntiaso.

Ɔdan bɛn na wubesi ama me?
Na m’ahomegyebea wɔ he?

⁵⁰ ɛnyɛ m’ankasa na meyyɛ eyinom nyinaa?”

⁵¹ “Mo asoɔdenfo, mo a mo koma apirim na muntie Onyankopɔn asɛm. Mote sɛ mo agyanom pɛpɛpɛ. Mo nso daa musiw Honhom Kronkron no ho kwan. ⁵² Odiyifo bi wɔ hɔ a mo agyanom antaa no ana? Wokum Onyankopɔn asomafo a wodii kan bɔɔ ɔtreneeni a ɔbɛba no ho dawuru. Saa ara nso na moapa no, akum no. ⁵³ Mo ara ne nnipa a monam abɔfo so nyaa Onyankopɔn mmara no, nanso moanni so.”

Wosiw Stefano Abo

⁵⁴ Agyinatufɔ no tee asɛm a Stefano kae no, wɔn bo fuw yiye. ⁵⁵ Nanso Stefano a Honhom Kronkron ahyɛ no ma no maa n’ani so hwɛɛ ɔsoro huu Onyankopɔn anuonyam ne Yesu Kristo sɛ ogyina Onyankopɔn nsa nifa so. ⁵⁶ Stefano kae se, “Mihu sɛ ɔsoro abue na Onipa Ba no gyina Onyankopɔn nsa nifa so!”

⁵⁷ Wɔtɛtɛtɛɛ mu de wɔn nsa sisiw wɔn aso. Afei wɔn nyinaa bɔɔ twi kɔtow hyɛɛ no so, ⁵⁸ twee no kɔɔ kurotia kosiw no abo. Wɔn a wosiw no abo no yiyii wɔn ntama de maa aberante bi a wɔfrɛ no Saulo sɛ ɔnhwɛ so.

⁵⁹ Wɔresiw Stefano abo no nyinaa na ɔrebɔ mpae se, “Awurade Yesu, wo nsam na mede me honhom hyɛ!”

⁶⁰ Afei obuu nkotodwe teEE mu dennen se, “Awurade, fa wɔn bɔne kyE wɔn.” Ɔkaa saa no, owui.

8

Wɔtaa Akyidifo No Ma Wɔbɔ Ahwete

¹ Saulo penee kum a wokum Stefano no so. Saa da no ara, wɔtaa agyidifo a wɔwɔ Yerusalem no maa wɔn nyinaa bɔɔ ahwete kɔɔ Yudea ne Samaria nsase so ma ekaa asomafo no nko ara. ² Onyamesurofo bi kɔfaa Stefano kosiee no. Wosuu no yiye. ³ Esiane sE na Saulo pE sE ogu asafo no nti ɔkɔɔ afi mu kɔkyekyeree agyidifo mmарima ne mmea de wɔn guu afiase.

Filipo Ka AsEmpa No Wɔ Samaria

⁴ Agyidifo a na wɔabɔ ahwete no kaa asEmpa no wɔ baabiara a wɔkɔe. ⁵ Filipo kɔɔ Samaria kurow bi mu kɔkaa Agyenkwa no ho asEm kyereE nnipa a na wɔwɔ hɔ no. ⁶ Bere a nnipakuw no tee asEm a Filipo reka na wohuu anwonwade a ɔyeE no, wɔn nyinaa tiee no. ⁷ Ahonhommɔne de nteeteEmu fii nnipa bebreE mu. Saa ara na mmubuafo ne mpakye nso sɔre nantewee. ⁸ Eyi nti anigye baa Samaria.

Simon Nkonyaayifo No

⁹ Na ɔbarima bi te saa kurow yi mu a wɔfrE no Simon a ɔyeE nkonyaayifo a esiane ne nkonyaayi no nti Samariafo pii gye no di. Na ɔyeE obi a ɔhoahoa ne ho sE odi mu. ¹⁰ Eyi maa nnipa a wɔwɔ kurow no mu no nyinaa gyeE no too mu kae se, “Saa onipa yi ne Onyankopɔn tumi a wɔfrE no Ɔkese no.” ¹¹ Esiane ne nkonyaa a na oyi no nti, emaa nnipa no nyinaa tu dii n’akyi. ¹² Bere a saa nnipa yi gyeE asEmpa a Filipo ka faa Onyankopɔn ahenni ne Yesu Kristo din no ho dii no, wɔbɔɔ mmарima ne mmea nyinaa asu. ¹³ Simon nso gye dii ma wɔbɔɔ no asu. Baabiara a Filipo

kɔe no, Simon dii n'akyi. Anwonwade a ohuu no maa ne ho dwiriw no.

¹⁴ Bere a asomafo a wɔwɔ Yerusalem no tee sɛ Samari-afɔ agye Onyankopɔn asɛm no adi no, wɔsoma Petro ne Yohane kɔɔ wɔn nkyɛn. ¹⁵ Woduu hɔ no, wɔbɔɔ mpae maa agyidifo no sɛnea ebeyɛ a Honhom Kronkron bɛba wɔn so, ¹⁶ efisɛ saa bere no na asu kɛkɛ na wɔnam Awurade Yesu din so abɔ. Na Honhom Kronkron nnya mmaa wɔn so ɛ. ¹⁷ Afei Petro ne Yohane de wɔn nsa guguu wɔn so maa Honhom Kronkron baa wɔn so.

¹⁸ Simon huu sɛ asomafo no nsa a wɔde guguu wɔn so no na ɛma wonyaa Honhom Kronkron no, ɔmaa Petro ne Yohane sika srɛɛ sɛ, ¹⁹ “Momma me saa tumi yi bi na obiara a mede me nsa begu no so no anya Honhom Kronkron no bi.”

²⁰ Petro ka kyerɛɛ no se, “Nnome nka wo ne wo sika nyinaa, efisɛ wususuw sɛ wubetumi de sika atɔ Onyankopɔn akyɛde no. ²¹ Wunni kyɛfa biara wɔ yɛn dwumadi yi mu, efisɛ wo koma mu nte wɔ Onyankopɔn anim. ²² Sakra w'adwene fi wo bɔne yi ho na bɔ mpae srɛ Onyankopɔn sɛ ɔmfɔ wo bɔne nkyɛ wo. ²³ Mihu sɛ anibere bɔne ahyɛ wo koma mu ama bɔne afa wo nnommum.”

²⁴ Simon srɛɛ Petro ne Yohane se, “Mommɔ mpae mma me na saa nnome yi mu biara amma me so.”

²⁵ Ansa na Petro ne Yohane redu Yerusalem no, wɔkaa asɛmpa no wɔ Samaria nkuraa bebree ase.

Filipo Ne Etiopiani No

²⁶ Awurade bɔfo ka kyerɛɛ Filipo se, “Sɔre siesie wo ho kɔ anafo kwan a efi Yerusalem kɔ Gasa no so.”

²⁷ Bere a Filipo rekɔ no, ohyiaa Etiopiani piamni bi a ɔyɛ Etiopiahemnea Kandake dabeni* . Na saa onipa yi

* 8:27 Dabeni: Obi a ɔhwɛ ɔhene anaa ɔhemnea nnabea ne n'ahode so.

akɔ asɔre wɔ Yerusalem, ²⁸ a na ɔte ne teaseɛnam mu resan akɔ fie. Na ɔrekenkan Odiyifo Yesaia nhoma no. ²⁹ Honhom Kronkron ka kyerɛɛ Filipino se, “Twiw bɛn no.”

³⁰ Filipino yɛɛ ntɛm kɔɔ teaseɛnam no ho na ɔtee sɛ ɔrekenkan Odiyifo Yesaia nhoma no, obisaa se, “Wote nea worekenkan yi ase ana?”

³¹ Piamni no buaa no se, “Mɛyɛ dɛn na mate ase? Gye sɛ obi kyerɛ me ase.” Afei ɔka kyerɛɛ Filipino se ɔmforo mmɛtena ne nkyɛn wɔ ne teaseɛnam no mu.

³² Na piamni no rekenkan saa Kyerɛwsem yi: “ɔte sɛ oguamma a wɔrekokum no.

Sɛnea oguamma yɛ kumm wɔ ne nwitwitwafo anim no,

saa ara na wammue n’ano.

³³ N’aninguase mu, wannya odimafo.

Na hena na ɔbɛka n’asefo ho asem?

Efisɛ woyii no fii asase yi so.”

³⁴ Piamni no bisaa Filipino se, “Odiyifo no reka n’ankasa ho asem anaa obi foforo ho asem?” ³⁵ Filipino nam saa asem no so kaa nsɛmpa a ɛfa Yesu ho no kyerɛɛ no.

³⁶ Wɔrekɔ no woduu asu bi ho. Piamni no ka kyerɛɛ Filipino se, “Nsu ni. Dɛn na esiw wo kwan sɛ wobɔ me asu?”

³⁷ Filipino ka kyerɛ no se, “Sɛ wufi wo koma mu gye di a, mɛbɔ wo asu.” Piamni no buaa no se, “Migye di. Migye di sɛ Yesu Kristo yɛ Onyankopɔn Ba.” ³⁸ Piamni no hyɛ maa teaseɛnam no gyinae. ɔne Filipino kɔɔ asu no ho ma ɔbɔɔ no asu. ³⁹ Wofi nsu no mu no, Onyankopɔn Honhom hwim Filipino fii piamni no nkyɛn kɔe. Wanhu Filipino bio de,

nanso ɔde anigye toaa n’akwantu no so. ⁴⁰ Filipino kopuee Asoto kɔɔ so kaa asempana no wɔ nkurow no mu kosii sɛ okoduu Kaesarea.

¹ Saa bere no na Saulo ani abere se ɔbetɔre Kristo akyidifo no ase. ² Ɔkɔɔ Ɔsɔfɔpanyin no nkyɛn kogyee adansedi krataa a ebɛma no tumi ama wakɔ hyiadan mu wɔ Damasko akɔkyekyere Yesu akyidifo, mmea ne mmarima, na ɔde wɔn akɔ Yerusalem. ³ Ɔreyɛ abɛn Damasko no, prɛko pɛ na hann bi fi ɔsoro twa faa ne ho ⁴ ma otwa hwee fam. Afei, ɔtee nne bi se, “Saulo! Adɛn nti na wotaa me?”

⁵ Saulo bisae se, “Eyɛ wo hena, Owura?”

Nne no buae se, “Eyɛ me Yesu a wotaa me no.” ⁶ Nne no kae se, “Sɔre na kɔ kurow no mu na wɔɔɛkyerɛ wo nea ɛɛ se woyɛ.”

⁷ Nnipa a wɔne Saulo nam no gyinae a wɔantumi anka hwee; wɔtee nne no, nanso wɔanhu obiara. ⁸ Afei Saulo sɔre fii fam hɔ buee n’ani, nanso na onhu ade. Enti wokurakura no nkakrankakra de no kɔɔ Damasko. ⁹ Nnansa a odii wɔ Damasko no na onhu hwee. Na onnidi na ɔnnom nso.

¹⁰ Na osuani bi wɔ Damasko a wɔfrɛ no Anania. Awurade frɛɛ no anisoadehu mu se, “Anania!”

Ogyee so se, “Awurade!”

¹¹ Awurade ka kyerɛɛ no se, “Kɔ Yuda fi a ɛwɔ ɔtempɔn Tee no so na kobisa ɔbarima bi a wɔfrɛ no Saulo a ofi Tarso no ase; ɔrebɔ mpae. ¹² Anisoadehu mu na ohuu ɔbarima bi a wɔfrɛ no Anania a ɔde ne nsa too no so sɛnea ɛbeyɛ a, ɔɔɛsan ahu ade.”

¹³ Anania buae se, “Awurade, mate saa ɔbarima yi ho nsem bebreɛ, ne haw a ɔhaw w’akyidifo wɔ Yerusalem no.

¹⁴ Wakɔ asɔfo mpanyin nkyɛn akogyɛ adansedi krataa a ebɛma no tumi na ɔde akyere obiara a ɔbɔ wo din wɔ ha no.”

¹⁵ Awurade ka kyerɛɛ Anania se, “Kɔ! Efisɛ ɔno na mayi no a menam ne so bɛma amanamanmufɔ ne ahemfo ne Israelfo nyinaa ate me din. ¹⁶ Na mɛkyerɛ no amane a esiane me din nti obehu.”

¹⁷ Afei Anania kɔɔ fie hɔ de ne nsa guu Saulo so kae se, “Onua Saulo, Awurade Yesu no ankasa a oyii ne ho adi kyereɛ wo wɔ ɔkwan so bere a woreba no asoma me se, mimmebue w’ani mma wunhu ade na Honhom Kronkron nhyɛ wo ma.” ¹⁸ Amono mu hɔ ara na biribi a ete sɛ abon fii n’ani so na ohuu ade. Ɔsɔre ma wɔbɔɔ no asu. ¹⁹ Onyaa aduan bi di mee no, ne ho san no. Saulo dii nna kakra wɔ asuafo a na wɔwɔ Damasko no nkyɛn.

Saulo Ka Asɛmpa No Wɔ Damasko

²⁰ Ofii ase kaa asɛmpa no wɔ hyiadan mu se, Yesu yɛ Onyankopɔn Ba ampa. ²¹ Nnipa a wɔtee asɛm a ɔkae no nyinaa ho dwiriw wɔn ma wobisae se, “ɛnyɛ saa ɔbarima yi na na okum wɔn a wɔbɔ saa din yi wɔ Yerusalem no ana? Na yeate sɛ ɔbaa ha sɛ ɔrebɛkyere wɔn a wɔbɔ saa din yi nyinaa de wɔn akɔma asofo mpanyin.” ²² Saulo asɛnka no mu yɛɛ den; nnipa no gyee nsɛm a ɔka faa Yesu ho sɛ ɔno ne Agyenkwa no dii. Yudafo a wɔte Damasko no antumi anka nsɛm a ɔkae no ho hwee.

²³ Nna bi akyi no, Yudafo no bɔɔ Saulo ho pɔw sɛ wobekum no, ²⁴ nanso Saulo tee pɔw a wɔbɔɔ wɔ ne ho no. Na wɔtetɛw no wɔ kurow no apon ano awia ne anadwo apɛ no akum no. ²⁵ Anadwo bi Saulo akyidifo de no sii kɛntɛn bi mu, twetwee no faa ɔfasu so gyaa no sii fam.

Saulo Kɔ Yerusalem

²⁶ Saulo kɔɔ Yerusalem no, ɔpɛɛ sɛ ɔde ne ho kɔbɔ asuafo no ho nanso wosuroo no, efisɛ na wonnye nni sɛ wasakra abɛyɛ osuani. ²⁷ Barnaba kɔfaa no kɔɔ asuafo no nkyɛn. Ɔkaa wɔn sɛnea Awurade yii ne ho adi kyereɛ Saulo na ɔkasa kyereɛ no wɔ Damasko kwan so no ne sɛnea ɔde akokoduru kaa Yesu ho asɛm wɔ Damasko no. ²⁸ Saulo ne wɔn tenae na ɔde akokoduru kaa Awurade asɛm no wɔ Yerusalem nyinaa. ²⁹ Saulo ne Helenifo nyaa

akasakasa enti wɔbɔɔ pɔw sɛ wobekum no. ³⁰ Bere a agyidifo no tee pɔw a Helenifo no bɔɔ wɔ Saulo ho no, wɔde no kɔɔ Kaesarea gyaa no kwan ma ɔkɔɔ Tarso.

³¹ Afei asafo a wɔwɔ Yudea, Samaria ne Galilea no nyinaa asom dwoo wɔn. Asafo no nam Honhom Kronkron so timii. Nnipa pii bɛkaa wɔn ho na wɔtenaa ase wɔ Awurade suro mu.

Petro Sa Nyarewa

³² Petro tutuu akwan kɔɔ mmeaemmeae. Da bi a ɔkɔsraa agyidifo a wɔwɔ Lida no, ³³ ohyiaa ɔbarima bi a ne din de Enea a wabubu agu kɛtɛ so mfe awotwe wɔ hɔ. ³⁴ Petro ka kyerɛɛ no se, “Enea, Awurade Yesu Kristo nsa wo yare. Sɔre na yi wo kɛtɛ!” Amono mu hɔ ara na Enea sɔree. ³⁵ Nnipa a wɔte Lida ne Saron no nyinaa huu no no, wɔde wɔn ho maa Awurade.

³⁶ Na ɔbea ogyidini bi te Yopa a ne din de Tabita a ne nkyerɛase ne Dorka a ase ne ɔwansan. Saa ɔbea yi de n’adagyew nyinaa yɛɛ papa, boaa ahiafo. ³⁷ Saa bere koro no ara mu na ɔyare bɔɔ no ma owui. Woguaree no* de no kɔtoɔ abansoro dan† bi mu. ³⁸ Esiane sɛ Lida bɛn Yopa nti, asuafo a wɔwɔ Yopa no tee sɛ Petro wɔ Lida no, wɔsoma mmarima baanu kɔsrɛɛ no sɛ ɔnyɛ ntɛm mmra.

³⁹ Petro yɛɛ ntɛm ne wɔn kɔe. Oduu hɔ no wɔde no kɔɔ abansoro dan no mu. Akunafo a na wɔwɔ hɔ no nyinaa begyinagyinaa Petro ho sui, de ntade ne ntama a Tabita te ase no ɔpam maa wɔn no kyerɛɛ no.

⁴⁰ Petro maa wɔn nyinaa fii adi. Afei obuu nkotodwe, bɔɔ mpae dan n’ani kyerɛɛ amu no kae se, “Tabita,

* ^{9:37} Amanne bi a na Yudafo ne Helafo nyinaa di so ne sɛ woguare funu ansa na wosie no. † ^{9:37} sɛ wɔantumi ansie owufo ntɛm a, amanne ne sɛ wɔdeda no wɔ abansoro no so. Yerusalem de, da a obi bewu no ara na wosie no. Sɛ Enyɛ Yerusalem a, wotumi sie owufo no ne nnansa so.

sɔre!” Tabita tew n’ani na ohuu Petro no, ɔsɔre tenaa ase. ⁴¹ Petro soo ne nsa ma ɔsɔre gyinaa hɔ. Afei Petro frɛɛ agyidifo no ne akunafo no nyinaa de no maa wɔn. ⁴² Saa asɛm yi trɛw wɔ Yopa nyinaa ma nnipa pii gyee Awurade dii. ⁴³ Petro tenaa Simon a ɔhyɛ mmoa nhoma aduru no nkyɛn wɔ Yopa kyɛɛ kakra.

10

Petro Ne Kornelio

¹ ɔbarima bi tenaa Kaesarea a ne din de Kornelio. Na ɔyɛ Roma asraafo bi a wɔn din de Italia Asraafodɔm no so panyin. ² Na ɔne ne fifo nyinaa yɛ Nyamesurofo. ɔyɛ obi a na ɔboa ahiafo na daa ɔbɔ mpae nso. ³ Da bi awia bɛyɛ nnɔnabiɛsa na ohuu Onyankopɔn bɔfo wɔ anisoadehu mu se waba ne nkyɛn abɛfrɛ no se, “Kornelio!”

⁴ Kornelio de hu hwɛɛ no dinn. Obisae se, “Eyɛ dɛn Awurade?”

ɔbɔfo no buae se, “Wo mpae ne w’adɔe a woyɛ ahiafo no adu Onyankopɔn anim sɛ nkae ade. ⁵ Soma nnipa na wɔnkɔ Yopa nkɔfa ɔbarima bi a wɔfrɛ no Simon Petro mmra. ⁶ ɔte ɔbarima bi a wɔfrɛ no Simon a ɔhyɛ mmoa nhoma aduru a ne fi bɛn mpoano no nkyɛn.”

⁷ ɔbɔfo no kasa kyɛɛɛ no wiee a ɔkɔe no, Kornelio frɛɛ n’asomfo baanu, san frɛɛ n’asraafo no mu baako a ɔyɛ Onyamesuroni kaa wɔn ho, ⁸ kaa biribiara a wahu no kyɛɛɛ wɔn somaa wɔn Yopa.

⁹ Ade kyee a wɔrekɔ no, ɛbɛyɛ owigyinae a wɔrebɛn kurow no na Petro kɔɔ ɔdan a ɔte mu no atifi kɔbɔɔ mpae. ¹⁰ Saa bere no, na ɔkɔm de no a wogu so reyɛ aduan ama no na ɔkɔɔ tebea bi a ɛte sɛ adaeso mu. ¹¹ Ohuu sɛ ɔsoro abue na biribi a ɛte sɛ ntama kɛse a wɔakyekyere fi ɔsoro afanan resian ba fam. ¹² Na ntɔteboa ahorow ne mmoa a wɔwea ne wuram nnomaa ahyɛ saa ntama no ma. ¹³ Afei nne bi ka kyɛɛɛ no se, “Petro, sɔre na kum bi we!”

¹⁴ Petro buae se, “Dabi da, Awurade, minnii biribiara a Eho ntew da.”

¹⁵ Nne no ka kyerEE no bio se, “Biribiara a Onyankopɔn atew ho no, nka se Eho ntew.”

¹⁶ Saa anisoadehu yi baa mprensa. Afei ntama no san kɔɔ ɔsoro.

¹⁷ Saa bere a na Petro redwinnwen anisoadehu no ho no, nnipa a Kornelio somaa wɔn no koduu Petro abobow ano. ¹⁸ Wɔfrɛ bisae se, “Saa ofi yi mu na Simon Petro te no ana?”

¹⁹ Petro gu so redwinnwen anisoadehu no ho no, Honhom Kronkron ka kyerEE no se, “Simon, mmarima baasa bi rehwehwɛ wo. ²⁰ Sian si fam. Ntwentwɛn wo nan ase na wo ne wɔn nkɔ, efisɛ me na masoma wɔn.”

²¹ Petro sian kɔɔ fam kɔka kyerEE wɔn se, “Mene onipa a morehwehwɛ no no, na mo amanneɛ?”

²² Nnipa no buaa no se, “Yefi asraafo panyin Kornelio nkyɛn. Ɔyɛ ɔtreeneɛni ne Onyamesuroni a Yudafo nyinaa bu no. Onyankopɔn bɔfo ka kyerEE no se ɔnsoma mfrɛ wo mmra ne fi na ontie asɛm bi mfi wo nkyɛn.” ²³ Petro gyee nnipa no, som wɔn hɔho.

Petro Kɔ Kornelio Fi

Ade kyee no, Petro ne nnipa no ne agyidifo bi a wofi Yopa bɔɔ anan kɔɛ. ²⁴ Ade kyee a oduu Kaesarea no, na Kornelio afrɛfrɛ n’abusuafo ne ne nnamfonom ahyia retwɛn no. ²⁵ Petro reyɛ awura fie hɔ no, Kornelio hyiaa no, buu no nkotodwe. ²⁶ Nanso Petro ka kyerEE no se, “Sɔre, efisɛ me nso meyɛ onipa sɛ wo ara.”

²⁷ Petro ne Kornelio gu so rekasa no, wowuraa ofi no mu kɔtoo nnipa bebree. ²⁸ Petro ka kyerEE wɔn se, “Mo ara munim pefee sɛ Yudafo mmara mma Yudani kwan sɛ ɔkɔsra amanamanmuni anaasɛ ɔde ne ho bɔ no. Nanso Onyankopɔn akyerɛ me sɛ, ɛnsɛ sɛ meka sɛ onipa bi ho ntew. ²⁹ Eyi nti na mosoma bɛfrɛɛ me no mantwentwɛn

me nan ase no. Afei kyerε me nea enti a wosoma befrεε me no.”

³⁰ Kornelio kae se, “Nnε ne nnaanawia nnɔnabiεsa a merebɔ mpae wɔ me fi no, mihuu sε ɔbarima bi a ɔhyε atade a εhyerεn gyina m’anim.* ³¹ ɔkae se, ‘Kornelio, wo mpaeɔ ne w’adɔe a woyε ahiafo no adu Onyankopɔn anim sε nkae ade. ³² Soma nnipa na wɔnkɔ Yopa nkɔfa ɔbarima bi a wɔfrε no Simon Petro no mmra. ɔte ɔbarima bi a wɔfrε no Simon a ɔhyε mmoa nhoma aduru a ne fi ben mpoano no nkyen.’ ³³ Mesoma ma wɔbefrεε wo, na wo nso woayε ade sε woaba. Mprempren, yεn nyinaa ahyia wɔ Onyankopɔn din mu rebetie asεm biara a Awurade ahyε wo sε ka kyerε yεn no.”

Petro Asεnka

³⁴ Petro fii ase kasae se, “Afei mahu sε εyε nokware sε Onyankopɔn nyε nyiyimu, ³⁵ na mmom ɔman biara mu, nea ɔyε ade trenεe no ogye no. ³⁶ Munim asεmpa a εfa asomdwoe ho a εnam yεn Awurade Yesu Kristo a ɔyε nnipa nyinaa Awurade no so de brεε Israelfo no. ³⁷ Munim nsεm a esisii wɔ Yudea, a efii ase wɔ Galilea, Yohane asubɔ ho asεnka no akyi. ³⁸ Munim sεnea Onyankopɔn de Honhom Kronkron ne tumi maa Yesu Nasareni no. Esiane sε Onyankopɔn ka ne ho no nti ɔkɔɔ mmeaεmmeae, yεε papa, saa wɔn a ɔbonsam afa wɔn no yare.

³⁹ “Yeyε dwuma a odii wɔ Yudaman mu ne Yerusalem no ho nnansefo. Wɔbɔɔ no asennua mu kum no. ⁴⁰ Nanso ne nnansa so no, Onyankopɔn ma ɔsɔre fii awufo mu ma okoyii ne ho adi. ⁴¹ Wanyi ne ho adi ankyerε nnipa nyinaa sε yεn a yeyε nnansefo a Onyankopɔn ayi yεn dedaw no. ɔsɔre fii awufo mu no, yεne no didi nomee. ⁴² Na ɔhyεε

* ^{10:30} Kasa a wɔta a ka de kyerε ɔsoro bɔfo a ɔba sε onipa (Mat 28.3; Mar 16.5; Yoh 20.12).

yɛn sɛ, yɛnka asɛmpa no nkyerɛ nnipa nyinaa, na yenni ne ho adanse sɛ, ɔno ne nea Onyankopɔn ayi no asi hɔ sɛ ommu ateasefo ne awufo atɛn no. ⁴³ Adiyifo nyinaa kaa ne ho asɛm se, wɔnam ne din so de obiara a ogye no di no bɔne bɛkyɛ no.”

Amanamanmufo Nya Honhom Kronkron

⁴⁴ Petro gu so rekasa no, Honhom Kronkron baa wɔn a wɔretie asɛm no nyinaa so. ⁴⁵ Yudafo agyidifo a wɔne Petro fi Yopa bae no ho dwiriw wɔn sɛ Onyankopɔn ahwie n’akyɛde a ɛyɛ Honhom Kronkron no agu amanamanmufo no nso so. ⁴⁶ Efisɛ wɔtee sɛ wɔreka kasa foforo reyi Onyankopɔn ayɛ wɔ ne kɛseyɛ ho.

Petro kae se, ⁴⁷ “Saa nnipa yi anya Honhom Kronkron sɛnea yɛn nso yenyaa bi no. Obi betumi asiw wɔn asubɔ ho kwan ana?” ⁴⁸ Petro hyɛɛ sɛ wɔmmɔ wɔn asu wɔ Yesu Kristo din mu. Afei wɔsrɛɛ no sɛ onni nna kakra wɔ wɔn nkyɛn.

11

Petro Yi Ne Ho Ano

¹ Asomafo ne agyidifo a wɔwɔ Yudea nyinaa tee sɛ amanamanmufo no nso agye Onyankopɔn asɛm no adi. ² Petro kɔɔ Yerusalem no, Yudafo agyidifo no ne no nyaa akasakasa kae se, ³ “Woakɔ wɔn a wɔnnyɛ twetiatwafo no nkyɛn ne wɔn akodidi.”

⁴ Petro bɔɔ wɔn biribiara a esii no ho amanneɛ se, ⁵ “Na merebɔ mpae wɔ Yopa na minyaa anisoadehu. Mihuu biribi a ɛte sɛ ntama kɛse a wɔakyekyere sɛ efi ɔsoro afanan resian ba fam wɔ faako a mewɔ no. ⁶ Mehwɛɛ mu no, mihuu ntɔteboa ahorow, mmoa a wɔwea ne wuram nnomaa. ⁷ Afei, nne bi ka kyerɛɛ me se, ‘**Petro! Sɔre!** Kum na we!’

⁸ “Mibuae se, ‘Dabi da, Awurade! Minii biribiara a Eho ntew da.’

⁹ “Nne no ka kyerEE me bio se, ‘**Biribiara a Onyankopɔn** atew ho no, nka se Eho ntew.’ ¹⁰ Saa anisoadehu yi baa mprensa, na Eƿan kɔɔ ɔsoro.

¹¹ “Saa bere no ara mu, nnipa baasa a wɔasoma wɔn fi Kaesarea no beduu ofi a na mete mu no mu. ¹² Honhom Kronkron ka kyerEE me se menntwentwen me nan ase na me ne wɔn nkɔ. Saa agyidifo baasa yi a wofi Yopa no kaa me ho kɔɔ Kaesarea ma yen nyinaa kɔɔ Kornelio fi. ¹³ Ɔkaa sɛnea ohuu ɔsoro ɔbɔfo wɔ ne fi ma ɔbɔfo no ka kyerEE no se, ‘Soma kɔ Yopa kɔfrɛ ɔbarima bi a ne din de Simon Petro no. ¹⁴ Ɔno na ɔbɛka nsɛm a ebegye wo ne wo fifo nyinaa nkwa akyerɛ mo.’

¹⁵ “Bere a mifii ase kasae no, Honhom Kronkron baa wɔn so sɛnea yen nso mfiase no, Ebaa yen so no ara pɛ. ¹⁶ Eho ara mekae asɛm a Awurade kae se, ‘**Yohane de nsu na** Eɔɔ asu na mo de, wɔde Honhom Kronkron na Eɔɔ mo asu’ no. ¹⁷ Sɛ Onyankopɔn ama wɔn akyerɛde a bere a yegye Awurade Yesu Kristo dii no ɔmaa yen bi no a, Eno de me sɛɛ ne hena a mesiw Onyankopɔn kwan.”

¹⁸ Wɔtee saa asɛm yi no, wogyae wɔn nsɛmmisa no yii Awurade ayɛ se, “Afei de Onyankopɔn ama ho kwan ama amanamanmufo anya adwensakra a ede wɔn bɛkɔ nkwaye mu.”

Antiokia Asafo

¹⁹ Wokum Stefano no, wɔtaa agyidifo no ma wɔbɔɔ ahwete. Wɔn mu bi kyinkyin koduu Foinike, ne Kipro, ne Antiokia a na wɔreka asɛmpa no kyerɛ Yudafo nko ara. ²⁰ Agyidifo bi a wofi Kipro ne Kirene kɔɔ Antiokia kɔkaa asɛmpa a Efa Awurade Yesu Kristo ho no kyerEE amanamanmufo no. ²¹ Esiane sɛ na Awurade ka wɔn ho no nti nnipa pii gyee asɛm no dii ma wɔdan baa Awurade nkyɛn.

²² Saa aSEM yi tɾɛw koduu Yerusalem asafɔ no mu nti wɔsomaa Barnaba kɔɔ Antiokia. ²³ Oduu hɔ a ohuu sɛnea Onyankopɔn ahyira wɔn no, n'ani gye ma ɔhyɛɛ wɔn nkuran se womfi wɔn koma nyinaa mu nnye Awurade nni na wonni no nokware nso. ²⁴ Esiane sɛ na Barnaba yɛ onipa pa a Honhom Kronkron ahyɛ no ma na ɔwɔ gyidi nti, ɛmaa nnipa bebree nam ne so de wɔn ho maa Awurade.

²⁵ Barnaba kɔɔ Tarso kɔhwɛhwɛ Saulo. ²⁶ Ohuu no no, ɔde no baa Antiokia. Wɔn baanu tenaa hɔ afe kyɛkyɛɛ nnipa bebree. Antiokia ha na wɔtoo asuafo no din se “Kristofo.”

²⁷ Saa bere koro no ara mu na adiyifo bi fi Yerusalem kɔɔ Antiokia. ²⁸ Wɔn mu baako a wɔfrɛ no Agabo a Honhom Kronkron ahyɛ no ma no sɔre gyina hyɛɛ nkɔm se ɔkɔm kɛse bɛba asase nyinaa so. Saa ɔkɔm yi sii bere a na Klaudio di ade no. ²⁹ Asuafo no yɛɛ adwene sɛ biribiara a obi wɔ no wɔde bɛba na wɔde akɔboa anuanom a wɔwɔ Yudea no. ³⁰ Wɔde akyɛde a wɔn nsa kae no somaa Barnaba ne Saulo ma wɔde kɔmaa asafɔ no mu mpanyimfo.

12

Wɔtaa Asomafo No

¹ Saa bere yi mu ara na ɔhene Herode kyekyeree asafomma no bi fii ase yɛɛ wɔn ayayade. ² ɔde afoa kum Yohane nua Yakobo. ³ Ohuu sɛ Yudafo no ani gye nea ɔyɛɛ no ho no, ɔmaa wɔkɔkyeree Petro nso. AsEM yi sii Apiti Afahyɛ no mu. ⁴ Wɔkyeree Petro no, wɔde no too afiase a na asraafo baanan na wɔwɛn no bere biara. Herode yɛɛ n'adwene sɛ obedi n'asEM wɔ Twam Afahyɛ no akyi wɔ ɔman no anim.

⁵ Bere a na Petro da afiase no nyinaa na asafɔ no bɔ mpae dennen, srɛ Onyankopɔn sɛ ɔnhwɛ ne so.

Ɔbɔfo Yi Petro Fi Afiase

⁶ Anadwo a ade rebɛkye ama Herode adi Petro aɛm wɔ ɔman no anim no, na Petro da asraafo baanu ntam a wɔde nkɔnsɔnkɔnsɔn abien agugu no asesa asraafo baanu a wɔwɛn no no. Na asraafo baanu rewɛn afiase pon no ano nso. ⁷ Amono mu hɔ ara, Onyankopɔn bɔfo begyinaa afiase hɔ ma ɛhɔ hyerɛnee. Ɔbɔfo no wosow Petro, nyan no ka kyerɛɛ no se, “Sɔre ntɛm!” Mpofirim na nkɔnsɔnkɔnsɔn no tetew fii Petro nsa.

⁸ Afei Ɔbɔfo no ka kyerɛɛ Petro se, “Hyɛ w’atade ne wo mpaboa.” Petro wiee no, Ɔbɔfo no san ka kyerɛɛ no se, “Fura wo ntama na di m’akyi.” ⁹ Petro dii n’akyi fii adi. Wɔreko no na ɛyɛ no sɛ adaeso anaa anisoadehu, efisɛ na onnye nni sɛ ɛyɛ aɛmpa ara. ¹⁰ Wotwaa awɛmfo a wodi kan no ne wɔn a wɔto so abien no ho beduu dade pon a ɛda kurow no ano no ho. Woduu hɔ no ɔpon no ankasa bue ma wɔfaa mu kɔɛ. Wɔfaa borɔn bi so kɔɔ anim kakra no, Ɔbɔfo no gyaw Petro hɔ.

¹¹ Petro ani baa ne ho so ma ɔkae se, “Afei mahu sɛ nea esii no nyinaa yɛ nokware! Awurade somaa ne bɔfo na obegyee me fii Herode nsam ne nea Yudafo hwehwɛɛ sɛ wɔyɛ me no mu.”

¹² Petro huu nea asi no, ɔkɔɔ Yohane a na wɔfrɛ no Marko no a na ne din de Maria no fi. Saa bere no na nnipa bebree ahyia wɔ hɔ rebɔ mpae. ¹³ Petro bɔɔ abɔntenpon no mu na abaawa bi a wɔfrɛ no Roda betiei. ¹⁴ Bere a ɔtee nne no, anigye nti wammue ɔpon no. Ɔsan n’akyi kɔbɔɔ amanneɛ se, “Petro gyina ɔpon no akyi.”

¹⁵ Wɔka kyerɛɛ no se, “Gyama worebɔ dam.” Nanso ɔkɔɔ so kaa se ɛyɛ nokware. Wɔn nso ka kyerɛɛ no se, “Gyama ɛbɛyɛ ne saman.”

¹⁶ Petro kɔɔ so bɔɔ ɔpon no akyi. Wobuee a wohuu Petro no, wɔn ho dwiriw wɔn. ¹⁷ Ɔde ne nsa nyamaa wɔn se wɔnyɛ komm. Ɔkaa ɔkwan a Awurade nam so yii no fii

afiase no kyerɛɛ wɔn. Afei ɔka kyerɛɛ wɔn se, “Monka asɛm a asi yi nkyerɛ Yakobo ne anuanom a wɔaka no;” na ofii hɔ kɔɔ baabi foforo.

¹⁸ Ade kyee no, awɛmfo no ho yeraw wɔn yiye sɛ wonhu faako a Petro afa. ¹⁹ Herode hyɛɛ sɛ wɔnhwehwɛ no, nanso wɔanhu no. Wodii awɛmfo no asɛm, buu wɔn kumfɔ.

Eyi akyi no, Herode fii Yudea kɔɔ Kaesarea kɔtenaa hɔ kakra. ²⁰ Bere a Herode wɔ Kaesarea no, abɔfo bi a wɔasoma wɔn fi Tiro ne Sidon behuu no. Na Herode bo afuw Tirofo ne Sidonfo. Nanso abɔfo yi guan toaa Blasto a na ɔyɛ dabehene no sɛnea ɛbeyɛ a asomdwoe bɛba, efise na saa nkurow yi nya wɔn nnuan nyinaa fi Herode asase so.

²¹ Wɔhyɛɛ da bi maa Herode hyɛɛ n’ahentade tenaa n’ahengua mu kasa kyerɛɛ wɔn. ²² Herode kasa wiei no, nnipa no teɛɛ mu se, “Eyi yɛ onyame bi nne na ɛnyɛ onipa bi de!” ²³ Mpofirim, Onyankopɔn bɔfo bɛbɔɔ no ma ɔyare dɔɔ mmoa ma owui, esiane obu a wamfa amma Onyankopɔn no nti.

²⁴ Onyankopɔn asɛm kɔɔ so trɛw maa nnipa bebree gye dii.

Wɔsoma Asɛmpatrɛw Adwumayɛfo

²⁵ Barnaba ne Saulo wiee wɔn dwumadi no, wɔsan fii Yerusalem a na Yohane a wɔfrɛ no Marko no ka wɔn ho.

13

¹ Adiyifo ne akyerɛkyerɛfo a na wɔwɔ Antiokia asafo no mu bi ne Barnaba ne Simeon, a na wɔfrɛ no “Onipa Tuntum,” Lukio a ɔyɛ Kireneni, Manaen, a ɔne ɔhene Herode yɛ tipɛn, ne Saulo. ² Bere a wɔresom Awurade na wɔredi mmuada no, Honhom Kronkron no ka kyerɛɛ wɔn se, “Munyi Barnaba ne Saulo na wonkodi dwuma a

Eno nti mafre wɔn no mma me.” ³ Wodii mmuada bɔɔ mpae, de wɔn nsa guu wɔn so somaa wɔn.

Barnaba Ne Saulo Kɔ Kipro

⁴ Honhom Kronkron somaa wɔn no, wɔkɔɔ Seleukia. Wofi hɔ no, wɔtoaa wɔn akwantu no so koduu Kipro. ⁵ Woduu Salami no, wɔkaa Onyankopɔn asem wɔ Yudafo hyiadan mu. Saa bere no na Yohane Marko ka wɔn ho se ɔsomfo.

⁶ Wotwaa mu wɔ supɔw no so koduu Pafɔ, na hɔ na wohyiaa Yudani nkonyaayifo bi a ɔfre ne ho se odiyifo a na ne din de Bar-Yesu. ⁷ Na n’adamfo ne amrado a ɔwɔ supɔw no so a ne din de Sergio Paulo no. Saa amrado a na onim nyansa yiye no soma ma wɔkɔfreɛ Barnaba ne Saulo, efise na ɔrehwehwe Onyankopɔn asem atie. ⁸ Nanso nkonyaayifo Bar-Yesu a Hela kasa mu wɔfre no Elima no ampene so, efise na ɔmpɛ se amrado yi betie Onyankopɔn asem. ⁹ Afei Saulo a na wɔfre no Paulo a Honhom Kronkron ahyɛ no ma no hwɛɛ nkonyaayifo Elima dinn kae se, ¹⁰ “ɔbonsam ba a ɔte se wo! Wompɛ ade pa biara yiye. Nnaadaa ahorow ahyɛ wo ma. Bere biara wopɛ se wodan Awurade nokwasɛm ani ma eyɛ nkontomposɛm! ¹¹ Awurade bɛtwe w’aso ama w’ani afura a worenhu ade fi saa bere yi de kosi bere bi.”

Ehɔ ara Elima ani furae a na ɔde ne nsa rekeka se obenya obi aso ne mu ana. ¹² Amrado no huu asem a asi no, ogyee Awurade asem no dii. Awurade ho asem a ɔtee no maa ne ho dwiriw no.

Asomafo No Kodu Antiokia

¹³ Paulo ne ne dɔm no tenaa hyɛn mu fii Pafɔ kɔɔ Perge a ɛwɔ Pamfilia no; ehɔ na Yohane a ne din baako nso ne Marko no gyaw wɔn san kɔɔ Yerusalem. ¹⁴ Wofi Perge no, wɔkɔɔ Antiokia a ɛwɔ Pisidia. Eduu Homeda no, wɔkɔɔ hyiadan mu kosomee. ¹⁵ Wɔkenkan Mose Mmara no ne

Adiyifo no nsɛm wiei no, hyiadan no mu mpanyimfo no soma kɔka kyerɛɛ wɔn se, “Anuanom, sɛ mowɔ asɛm bi a mɔɛka de ahyɛ nnipa no nkuran a, mowɔ ho kwan sɛ moka.”

¹⁶ Afei Paulo sɔre gyina nyamaa ne nsa fii ase kasae se, “Me nuanom Israelfo ne amanamanmufɔ a mowɔ ha a mosom Onyankopɔn no muntie me! ¹⁷ Israel Nyankopɔn yii yɛn nenanom ma wɔyɛɛ ɔman kɛse bere a na wɔte Misraim asase so no. Onyankopɔn nam ne tumi kɛse so yii wɔn fii Misraim, ¹⁸ na ɔhwɛɛ wɔn so wɔ sare so mfe aduanan. ¹⁹ Otuu aman ason wɔ Kanaan asase so gui, de asase no maa ne nkurɔfo sɛ wɔn awunyade, ²⁰ ma wɔtenaa so mfe ahannan ne aduonum. Eyi akyi no ɔmaa atemmufɔ dii wɔn so kosii sɛ Odiyifo Samuel bae. ²¹ Bere a wɔpɛɛ sɛ wonya ɔhene ma odi wɔn so no, Onyankopɔn de Kis ba Saulo a ofi Benjamin abusua mu no maa wɔn ma odii wɔn so mfe aduanan. ²² Onyankopɔn tuu Saulo ade so na ɔde Dawid sii n’anan mu. Asɛm a Onyankopɔn ka faa Dawid ho ne sɛ, ‘Mahu sɛ Yisai ba Dawid ne onipa a mɛpɛ no; ɔyɛ onipa a ɔbɛyɛ nea mɛpɛ nyinaa.’

²³ “Sɛnea Onyankopɔn hyɛɛ ho bɔ no, Yesu a ɔyɛ Dawid aseni no na ɔyɛɛ no Israelfo Agyenkwa. ²⁴ Ansa na Yesu rebefi n’adwuma ase no, Yohane kaa adwensakra ho asɛm kyerɛɛ Israelfo se, wɔnsakra mfi wɔn bɔne ho na wɔmma wɔmmɔ wɔn asu. ²⁵ Ansa na Yohane rebewie n’asɛnka no, obisaa nnipa no se, ‘Mususuw sɛ meyɛ hena? ɛnyɛ me ne onipa a moretwɛn no no. ɛrenkyɛ biara na nea moretwɛn no a mensɛ sɛ mɛworɔw ne mpaboa afi ne nan no bɛba.’

²⁶ “Me nuanom Abraham asefo ne amanamanmufɔ a mosom Onyankopɔn a mowɔ ha, yɛn nti na Onyankopɔn soma ma wɔde saa nkwaye yi aba. ²⁷ Esiane sɛ nnipa a na wɔte Yerusalem ne wɔn mpanyimfo nnim sɛ ɔno ne Agyenkwa no, na wɔnte adiyifo no nsɛm a wɔkenkan no

Homeda no ase no nti, wobuu Yesu kumfɔ maa adiyifo no nsɛm no baa mu. ²⁸ Ɛwɔ mu sɛ wɔannya afɔbusɛm bi annyina so ammu no kumfɔ de, nanso wɔmaa Pilato kum no. ²⁹ Wɔyɛɛ biribiara a Kyerɛwsɛm no ka fa ne ho wiee no, woyii no fii asennua no so kosiee no. ³⁰ Nanso Onyankopɔn ma ɔsɔre fii awufo mu, ³¹ na ne wusɔre akyi no, oyii ne ho adi nna pii kyerɛɛ wɔn a na wɔne no tu kwan fi Galilea kɔ Yerusalem no. Wɔne nnipa a wodi ne ho adanse kyerɛ Israelfo no.

³² “Afei yɛwɔ ha sɛ yɛrebɛka asɛmpa no akyerɛ mo se, Onyankopɔn nam sɔre a ɔmaa Yesu Kristo sɔre fii awufo mu no so ama bɔ a ɔhyɛɛ yɛn nenanom no aba mu. ³³ Eyi ne nea wɔakyerɛw wɔ Nnwom a ɛto so abien no mu se, “Woyɛ me ba;

nnɛ, mayɛ w’Agya.’

³⁴ Asɛm a Onyankopɔn ka faa sɔre a ɔma no sɔre fii awufo mu na amma no amporɔw no ne sɛ,

“Mede nhyira kronkron a mehyɛɛ Dawid ho bɔ no behyira wo.’

³⁵ Wɔaka no wɔ baabi nso se,

“Woremma wo Kronkronni no mporɔw.’

³⁶ “Dawid bere so no, ɔsom Onyankopɔn kosii sɛ owu ma wosiee no wɔ ne nenanom nkyɛn pɛɛ, na ne nipadua porɔwee. ³⁷ Nanso nea Onyankopɔn nyan no fii awufo mu no amporɔw.

³⁸ “Anuanom, ɛsɛ sɛ mo nyinaa te ase sɛ ɛnam Yesu so na wɔka bɔnefakye ho asɛm kyerɛ mo. ³⁹ Ɛsɛ sɛ mote ase sɛ obiara a ogye no di no, wɔabu no bem a anka Mose mmara ntumi mmu no no. ⁴⁰ Monhwɛ yiye na adiyifo no nkɔm a wɔhyɛɛ no amma mo so:

⁴¹ “Mo fɛwdifo!

Momma ɛnyɛ mo nwonwa na mo ho nnwiriw mo!

Ɛfisɛ merebɛyɛ biribi wɔ wo bere so,

na sE wɔka kyerE wo a,
worennye nni!”

⁴² Paulo ne Barnaba refi asɔredan no mu no, nnipa no srEE wɔn sE wɔmmra Homeda a ɛreba no mmɛkyerɛkyerE wɔn bio. ⁴³ Nnipa no wiee nhyiamu no, Yudafo ne amanamanmufo bebree a wɔasakra aba Yudasom mu no tu dii Paulo ne Barnaba akyi. Asomafo no tuu wɔn fo, hyEE wɔn nkuran sE wɔntena ase Onyankopɔn adom mu.

Asomafo No Kɔ Amanamanmufo Nkyɛn

⁴⁴ Homeda a edi so no dui no, ɛkame ayE sE wɔn a wɔte kurow no mu no nyinaa betiee Awurade asE. ⁴⁵ Yudafo no huu nnipakuw no, wɔn ani bere ma wɔsɔre gyee nsEm a Paulo reka no ho akyinnye kasa tiaa no.

⁴⁶ Nanso Paulo ne Barnaba de akokoduru kɔɔ so kae se, “Mone nnipa a ɛsE sE wɔka Onyankopɔn asE no kyerE mo kan. Na sE moapo, na mummu mo ho sE nkwa a enni awiei ho hia mo nti, yebegyaw mo hɔ akɔ amanamanmufo no nkyɛn. ⁴⁷ Ahyɛde a Awurade de ama yɛn ne sE,

“Mɛma mo ayE amanamanmufo nyinaa kanea;
ɛnam mo so na wobegye wiasefo nyinaa nkwa.”

⁴⁸ Amanamanmufo no tee saa asE no, wɔn ani gye ma wɔkamfoo Awurade asE no, na wɔn a wɔayi wɔn ama nkwa a enni awiei no bɛyɛɛ agyidifo.

⁴⁹ Na Awurade asE no trɛw ɔmantam no mu nyinaa. ⁵⁰ Nanso Yudafo no tuu nnipa atitiriw a wɔwɔ kurow no mu no ne mmea Nyamesurofo a na wɔwɔ hɔ bi a wodi mu no aso ma wɔtaa Paulo ne Barnaba, pam wɔn fii ɔman no mu. ⁵¹ Enti asomafo no poroporow wɔn anan ase mfutuma guu wɔn so fii hɔ kɔɔ Ikoniom. ⁵² Anigye ne Honhom Kronkron hyEE asuafo a na wɔwɔ Antiokia no ma.

14

Ikoniom Asenka

¹ Paulo ne Barnaba duu Ikoniom no, wɔkɔɔ Yudafo asɔredan mu. Wɔkasa ma Yudafo ne amanamanmufo bebree bɛyɛɛ agyidifo. ² Nanso Yudafo a wɔpoo Awurade aSEM no hwanyan amanamanmufo no, san tuu wɔn aso tiaa anuanom no. ³ Asomafo no tenaa hɔ kyɛɛ. Na Awurade nam tumi a ɔde maa wɔn ma wɔyɛɛ anwonwade ahorow no so kyerɛɛ sɛ nSEM a wɔka fa n'adom ho no yɛ nokware. ⁴ Kurow no mu nnipa no mu kyɛɛ abien; fa kɔɔ Yudafo no afa na fa nso kɔɔ asomafo no afa. ⁵ Amanamanmufo ne Yudafo no ne wɔn mpanyimfo yɛɛ adwene se wɔbɛyɛ wɔn ayayade asan asiw wɔn abo. ⁶ Asomafo no tee pɔw a wɔbɔ faa wɔn ho no, woguan kɔɔ Litra ne Derbe a ɛwɔ Likaoniaman mu ne nkuraa a atwa ho ahyia no nyinaa ase. ⁷ Wɔkaa ASEMpa no wɔ hɔ.

Obubuafo Bi Ayaresa

⁸ Bere a Paulo ne Barnaba wɔ Litra no wohuu ɔbarima bi a na ɔyɛ obubuafo fi n'awo mu. ⁹ Paulo rekasa no, obubuafo no tiee no maa Paulo huu sɛ ɔwɔ gyidi a ɛbɛma watumi agyina so asa no yare. Enti Paulo hwɛɛ obubuafo no ¹⁰ teɛɛ mu se, “Sɔre gyina hɔ!” Amono mu, obubuafo yi huruw gyinae, fii ase nantewee.

¹¹ Nnipa no huu nea Paulo ayɛ no, wofii ase teɛteɛɛ mu wɔ Likaonia kasa mu se, “Anyame ayeyɛ wɔn ho sɛ nnipa aba yɛn nkyɛn.” ¹² Eyi nti wɔfrɛɛ Barnaba Seus na wɔfrɛɛ Paulo nso Hermes, * efise ɔno na na ɔka aSEM no.

* 14:12 Na Seus yɛ Litra abosom mu panyin a ɛhɔ na na n'abosonnan wɔ. Wɔn a na wɔbɛbɔ afɔre ma Seus no yɛɛ wɔn adwene sɛ wɔde ayeyɛde bɛma Paulo ne Barnaba mmom. Nea enti a wɔfaa Barnaba sɛ Seus ne sɛ na ɔwɔ anuonyam. Wɔfaa Paulo sɛ onyame Hermes, efise na ɔyɛ ɔkyeame (28.6).

¹³ Seus a na n'asoredan wɔ kurotia no sɔfo de nantwi ne nhwiren baa kurow no pon ano, pɛɛ sɛ wɔbɔ afɔre ma asomafo no.

¹⁴ Bere a Barnaba ne Paulo tee afɔre a nnipa no pɛ sɛ wɔbɔ no, wɔde abufuw sunsuanee wɔn ntade mu, tuu mmirika kɔɔ nnipakuw no mu teɛteɛɛ mu se, ¹⁵ “Dɛn na moɛ sɛ moyɛ yi? Yɛyɛ nnipa te sɛ mo! Yɛaba sɛ yerebɛka asɛmpa no akyerɛ mo, ama moagyae saa nneɛma hunu yi yɛ, na mode mo ho ama Onyankopɔn a ɔbɔɔ ɔsoro, asase, ɛpo ne biribiara a ɛwɔ mu no. ¹⁶ Bere bi a atwa mu no, ɔmaa nnipa nyinaa kwan ma wɔyɛɛ nea wɔpɛ. ¹⁷ Nanso Onyankopɔn nam nneɛma pa a ɔyɛ so di n'ankasa ho adanse. Mmere a ɛsɛ mu no, ɔma osu tɔ ma nnɔbae ba; ɔma mo aduan di ma munya ahotɔ.” ¹⁸ Nanso saa kasa yi nyinaa akyi no, pɛ ara na nnipa no pɛɛ sɛ wɔbɔ afɔre ma wɔn.

¹⁹ Yudafo bi fi Antiokia a ɛwɔ Pisidia ne Ikoniom tuu nnipa no aso maa wosiw Paulo abo, twee no fii kurow no mu a na wosusuw sɛ wawu. ²⁰ Nanso bere a agyidifo no betwaa ne ho hyiae no, ɔsɔre san kɔɔ kurow no mu. Ade kyee no ɔne Barnaba fii hɔ kɔɔ Derbe.

Paulo Ne Barnaba San Ba Antiokia

²¹ Paulo ne Barnaba kaa asɛmpa no wɔ Derbe ma nnipa pii gye dii. Wofi hɔ no, wɔsan kɔɔ Listra, Ikoniom ne Antiokia a ɛwɔ Pisidia. ²² Wɔhyɛɛ agyidifo no nkuran sɛ wɔntena ase gyidi mu. Wɔka kyereɛ agyidifo yi se, “Ansa na yebetumi akɔ Onyankopɔn ahenni mu no, ɛsɛ sɛ yɛfa ɔhaw ahorow pii mu.” ²³ Asafo biara a wɔkɔɔ mu no, wosisii mpanyimfo maa wɔn; na wɔnam mpaebɔ ne mmuadadi so de mpanyimfo no hyɛɛ Awurade a wɔde wɔn ho ato no so no nsa. ²⁴ Wofi Pisidia no wɔbaa Pamfilia. ²⁵ Wɔkaa asɛmpa no wɔ Perge na wofi hɔ baa Atalia.

²⁶ Wofi Atalia no, wɔsan baa Antiokia a εηϞ na bere a na wɔrebefi saa adwuma a wɔawie yi ase no, wɔde wɔn hyεε Awurade nsa no. ²⁷ Bere a woduu Antiokia no, wohyiaa asafo no mu nnipa nyinaa. Wɔkaa nneεma a Onyankopɔn nam wɔn so ayε, ne sεnea Onyankopɔn abue kwan ama amanamanmufo agye aεm no adi no nyinaa kyerεε wɔn. ²⁸ Paulo ne Barnaba tenaa gyidifo no nkyɛn kyεε.

15

Yerusalem Agyinatufɔ

¹ Bere a Paulo ne Barnaba wɔ Antiokia no, nnipa bi fi Yudea bεkyerεkyerεε anuanom no se, “Sε moamma wɔantwa mo twetia sεnea Mose amanne no kyerε no a morennya nkwa.” ² Paulo ne Barnaba ne wɔn gyee saa nkyerεkyerε yi ho akyinnye denneennen. Saa aεm yi nti Paulo ne Barnaba ne Antiokia asafo no mu nnipa bi kɔɔ Yerusalem kohuu asomafo no ne mpanyimfo faa saa nkyerεkyerε yi ho. ³ Asafo no gyaa wɔn kwan. Wɔrekɔ no, wɔfaa Foinike ne Samaria kaa amanamanmufo gye a wɔagye aεm no adi no kyerεε wɔn. Saa aεm yi yεε agyidifo no nyinaa anigye yiye. ⁴ Woduu Yerusalem no, asafo no asomafo ne mpanyimfo a wɔkaa nneεma a Onyankopɔn nam wɔn so ayε kyerεε wɔn no gyee wɔn.

⁵ Nanso Farisifo a wɔabeyε agyidifo no hyεε sε, εsε sε wotwa amanamanmufo a wɔagye aεm no adi no nyinaa twetia na wodi Mose mmara no so.

⁶ Asomafo no ne mpanyimfo no hyia dwenee aεm yi ho. ⁷ Wodwinnwen ho wiee no, Petro sɔre kasae se, “Me nuanom, munim sε bere bi a atwam no, Onyankopɔn yii me fii mo mu sε menka aεmpa no nkyerε amanamanmufo, sεnea εbeyε na wɔbεte aεmpa no na wɔagye adi. ⁸ Sεnea Onyankopɔn a onim koma mu no nam Honhom Kronkron a ɔma εbaa yɛn mu no so gyee yɛn

too mu no, saa ara na ɔnam Honhom Kronkron no ara so agye amanamanmufo nso ato mu. ⁹ Onyankopɔn anyɛ nyiyimu; ɔnam gyidi so tew wɔn koma mu. ¹⁰ Adɛn nti na moƆɛ sɛ mode adesoɔ duruduru a yɛn agyanom antumi ansoa, na yɛn nso yɛantumi ansoa no soa agyidifo no de sɔ Onyankopɔn hwɛ? ¹¹ Nanso yegye di sɛ wɔnam Awurade Yesu Kristo adom so na agye yɛn nkwa sɛ wɔn ara.”

¹² Bere a Barnaba ne Paulo kaa anwonwade a Onyankopɔn nam wɔn so yɛɛ wɔ amanamanmufo no mu maa nnipa a wɔahyia hɔ no tee no, wɔyɛɛ dinn. ¹³ Wɔkasa wiei no, Yakobo kae se, “Anuanom, muntie me! ¹⁴ MƆprempren ara na Simon kyerɛɛ mu kyerɛɛ yɛn se Onyankopɔn yii amanamanmufo sɛ ne de. ¹⁵ Adiyifo no nsɛm a wɔkaa no ne eyi hyia, sɛnea wɔakyerɛw wɔ Kyerɛwsɛm no mu se:

¹⁶ “Eyi akyi no, mɛsan aba
abesi Dawid fi a abubu no.

Mɛma nea adwiriw no so,
na masan asi bio,

¹⁷ sɛnea ɛbɛyɛ a nnipa a wɔaka no,
ne amanamanmufo a me din da wɔn so no
bɛhwɛhwɛ Awurade.’

¹⁸ Awurade a ɔdaa eyi adi bere bi a atwa mu no, ɔno na
ɔbɛyɛ eyinom nyinaa.”

¹⁹ Yakobo toaa so se, “M’adwene ne sɛ, ɛnsɛ sɛ yɛhaw
amanamanmufo a wɔde wɔn ho rema Onyankopɔn no.

²⁰ Mmom, momma yɛnkyerɛw nhoma nkɔka nkyerɛ wɔn
se, ɛnsɛ sɛ wodi aduan biara a wɔde ama abosom, efisɛ
ɛho ntew; afei wɔntwe wɔn ho mfi aguamammɔ ho na
wɔnnwe aboa a wɔantwa ne mene na owui. Bio, wɔnni
mogya nso. ²¹ Efi tete na wɔkenkan saa Mose mmara yi
wɔ hyiadan mu wɔ Homeda biara, na wɔka ho nsɛm nso
wɔ kurow biara mu.”

Wɔkyerɛw Krataa Kɔma Amanamanmufo

²² Asomafo ne mpanyimfo ne asafo no mu nnipa nyinaa hyiae, yɛɛ adwene sɛ wobeyi nnipa bi afi kuw no mu aka Paulo ne Barnaba ho na wɔakɔ Antiokia. Woyii mmarima atitiriw baanu a wɔn din de Yuda, a wɔfrɛ no Barsaba ne Silas. ²³ Nhoma a wɔde maa wɔn kɔɛ no mu nsɛm ni:

Anuanom amanamanmufo a mote Antiokia, Siria ne Kilikia,

Asomafo ne mpanyimfo ne anuanom a wɔwɔ Yerusalem no kyia mo.

²⁴ Yɛtee sɛ anuanom bi a yɛmaa wɔn tumi fi yɛn mu nam wɔn nkyerɛkyerɛ so tan mo ani, haw mo adwene.

²⁵ Eyi nti yɛatu nnipa bi sɛ wɔmmra mo nkyɛn. Saa nnipa no ne Paulo ne Barnaba ²⁶ a wɔde wɔn nkwa abɔ afɔre ama Awurade Yesu Kristo no. ²⁷ Eyi nti, yɛresoma Yuda ne Silas ama wɔabɛkasa afoa asɛm a yɛrekyerɛw no so. ²⁸ Honhom Kronkron ne yɛn ayɛ adwene sɛ, saa ahyɛde yi akyi no yɛmmfa adesoa foforo bi a emu yɛ duru nsoa mo; ²⁹ munnni aduan a wɔde ama abosom; saa ara nso na munnni mogya. Monnwe aboa a wɔantwa ne mene na owui. Bio, montwe mo ho mfi aguamammɔ ho. Sɛ mutumi di saa ahyɛde yi so a, ebesi mo yiye.

Yɛsan kyia mo.

³⁰ Wogyaa nnipa no kwan ma wɔkɔɔ Antiokia. Woduu hɔ no, wohyiaa agyidifo no de nhoma no maa wɔn.

³¹ Agyidifo no kenkan nhoma no, emu nkuranhyɛsɛm no maa wɔn ani gyei. ³² Yuda ne Silas a wɔyɛ adiyifo no ne anuanom no kasa kyɛɛ, hyɛɛ wɔn nkuran. ³³ Wodii nna kakra wɔ hɔ no, anuanom no gyaa wɔn kwan asomdwoe mu ma wɔsan kɔɔ anuanom a wɔsoma wɔn no nkyɛn dwoodwoo. ³⁴ Nanso Silas de, wankɔ bi*. ³⁵ Paulo ne

* 15:34 Tete akyerɛw binom mfa nkyekyɛmu 34 nka ho

Barnaba dii nna kakra wɔ Antiokia, boaa anuanom bi ma wɔkyerɛkyerɛɛ, kaa Awurade asɛm.

Paulo Ne Barnaba Ntam Tetew

³⁶ Nna bi akyi no, Paulo ka kyerɛɛ Barnaba se, “Ma yɛnsan nkɔsra anuanom a wɔwɔ nkurow a yɛaka Awurade asɛm wɔ so no nyinaa nkɔhwɛ sɛnea wɔrɛkɔ so wɔ gyidi mu.” ³⁷ Barnaba pɛɛ sɛ wɔde Yohane Marko ka wɔn ho kɔ, ³⁸ nanso Paulo ampene so, efisɛ wɔwɔ Pamfilia no ogyaw wɔn hɔ a ɔne wɔn antenna hɔ ankosi awiei. ³⁹ Akasakasa a emu yɛ den sii wɔn ntam maa wɔn mu tetewee. Barnaba faa Marko ne no kɔɔ Kipro ⁴⁰ na Paulo nso faa Silas. Anuanom no de wɔn hyɛɛ Onyankopɔn nsa ma wofii hɔ kɔe. ⁴¹ Ɔkɔfaa Siria ne Kilikia hyɛɛ asafo no den.

16

Timoteo Kɔka Paulo Ne Silas Ho

¹ Paulo toaa n’akwantu no so kɔɔ Derbe ne Listra. Eho na na ogyidini bi a ne din de Timoteo a ne na yɛ Yudani gyidini na n’agya nso yɛ Helani no te. ² Anuanom a na wɔwɔ Listra ne lkoniom no nyinaa dii Timoteo ho adanse pa. ³ Esiane sɛ na Paulo pɛ sɛ ɔde Timoteo ka ne ho kɔ nti otwaa no twetia, efisɛ Yudafo a na wɔwɔ hɔ no nyinaa nim sɛ Timoteo agya yɛ Helani. ⁴ Kurow biara a woduu so no, wɔkaa mmara a asomafo ne mpanyimfo a wɔwɔ Yerusalem ahyɛ sɛ wonni so no kyerɛɛ wɔn. ⁵ Asafo no nyinii gyidi mu na daa, nnipa bebree bɛkaa wɔn ho.

Twa Bra Makedonia

⁶ Esiane sɛ Honhom Kronkron amma wɔn kwan sɛ wɔnka asɛm no wɔ Asia no nti, wɔkɔɔ Frigia ne Galatia. ⁷ Woduu Misia hye so no, wɔpɛɛ sɛ anka wɔkɔ Bitinia, nanso Yesu Honhom no amma wɔn kwan. ⁸ Enti wɔfaa Misia kosii Troa. ⁹ Da no anadwo Paulo huu anisoade sɛ

ɔbarima bi a ofi Makedonia gyina hɔ resɛ no se, “Twa bra Makedonia beboa yen!” ¹⁰ Anisoadehu yi akyi no, yeboaboa yen ho se yebekɔ Makedonia, efise yetee ase se Onyankopɔn na wafɛ yen se yenkɔka asempano no wɔ hɔ.

Lidia Adwensakra

¹¹ Yede hyen fii Troa kɔɔ Samotrake na ade kyee no, yeduu Neapoli. ¹² Yefi hɔ no, yetooa so kɔɔ Filipi, kurow titiriw a ewɔ Makedonia mansin a na Romafo di so no mu. Yedii nna kakra wɔ saa kurow yi mu.

¹³ Homeda duu no, yefii kurow no mu kɔɔ asubɔnten bi ho baabi a yeate se Yudafo taa hyia wɔ hɔ bɔ mpae. YekyerEkyerEE mmea bi a wɔbaa hɔ no KyerEwsem no.

¹⁴ Mmea a wobetiee asem no mu baako ne Tiatirani Lidia a na ɔtɔn ntama kɔkɔɔ. Na ɔye Onyamesomni nti Awurade buee ne koma mu ma otiee asem a na Paulo reka no ma ogye dii. ¹⁵ Wɔbɔɔ ɔne ne fifo nyinaa asu wiee no, ɔka kyerEE yen se, “Se mugye to mu se meye Awurade mu gyidini ampa ara a, eno de mommetena me fi.” ɔkɔɔ so sɛɛ yen ara kosii se yepenee.

Paulo Ne Silas Da Afiasɛ

¹⁶ Da bi a yerekɔ faako a yehyia bɔ mpae no, yehyiaa afenaa bi a akɔm honhom wɔ ne mu a ɔde n'akɔm no hye nkɔm ma ne wuranom nya wɔn ho. ¹⁷ Odii yene Paulo akyi teeteEE mu se, “Saa nnipa yi ye ɔsorosoroni Nyankopɔn no asomfo a wɔaba se wɔrebeka nkwagye ho asem akyerE mo.” ¹⁸ Eyi kɔɔ so ara kosii se da bi Paulo de ahometew teeteEE honhommɔne no se, “Mehye wo wɔ Yesu Kristo din mu se, tu fi ne mu kɔ!” Amono mu hɔ ara, na honhommɔne no tu fii afenaa no mu.

¹⁹ Bere a afenaa no wuranom huu se nea ema wɔn sika no afi wɔn nsa no, wɔkyeree Paulo ne Silas twee wɔn kɔɔ mpanyimfo anim wɔ aguabɔbea. ²⁰ Wɔde wɔn brɛɛ

mpanyin bɔɔ wɔn sobo se, “Saa nnipa yi ye Yudafo a wɔde wɔn nneyɛe ne wɔn nkyerɛkyerɛ redan yen kurow yi ani. ²¹ Wɔrekyerɛkyerɛ amanne bi a esiane se yeyɛ Romafo nti, yen mmara mma yen ho kwan se yegye to mu.”

²² Nnipadɔm a wɔwɔ hɔ no tow hyɛɛ wɔn so, na mpanyin no tetew Paulo ne Silas ntade mu, hyɛɛ se wɔmmɔ wɔn mmaa. ²³ Wɔbɔɔ wɔn mmaa pii wiei no, wɔde wɔn koguu afiase, na mpanyin no hyɛɛ afiase sohwefo no se ɔnto wɔn mu yiye sɛnea ebeyɛ a wɔrenguan. ²⁴ Afiasɛ sohwefo no tee saa asem no, ɔde wɔn koguu afiasɛ hɔ dan a ɛwɔ mfimfini no mu de nkɔnsɔnkɔnsɔn guguu wɔn anan de bobɔɔ nnua mu.

²⁵ ɔdasu mu no, na Paulo ne Silas rebɔ mpae to nnwom reyi Onyankopɔn ayɛ, a nneduafo a wɔwɔ hɔ no nso retie wɔn. ²⁶ Mpofirim na asase wosow denneennen maa afiasɛ no nnyinaso nso wosow maa apon no nyinaa buebuei, na nneduafo no nyinaa nkɔnsɔnkɔnsɔn tetewee. ²⁷ Bere a afiasɛ sohwefo no fi nna mu nyan na ohuu se afiasɛ no apon no abuebue no, osusuw se nneduafo no nyinaa aguan, enti ɔtwee n’afɔa, pɛɛ se anka ɔde kum ne ho.* ²⁸ Nanso Paulo teɛɛ mu ka kyerɛɛ no se, “Nkum wo ho! Yen nyinaa wɔ ha!”

²⁹ ɛhɔ ara afiasɛ sohwefo no frɛ ma wɔde kanea brɛɛ no na ɔde ahopopo ne osuro behwee Paulo ne Silas anim. ³⁰ Afei ɔde wɔn fii adi bisaa wɔn se, “Awuranom, den na menyɛ na manya nkwa?”

³¹ Wobuae se, “Gye Awurade Yesu di na obegye wo ne wo fifo nyinaa nkwa.” ³² Wɔkaa Awurade ho asem kyerɛɛ afiasɛ sohwefo no ne ne fifo nyinaa. ³³ Anadwo no ara,

* ^{16:27} se odeduani bi guan a, wɔde ne sohwefo si n’anan mu (12.19). Se ɔsohwefo no kum ne ho a na aniwu ne adwennwene biara to atwa.

afiase sohwefo yi hohoroo Paulo ne Silas mmaabɔ akuru no anim. Afei ɔma wɔbɔɔ ɔne ne fifo nyinaa asu. ³⁴ Afiase sohwefo yi de Paulo ne Silas kɔɔ fie kɔmaa wɔn aduan dii na ɔne ne fifo nyinaa ho san wɔn, efise afei de, wɔagyɛ Onyankopɔn adi.

Wogyaa Asomafo No

³⁵ Ade kyee no, mpanyin no somaa asraafo kɔka kyerɛɛ afiase sohwefo no se, “Gyaa saa nnipa no ma wɔnkɔ.”

³⁶ Afiase sohwefo no ka kyerɛɛ Paulo se, “Mpanyin no asoma abɛka se minnyaa wo ne Silas ma monkɔ. Enti monkɔ asomdwoe mu.”

³⁷ Nanso Paulo ka kyerɛɛ asraafo no se, “Yɛyɛ Romafo. Wɔammu yɛn fɔ wɔ bɔne biara ho na wɔde yɛn baa aguabɔbea bebɔɔ yɛn mmaa, de yɛn guu afiase. Afei na wɔpɛ sɛ wɔfa sum ase gyaa yɛn? Dabi da! Mpanyin no ankasa mmra ha mmegyaa yɛn.”

³⁸ Asraafo no san kɔbɔɔ Roma mpanyimfo no amanneɛ. Wɔtee sɛ Paulo ne Silas yɛ Romafo no, wosuroe ³⁹ enti wɔkɔmaa wɔn dibem, yii wɔn fii afiase hɔ ka kyerɛɛ wɔn se womfi kurow no mu. ⁴⁰ Paulo ne Silas fii afiase hɔ kɔɔ Lidia fi. Wɔkɔtoɔ anuanom no wɔ hɔ, hyɛɛ wɔn nkuran. Afei wofii hɔ kɔe.

17

Paulo Ne Silas Kɔ Tesalonika

¹ Wɔtoaa wɔn akwantu no so fii Amfipoli ne Apolonia baa Tesalonika a na Yudafo hyiadan wɔ no. ² Sɛnea Paulo taa yɛ no, ɔkɔɔ hyiadan mu mpreɛnsa ne nnipa no gyee akyinnye wɔ Kyerɛwsɛm no ho, ³ kyerɛɛ mu, dii adanse sɛ, ɛsɛ sɛ Agyenkwa no hu amane na ɔsɔre fi awufo mu. Paulo kae se, “Saa Yesu a mereka ne ho asɛm akyerɛ mo yi ne Agyenkwa no.” ⁴ Nnipa no bi gye dii ma wodii Paulo ne Silas akyi. Saa ara na Helafo bebree a wɔsom Onyankopɔn

ne mmea mpanyin bi nso gye dii de wɔn ho bɔɔ wɔn ara ne no.

⁵ Yudafo mpanyin no anibere nti, wɔboaboa ahuhufo bi ano ma wɔbɔɔ twi faa kurow no mu kotwaa Yason fi ho hyiae, pɛɛ sɛ wɔn nsa ka Paulo ne Silas de wɔn brɛ mpanyin no. ⁶ Esiane sɛ wɔn nsa anka wɔn no nti, wɔtwee Yason ne anuanom bi de wɔn baa mpanyin no anim teɛteɛɛ mu se, “Saa nnipa a wɔma basabasa ba baabiara a wɔkɔ no aba yɛn kurow yi mu, ⁷ ama Yason agye wɔn atena ne fi. Wɔn nyinaa abu ɔhempɔn Kaesare mmara a ɔde ama yɛn sɛ yenni so no so, efise wɔka se ɔhene oforo bi wɔ hɔ a wɔfrɛ no Yesu.” ⁸ Saa aɛm yi hwanyan dɔm no ne kurow no mu mpanyin no. ⁹ Kurow no mu mpanyin no maa Yason ne anuanom no tuaa sika bi de dii wɔn akagyinamu ma wogyaa wɔn.

Paulo Ne Silas Kɔ Beroia

¹⁰ Ade sae ara pɛ, anuanom yi gyaa Paulo ne Silas kwan ma wɔkɔɔ Beroia. Wɔdui no, wɔkɔɔ Yudafo hyiadan mu. ¹¹ Na nnipa a wɔwɔ hɔ no nyɛ akyinnyegyefo te sɛ Tesalonikafo no. Wɔde ahosɛpɛw gyee aɛm no dii a daa na wosua Kyerɛwsɛm no pɛɛ sɛ wohu sɛ nkyerɛkyerɛ a Paulo kyerɛkyerɛ no yɛ nokware ana. ¹² Nnipa no mu bebree a Helafɔ mmea atitiriw ne mmarima ka ho no gyee nkyerɛkyerɛ no dii.

¹³ Bere a Yudafo a wɔwɔ Tesalonika no tee sɛ Paulo akɔka Onyankopɔn aɛm no wɔ Beroia no, wɔkɔɔ hɔ kɔhwanyan hɔfo no nso. ¹⁴ Enti ntɛm ara na anuanom no gyaa Paulo kwan sɛ ɔnkɔ mpoano, nanso Silas ne Timoteo de, wɔtenaa Beroia. ¹⁵ Nnipa a wokogyaa Paulo kwan no de no koduu Atene. Wɔresan akɔ Beroia no, Paulo kraa wɔn se wɔnka nkyerɛ Silas ne Timoteo sɛ wɔmmɛka ne ho ntɛm.

Paulo Wɔ Atene

¹⁶ Bere a Paulo retwɛn Silas ne Timoteo wɔ Atene no, ohuu ahoni pii wɔ kurow no mu. Eyi maa ne werɛ howee yiye. ¹⁷ Enti na ɔne Yudafo ne amanamanmufo a wɔsom Onyankopɔn no taa hyia wɔ hyiadan mu ma ɔkyerɛkyerɛ wɔn Onyankopɔn aɛɛm. Saa ara nso na daa na ɔne nkurɔfo gye akyinnye wɔ aguabɔbea ara ne no. ¹⁸ Afei, ɔne Epikurofo ne Stoikfo anyansafo bi nso gye akyinnye. Ebinom kae se, “Na dɛn na nnabrabani yi pɛ sɛ ɔkyerɛ yi?” Afoforo nso kae se, “Ɛyɛ sɛ ɔreka anyame afoforo bi ho aɛɛm.” Nea enti a wɔkaa eyi ne sɛ, na Paulo reka Yesu Kristo ne ne wusɔre ho aɛɛm. ¹⁹ Wɔde Paulo kɔɔ Areopago* bagua anim kae se, “Yɛpɛ sɛ yɛte nkyerɛkyerɛ foforo a worekyerɛkyerɛ yi ase, ²⁰ efisɛ nsɛm a woka no bi yɛ yɛn asom aɛɛm foforo, enti yɛpɛ sɛ wokyerɛkyerɛ yɛn mu yiye.” ²¹ Na Atenefo ne ahɔho a wɔwɔ hɔ no nni hwee yɛ sɛ wɔde wɔn adagyew nyinaa betie nsɛm foforo anaa wɔbɛka nsɛm foforo a wɔate no akyerɛ afoforo.

Paulo Aɛnka Wɔ Areopago

²² Paulo sɔre gyinaa Areopago bagua no anim kae se, “Atenefo, mihi sɛ moyɛ nnipa a mopɛ nyamesom yiye. ²³ Efisɛ mituu mpase faa mo kurow yi mu, na mihiu mmeae ahorow a mosom no, mihiu afɔremuka bi a wɔakyerɛw ho se,

Onyame a wonnim no no de.

Enti ade a munnim na mosɔre no, ɛno ho aɛɛm na mereka akyerɛ mo yi.

²⁴ “Onyankopɔn a ɔbɔɔ wiase ne nneɛma a ɛwɔ mu nyinaa no na ɔyɛɛ ɔsoro ne asase. Awurade no nte asɔredan a nnipa asi mu. ²⁵ Saa ara nso na biribiara a nnipa nam wɔn dwumadi so de bɛma no no nso ho nhia

* ^{17:19} Nkyerɛase ne “Ares koko.” Ares yɛ Helafo nyame a ogyina hɔ ma aprannaa ne ɔko.

no, efise ɔno na ɔma nnipa nkwa ne biribiara a ehia wɔn. ²⁶ ɔnam onipa baako so na ɔbɔɔ nnipa ahorow nyinaa de wɔn tenaa asase so. ɔno ankasa na ansa na ɔrebɛbɔ nnipa no, ɔhyehyɛɛ amanaman bere a wɔbɛsɔre ne bere a wɔbɛhwe ase. Saa ara na ɔhyehyɛɛ wɔn tenabea ahye nso. ²⁷ Ɛwɔ mu sɛ Onyankopɔn bɛn yɛn de, nanso ɔyɛ eyi sɛnea ɛbɛyɛ a nnipa bɛhwehwe n'akyi kwan atwiw abɛn no; ²⁸ sɛnea obi ka se, 'Ne mu na yɛte ase na yɛkeka yɛn ho' no. Saa ara na mo nnwontofo bi nso aka se, 'Yɛn nso yɛyɛ ne mma' no.

²⁹ "Ɛno de, sɛ yɛyɛ Onyankopɔn mma de a, ɛnsɛ sɛ yesuw sɛ Onyankopɔn tebea te sɛ ohoni bi a onipa de dwetɛ anaa sika anaa ɔbo ayɛ. ³⁰ Onyankopɔn buu n'ani guu bere a na nnipa nnim no no so, nanso afei de, ɔhyɛ nnipa nyinaa sɛ wɔntwe wɔn ho mfi akwammɔne so. ³¹ Efise wayi da bi ato hɔ a ɔnam onipa bi a wayi no no so bebu nnipa nyinaa atɛntrenee. ɔnam sɔre a ɔmaa saa onipa yi sɔre fii awufo mu no so adi adanse akyerɛ nnipa nyinaa."

³² Bere a nnipa no tee sɛ Paulo reka owusɔre ho asɛm no, ebinom dii ne ho fɛw, na afoforo nso kae se, "Yɛpɛ sɛ wosan ka saa asɛm no bio." ³³ Saa nsɛm a ɛkɔɔ so yi maa Paulo fii bagua no anim kɔɛ. ³⁴ Nanso, nnipa kakraa bi gyee no dii de wɔn ho bɔɔ no. Saa nnipa no mu bi ne Dionisio a ɔfra Areopagofɔ mu ne ɔbea bi a ne din de Damari ne afoforo bi.

18

Paulo Ɛɔ Korinto

¹ Eyinom akyi no, Paulo fii Atene kɔɔ Korinto. ² Ɛhɔ na ohyiaa Yudani bi a wɔfrɛ no Akwila a wɔwoo no wɔ Ponto a ɔne ne yere Priskila fi Italia aba hɔ a na ɛnkyɛɛ. Wofii Italia efisɛ na Roma hɛmpɔn Klaudio ahyɛ mmara

se Yudafo nyinaa mfi Roma asase so. ³ Paulo kɔtenaa wɔn nkyɛn ne wɔn yɛɛ adwuma, efisɛ na wɔn nyinaa nwen ntamadan. ⁴ Na Paulo kɔ hyiadan mu homeda biara kɔka asɛm no de pɛɛ sɛ anka ɔdan Yudafo ne Helafɔ no adwene ma wogyɛ di.

⁵ Bere a Silas ne Timoteo fii Makedonia bae no, Paulo de n'adagyew nyinaa kaa Awurade asɛm no, dii adanse kyerɛɛ Yudafo no se Yesu ne Agyenkwa no. ⁶ Bere a Yudafo no ampɛ sɛ wotie Paulo asɛnka, na wɔyeyaw no no, ɔde abufuw poroporow n'atade mu ka kyerɛɛ wɔn se, "Mo mmusu ngu mo atifi. Mo afɔbu nna me so. Efi nne de rekɔ, merekɔka asɛm no makyerɛ amanamanmufo."

⁷ Ofii hɔ kɔtenaa Amanamanmuni Nyamesomni bi a wɔfrɛ no Tito Yusto a ne fi bata hyiadan ho no nkyɛn. ⁸ Krispo a na ɔyɛ hyiadan mu panyin no ne ne fifo nyinaa gyee Awurade dii ma wɔbɔɔ wɔn asu. Saa ara na Korintɔfo bebree a wɔtee Awurade asɛm no nso gye dii ma wɔbɔɔ wɔn asu.

⁹ Da bi anadwo, Awurade ka kyerɛɛ Paulo wɔ anisoad-ehu mu se, "Nsuro! Mpa abaw! Kɔ so ara ka m'asɛm no, ¹⁰ efisɛ meka wo ho. Obiara rentumi nyɛ wo hwee, efisɛ nnipa pii wɔ kurow yi mu a wɔyɛ m'akyidifo." ¹¹ Paulo tenaa hɔ afe ne fa kyerɛkyerɛɛ Onyankopɔn asɛm no wɔ wɔn mu.

¹² Bere a Galio yɛ amrado wɔ Akaia no, Yudafo no sɔre tiaa Paulo kyeree no de no kɔɔ asennii, ¹³ kae se, "Saa onipa yi retu nkurɔfo aso sɛ wɔnkwati Yudafo mmara no mfa ɔkwan foforo so nsom Onyankopɔn."

¹⁴ Paulo yɛɛ sɛ ɔrebue n'ano akasa pɛ na Galio ka kyerɛɛ Yudafo no se, "Yudafo, sɛ mode asɛm foforo bi a ɛfa nsɛmmɔnedi anaa abususem ho na ɛbae a, anka mɛhwɛ na maka. ¹⁵ Nanso esiane sɛ ɛyɛ akyinnyegyɛ a ɛfa nsɛm, din ne mo mmara ho nti, mo ara monkɔhwɛ nka. Merenyɛ saa asɛm yi mu otemmufo." ¹⁶ Na ɔpam

wɔn fii asennii hɔ. ¹⁷ Afei dɔm no tow hyɛɛ Sostene a ɔyɛ hyiadan mu panyin no so, twee no kɔɔ asennii hɔ kɔbroo no, nanso Galio anka ho hwee.

Paulo San Kɔ Antiokia

¹⁸ Paulo tenaa Korinto kyɛɛ kakra ansa na ɔrekra anuanom no ma ɔne Priskila ne Akwila refi hɔ akɔ Siria. Esiane bɔ a na wahyɛ no nti, ansa na ɔrebɛkɔ no, ɔma woyii ne ti wɔ Kenkrea. ¹⁹ Woduu Efeso no, Paulo gyaw Priskila ne Akwila hɔ kɔɔ hyiadan mu ne Yudafo no kɔkasae. ²⁰ Wɔsrɛɛ no sɛ, sɛ obetumi a anka ɔntena wɔn nkyɛn nkyɛ kakra nanso wampene so. ²¹ Mmom, ɔrebefi hɔ no ɔka kyerɛɛ wɔn se, “Sɛ Onyankopɔn pɛ a mɛsan aba bio.” Na ofii hɔ kɔɔ Efeso. ²² Oduu Kaesarea no, ɔkɔɔ Yerusalem kokyiaa asafo no fii hɔ kɔɔ Antiokia.

²³ Odii nna kakra wɔ hɔ no, ofii hɔ kɔɔ Galati ne Frigia kɔhyɛɛ agyidifo a wɔwɔ hɔ no den.

Apolo Kasa Wɔ Efeso Ne Korinto

²⁴ Saa bere no ara mu na Yudani bi a wɔfrɛ no Apolo a wɔwoo no wɔ Aleksandria* no kɔɔ Efeso. ɔyɛ obi a na n’ano atew na onim Kyerɛwsɛm no yiye. ²⁵ Esiane sɛ na wɔnam Awurade kwan so akyerɛkyerɛ no nti, na ɔde nnam kasa kyerɛkyerɛ nokwasɛm a efa Yesu ho no. Nanso na Yohane asubɔ no nko ara na onim. ²⁶ Ofii ase de nnam kasaa wɔ hyiadan no mu. Bere a Priskila ne Akwila tee asɛm a ɔreka no, wɔde no kɔɔ fie kɔkyerɛkyerɛ no Onyankopɔn asɛm no mu yiye.

²⁷ Bere a Apolo pɛɛ sɛ ɔkɔ Akaia no, agyidifo a wɔwɔ Efeso no hyɛɛ no nkuran, kyerɛw krataa kɔmaa agyidifo a wɔwɔ hɔ no se wonnye no. Bere a okodui no, ɔboaa

* ^{18:24} ɛwɔ Misraim. ɛhɔ na wɔkyerɛɛ Apam Dedaw ase kɔɔ Hela kasa mu. ɛno ne kuroɔn a ɛto so abien wɔ Roma Ahemman mu a na Yudafo dɔɔso wɔ hɔ.

wɔn a Onyankopɔn adom nti wɔabɛyɛ agyidifo no yiye. ²⁸ Ɔde ne nimdeɛ kyerɛɛ Onyankopɔn asɛm mu de tuu Yudafo no guu wɔ bagua mu, nam Kyerɛwɛɛm no so daa no adi pefee sɛ Yesu ne Agyenkwa no.

19

Honhom Kronkron Ba Adiyifo Bi So

¹ Bere a Apolo wɔ Korinto no, Paulo tuu kwan faa ɔmantam no atifi koduu Efeso. Eho na ohuu agyidifo bi ² bisaa wɔn se, “Bere a mugye dii no, munyaa Honhom Kronkron no ana?”

Wobuaa no se, “Yɛntee mpo da sɛ Honhom Kronkron bi wɔ baabi.”

³ Paulo bisaa wɔn bio se, “Eno de na asubɔ bɛn na wɔbɔɔ mo?”

Wobuae se, “Asubɔ a Yohane kaa ho asɛm no.”

⁴ Paulo ka kyerɛɛ wɔn se, “Yohane asubɔ no yɛ asu a wɔbɔ wɔn a wɔsakra wɔn adwene. Ɔka kyerɛɛ Israelfo no se, wonnye onipa a odi n’akyi a ɔreba a ɔne Yesu no nni.” ⁵ Wɔtee saa asɛm no, wɔma wɔbɔɔ wɔn asu wɔ Awurade Yesu din mu. ⁶ Paulo de ne nsa guu wɔn so no, Honhom Kronkron baa wɔn so ma wɔkaa kasa foforo, hyɛɛ nkɔm. ⁷ Na wɔn dodow bɛyɛ mmарima dumien.

⁸ Paulo de nnam kyerɛkyerɛɛ Onyankopɔn Ahenni no ho asɛm wɔ hyiadan mu asram abiɛsa pɛɛ sɛ ɔsakra nnipa no adwene. ⁹ Nanso nnipa no mu bi pirim wɔn koma, annye anni, kasa tiaa asɛm no wɔ atiefɔ no anim. Enti Paulo fii ho de agyidifo no kaa ne ho kɔe. Na Paulo kyerɛkyerɛ wɔ obi a wɔfrɛ no Tirano asuadan mu daa. ¹⁰ Saa nkyerɛkyerɛ yi kɔɔ so mfe abien; enti emaa nnipa a na wɔwɔ Asia mantam mu a Yudafo ne Helafa ka ho no tee Awurade asɛm no.

Skewa Mma Baason No

¹¹ Onyankopɔn nam Paulo so yɛɛ anwonwade akɛsɛakɛsɛ, ¹² maa mpo ne nnukuu ne n'atade nsɛnanim a wɔde guu nnipa so no tumi saa nyarewa, tuu ahonhommɔne nso.

¹³ Yudafo bi a wɔnam asumansɛm so tu ahonhommɔne pɛɛ sɛ wɔde Awurade Yesu din tu ahonhommɔne. Wɔkankye kyerɛɛ ahonhommɔne no se, "Meka Yesu a Paulo ka ne ho asɛm no sɛ, muntu mfi ne mu!" ¹⁴ Yudafo sɔfɔpanyin bi a na ne din de Skewa no mma baason na na wɔyɛ eyi. ¹⁵ Honhommɔne no buae se, "Minim Yesu, na minim Paulo; na mo nso mo ne hefo?" ¹⁶ Afei ɔbarima a honhommɔne ahyɛ no ma yi tow hyɛɛ wɔn so, pirapiraa wɔn ma wɔde adagyaw guan fii fie hɔ.

¹⁷ Yudafo ne amanamanmufo a wɔte Efeso no tee asɛm no, wɔbɔɔ hu na woyii Awurade Yesu ayɛ. ¹⁸ Agyidifo no mu bebree baa bagua mu bɛkaa wɔn bɔne ne wɔn kokoamsɛm. ¹⁹ Wɔn mu nkonyaayifo pii de wɔn nkonyaayi nhoma ba maa wɔhyew wɔ nnipa no nyinaa anim. Wobuu nhoma a wɔhyew no bo no na eyɛ nnwetɛbona mpem aduonum. ²⁰ Saa anwonwade ahorow yi maa Onyankopɔn asɛm no trɛw tumi so.

Basabasa A Esii Efeso

²¹ Eyinom nyinaa akyi no, Paulo yɛɛ n'adwene sɛ ɔbɛfa Makedonia ne Akaia akɔ Yerusalem. ɔkae se, "Midu Yerusalem a, akyiri no mɛkɔ Roma nso." ²² Paulo somaa Timoteo ne Erasto a wɔyɛ n'abofo no dii n'anim kan kɔɔ Makedonia, nanso ɔno de, ɔtenaa Asia kyɛɛ kakra.

²³ Saa bere yi ara mu na basabasa a emu yɛ den a ɛfa Awurade asɛm no ho no sii wɔ Efeso. ²⁴ Dwetɛdwumfo bi a wɔfrɛ no Demetrio yɛɛ Artemi abosonnan sɛso. N'adwuma no maa n'adwumayɛfo nyaa wɔn ho sɛɛ tam. ²⁵ ɔfrɛfrɛɛ n'adwumayɛfo no ne wɔn a wodi saa dwuma ahorow no ara bi no ka kyerɛɛ wɔn se, "Anuanom, munim

sɛ yɛn ahonya nyinaa gyina saa dwumadi yi so. ²⁶ Mo ara moahu na moate dwuma a saa Paulo yi redi. Ɔka se anyame a nnipa de wɔn nsa ayɛ no nyɛ anyame biara. Ɖnam saa asɛm yi so adan nnipa bebree adwene wɔ Efeso ha ne Asia nyinaa. ²⁷ Sɛ yɛanhwɛ no yiye a, yɛn adwuma yi begye dimmɔne. Saa ara na obiara remfa ɔbosom Artemi a wɔsom no wɔ Asia ne wiase nyinaa no nyɛ hwee bio na n'anim agu ase.”

²⁸ Nnipadɔm no tee saa asɛm a Demetrio kae no, wɔn bo fuw fii ase yɛɛ basabasa, tɛtɛɛɛ mu se, “Efeso Artemi yɛ kɛsɛ!” ²⁹ Basabasayɛ no trɛw wɔ kurow no mu nyinaa. Dɔm no kyeree Makedoniafo baanu a wɔn din de Gaiο ne Aristarko a na wɔne Paulo retu kwan no de wɔn kɔɔ aguabɔbea. ³⁰ Paulo pɛɛ sɛ anka ɔkɔ aguabɔbea hɔ kohyia dɔm no, nanso asuafo no amma no kwan. ³¹ Ɖmantam no mu mpanyimfo bi a na wɔyɛ Paulo nnamfo no soma kɔsrɛɛ no sɛ ɔnkɔ aguabɔbea hɔ.

³² Nhyiamu yi yɛɛ basabasa; nnipa no mu bi tɛtɛɛɛ mu kaa nsɛm bi na ebinom nso tɛɛɛ mu kaa nsɛm foforo bi, efisɛ na wɔn mu dodow no ara nnim asɛm ko a ɛde wɔn abehyia mu. ³³ Yudafo no piapiaa Aleksandro kogyinaa dɔm no anim sɛ ɔnkasa. Eyi maa nnipa no bi susuw sɛ Aleksandro nti na wɔahyia hɔ. Afei Aleksandro nyamaa dɔm no pɛɛ sɛ ɔkasa yi ɔno ne ne nkurɔfo ano. ³⁴ Dɔm no huu sɛ Aleksandro yɛ Yudani no, wɔtɛtɛɛ mu nnɔnhwerew abien se, “Efeso Artemi yɛ kɛsɛ!”

³⁵ Kurow no sohwefo no bɔɔ mmɔden maa dɔm no tɛm dinn. Afei ɔkasa kyerɛɛ wɔn se, “Efeso mmarima, obiara nim sɛ Efeso kurow yi na ɛhwɛ Artemi hyiadan ne ohoni a efi ɔsoro beduruu no so. ³⁶ Obiara rentumi nnye eyi ho akyinnye enti monyɛ komm, monnyɛ basabasa biara. ³⁷ Mode saa nnipa yi aba ha wɔ bere a wonwɔiaa biribiara mfii yɛn hyiadan mu, nkaa asɛmmɔne biara ntia

yɛn nyame no. ³⁸ Sɛ Demetrio ne adwumfo a wɔka ne ho no wɔ obi ho asɛm bi a, asennii ne mpanyin wɔ hɔ, wɔmfafa mmɛto gua. ³⁹ Nanso sɛ mowɔ biribi foforo bi ka a, ɛsɛ sɛ ɔmanfo hyia na wɔfa mmara kwan so ka ho asɛm. ⁴⁰ Sɛ yɛanhwɛ yiye a, wɔbɛka se saa nnɛ basabasayɛ yi fi yɛn. Saa basabasayɛ yi ho nhia. Sɛ wobisa yɛn ho asɛm a, yɛrennya anoyi biara.” ⁴¹ ɔkasa wiei no, otuu gua no.

20

Paulo Fi Efeso

¹ Basabasayɛ yi akyi no, Paulo frɛɛ asuafo no kaa nɛm de hyɛɛ wɔn nkuran, kraa wɔn fii hɔ kɔɔ Makedonia. ² Okyinkyin faa amantam no mu, tuu asuafo no fo de hyɛɛ wɔn nkuran. Afei obeduu Hela. Odii hɔ asram abiɛsa. ³ Bere a ɔresiesie ne ho akɔ Siria no, ɔtee sɛ Yudafo no abɔ ne ho pɔw; enti ɔsan n'akyi kɔfaa Makedonia kɔɛ. ⁴ Piro a ofi Beroia no ba Sopater ne Paulo na wɔkɔɛ. Wɔn a wɔka ne ho kɔɛ no nso bi ne Aristarko ne Sekundo a wofi Tesalonika ne Gaio a ofi Derbe ne Timoteo ne Tihiko ne Trofimo a wofi Asiaman mu no. ⁵ Saa nnipa yi dii kan kɔtwɛn yɛn wɔ Troa. ⁶ Yedii Apiti Afahyɛ no wiei no, yefii Filipi, na nnaanum akyi no, yɛkɔtoɔ wɔn wɔ Troa, dii nnaawɔtwe wɔ hɔ.

Paulo Nyan Eutiko

⁷ Nnaawɔtwe no mu da a edi kan no, yehyiaa mu sɛ anuanom, didii. Esiane sɛ na ade kye a Paulo befi kurow no mu no nti, ɔkasa kyerɛɛ anuanom no kosii ɔdasu mu. ⁸ Na akanea pii wɔ abansoro dan a wɔahyia wɔ hɔ no mu. ⁹ Bere a Paulo rekasa no, na aberante bi a wɔfrɛ no Eutiko te mfɛnsere ano retɔ nko. ɔdaa hatee ma ofii abansoro dan a ɛto so abiɛsa no so bɛhwee fam. Wɔmaa no so no na wawu. ¹⁰ Paulo sian baa fam, kobutuw no so, maa no so kae se, “Munnsuro, efisɛ onwuu ɛ!” ¹¹ Afei ɔsan foro kɔɔ abansoro no so kobubuu brodo ne asuafo no dii. Paulo

toaa ne kasa no so kosii adekyee ansa na ɔregyaw wɔn ho. ¹² Anuanom no de anigye de aberante a wonyan no no kɔɔ fie.

Paulo Ɔɔ Mileto

¹³ Yɛde hyɛn dii kan kɔɔ Aso sɛ yɛrekɔfa Paulo wɔ ho, efisɛ na waka akyerɛ yɛn se ɔrefa fam akɔ ho. ¹⁴ ɔbɛkaa yɛn ho wɔ Aso na yɛne no toaa so kɔɔ Mitilene. ¹⁵ Ade kyee no, yekoduu Kio. Ne nnaanuu so no yeduu Samo na n'adekyee no, yekoduu Mileto. ¹⁶ Esiane sɛ na Paulo ho pere no sɛ onyae a anka obedu Yerusalem akodi Pentekoste Afahyɛ no wɔ ho no nti, ɔyɛɛ n'adwene sɛ ɔrennyina Efeso, sɛnea ɛbɛyɛ a ɔrenkyɛ wɔ Asia.

¹⁷ Paulo soma fii Mileto kɔɔ Efeso kɔka kyerɛɛ asafo mpanyimfo no se wonhyia no. ¹⁸ Wɔbae no, ɔka kyerɛɛ wɔn se, “Efi da a edi kan a mebaa Asia no, munim ɔkwan a mefaa so ne mo tenae. ¹⁹ ɛwɔ mu sɛ ɛnam Yudafo no pɔwbɔ so ma mihuu amane bebreɛ de, nanso mede ahobrease ne nusu yɛɛ m'adwuma sɛ Awurade somfo. ²⁰ Munim sɛ bere a na merekyerɛkyerɛ mo wɔ gua mu ne afi mu no, mamfa biribiara a so bɛba mo mfaso no anhintaw mo. ²¹ Mebɔɔ Yudafo ne amanamanmufɔ no kɔkɔ sɛ wɔntwe wɔn ho mfi wɔn bɔne ho na wɔmfɔ wɔn ho mma Onyankopɔn, na wonnye Yesu Kristo nni.

²² “Afei esiane sɛ Honhom Kronkron ahyɛ me no nti, merekɔ Yerusalem a minnim asɛm a ɛbɛto me wɔ ho. ²³ Nea minim ara ne sɛ kuropɔn biara a mɛkɔ so no, Honhom Kronkron bɔ me kɔkɔ sɛ wɔde me bɛto afiasɛ na mahu amane. ²⁴ Sɛnea ɛbɛyɛ a metumi adu botae a esi m'anɛm no ho na mawie dwuma a Awurade Yesu de maa me se menka Onyankopɔn dom ho asɛmpa no nti, mammu me kra sɛ ade a ɛsom bo.

²⁵ “Minim sɛ mo a maka Onyankopɔn ahenni no ho asɛm akyerɛ mo no mu biara renhu me bio. ²⁶ ɛno nti nɛɛ, mereka akyerɛ mo se, sɛ ɛba sɛ mo mu bi yera a, na emfi

me. ²⁷ Efise mamfa Onyankopɔn aSEM no mu biribiara anhintaw mo. ²⁸ Monhwe mo ho so ne nguankuw a Honhom Kronkron de wɔn ahye mo nsa se ahwefo no yiye. Monhwe wɔn yiye, efise Onyankopɔn de ne Ba no mogya na agye wɔn. ²⁹ Minim se me kɔ akyi no, atoro akyerɛkyerɛfo a wɔn ho ye hu se mpataku bewura mo mu abesee mo. ³⁰ Bere bi beba a mo mu ebinom besɔre, nam atoro so atwe asuafo no mu bi adi wɔn akyi. ³¹ Eno nti monna mo ho so! Monkae se, mfirihya abiɛsa a midii wɔ mo nkyen no, menam amanehunu ne yaw mu tuu mo fo awia ne anadwo.

³² “Afei mede mo hye Onyankopɔn ne ne dom nsem a etumi hye mo gyidi den na ema munya n’agyapade a wasiesie ama ahotefo no nsa. ³³ M’ani ammere obi dwete anaa sika anaa ntama. ³⁴ Mo ara mudi adanse se, me nsa ano adwuma so na menam mehwɛe me ho ne wɔn a wɔka me ho no. ³⁵ Mede m’abrabɔ aye nhweso akyerɛ mo se, ese se yeyere yen ho ye adwuma de boa ahiafo na yekae se, Awurade Yesu ankasa kae se, ‘ɔma mu wɔ nhyira sen ogye.’”

³⁶ Paulo kasa wiei no, ɔne wɔn nyinaa buu nkotodwe bɔɔ mpae. ³⁷ Wɔn nyinaa sui, bam no, maa no nanteyiye. ³⁸ Nea eyee wɔn awerɛhow koraa ne aSEM a ɔka kyerɛe wɔn se wɔrenhu no bio no. Afei wɔn nyinaa kogyaa no hyen no mu.

21

Paulo Kɔ Yerusalem

¹ Yene Efeso asafo mpanyimfo no dii ntetewmu no, yesii mu nam asu ani tee kɔɔ Ko. Ade kyee no, yekoduu Rodo na yefii hɔ kɔɔ Patara. ² Yenyaa hyen bi a ɛrekɔ Foinike kɔtenaa mu kɔe. ³ Yeduu baabi a yen ani tua Kipro no, yetwaa ho wɔ benkum fam kɔɔ Siria. Yesii fam wɔ Tiro, efise na ehɔ na wɔrekoyi hyen no mu nneɛma.

⁴ Yehuu asuafo bi wɔ hɔ tenaa wɔn nkyɛn dii nnaawɔtwe. Asuafo no nam Honhom Kronkron adiyi so bɔɔ Paulo kɔkɔ sɛ ɔnkɔ Yerusalem. ⁵ Nanso bere duu sɛ ɛsɛ sɛ yefi hɔ no, yegyaw wɔn hɔ kɔɛ. Asuafo no nyinaa ne wɔn yerenom ne wɔn mma kogyaa yɛn kwan koduu mpoano. Yeduu hɔ no yɛn nyinaa buu nkotodwe bɔɔ mpae. ⁶ Afei yɛkrakraa yɛn ho yɛn ho wiei no, yɛkɔtenaa hyɛn no mu maa wɔn nso san kɔɔ fie.

⁷ Yefi Tiro no, yɛtoaa yɛn akwantu no so faa nsu ani koduu Ptolemai. Yeduu hɔ no yekokyiaa asuafo a wɔwɔ hɔ no dii wɔn nkyɛn da koro. ⁸ Yefii hɔ n'adekyee so kɔɔ Kaesarea kɔtenaa ɔsɛmpakafo Filipino a na ɔka mmarima baason a woyii wɔn wɔ Yerusalem no ho no fi. ⁹ Na Filipino wɔ mmabea baanan a wɔnwaree ɛ, na wɔhyɛ nkɔm.

¹⁰ Yɛtenaa hɔ kyɛɛ kakra no, odiyifo bi a wɔfrɛ no Agabo fii Yudea baa hɔ. ¹¹ ɔbaa faako a yɛwɔ no, ɔfaa Paulo abɔso de kyekyeree ne nan ne ne nsa kae se, “Asɛm a Honhom Kronkron ka ni, ‘Sɛnea Yudafɔ a wɔwɔ Yerusalem no bɛkyekyere onipa a abɔso yi yɛ ne dea no, na wɔde no ahyɛ amanamanmufo no nsa ni!’”

¹² Yɛtee saa asɛm no, yɛne wɔn a na yɛne wɔn wɔ hɔ no nyinaa srɛɛ Paulo sɛ ɔnnkɔ Yerusalem. ¹³ Na ɔka kyerɛɛ wɔn se, “Osu a musu de rehyɛ me awerɛhow yi ase ne dɛn? Me de, masiesie me ho sɛ ɛnyɛ kyekyere a wɔbɛkyekyere me wɔ Yerusalem no na misuro, na sɛ etwa sɛ miwu ma Awurade Yesu a, mewu.” ¹⁴ Yɛkae kae a wampene no yegyae kae se, “Nea Awurade pɛ na ɛnyɛ.”

¹⁵ Nna bi akyi no, yɛboaboa yɛn ho fii hɔ kɔɔ Yerusalem. ¹⁶ Kaesarea asuafo no bi ne yɛn kɔɛ. Yeduu hɔ no, yɛkɔsoɛɛ Mnason a ofi Kipro a ogyee Yesu Kristo dii akyɛ no fi.

¹⁷ Yeduu Yerusalem no, asuafo a wɔwɔ hɔ no nyinaa gyee yɛn ɔfɛw so. ¹⁸ Ade kyee no, Paulo ne yɛn kokyia Yakobo ne Yerusalem asafo no mu mpanyimfo. ¹⁹ Nkyia no akyi no, Paulo kaa biribiara a Onyankopɔn nam ne som no so ayɛ wɔ amanamanmufo no mu no kyerɛɛ wɔn.

²⁰ Wotiee Paulo amanneɛbɔ no wiei no, wɔhyɛɛ Onyankopɔn anuonyam. Na wɔka kyerɛɛ no se, “Onua, w’ankasa wudi adanse sɛ Yudafo mpempem na na wɔabɛyɛ asuafo a wɔn nyinaa nso di yɛn mmara no so. ²¹ Saa nnipa yi ate sɛ wutia Mose mmara no ne Yudafo amanne; ɛne sɛ, wokyerɛkyerɛ Yudafo a wɔte amanamanmufo no mu se wonntwa wɔn mma twetia na wonnni yɛn amanne nso so. ²² Nea ɛbɛyɛ biara, wɔbɛte sɛ woaba ha. Enti yɛbɛyɛ no dɛn? ²³ Yɛ nea yɛrebɛka akyerɛ wo yi. Mmarima baanan bi wɔ yɛn nkyɛn ha a, wɔaka ntam. ²⁴ Wo ne wɔn nkɔ na munkodwira mo ho na tua ho ka ma wɔn sɛnea ɛbɛyɛ a, wobetumi atwitwa wɔn tinwi. Eyi bɛma obiara ahu sɛ nsem a wɔte faa wo ho no mu biara nyɛ nokware, efisɛ w’ankasa mpo wudi Mose mmara no so. ²⁵ Amanamanmufo a wɔabɛyɛ asuafo no de, wɔakyerɛw akɔma wɔn akyerɛ gyinae a yɛasi sɛ, wonnni aduan biara a wɔde abɔ afɔre ama abosom; wonnni mogya; wonnni aboa biara a wɔantwa ne mene ansa na owui; na afei nso wɔntwe wɔn ho mfi aguamammɔ ho.”

²⁶ Ade kyee no, Paulo ne mmarima no kodwiraa wɔn ho. Ɔne wɔn kɔɔ asɔredan mu kɔkyerɛɛ da a wobewie wɔn ahodwira no ne da a wɔbɛbɔ afɔre ama wɔn mmaako mmaako.

Wɔkyere Paulo

²⁷ Nnanson no reyɛ atwam no, Yudafo bi a wofi Asia huu Paulo wɔ asɔredan no mu. Wɔhwanyan nnipa a wɔwɔ hɔ no nyinaa ma wɔkyeree Paulo. ²⁸ Wɔtɛtɛɛɛ

mu se, “Israel mmarima, monsɔre mmeboa yɛn! Oyi ne ɔbarima a baabiara a ɔbɛkɔ no ɔnam ne nkyerɛkyerɛ so tia Israelfo, Mose mmara ne asɔredan yi. Mpo ɔde amanamanmufo bi aba ha de agu Kronkronbea ha ho fi.”

²⁹ Nea enti a wɔkaa saa aɛm yi ne sɛ, na wɔahu Paulo ne Efesoni Trofimo wɔ kurom hɔ, enti na wosusuw sɛ Paulo de no akɔ asɔredan mu hɔ.

³⁰ Wɔtee saa no, kurow mu no nyinaa bɔɔ twi kɔkyeree Paulo, twee no fii asɔredan no mu hɔ. Wɔtotoo asɔredan no apon no nyinaa mu ntɛm so. ³¹ Bere a dɔm no pɛɛ sɛ wokum Paulo no, obi kɔka kyerɛɛ Roma asraafo sahene no se basabasa asi Yerusalem. ³² Amono mu hɔ ara ɔsahene no ne asraafo mpanyin bi ne asraafo bi de ahoɔhare kɔɔ nea dɔm no ahyia hɔ. Bere a nnipa no huu no ne asraafo no, wogyaae Paulo hwe.

³³ ɔsahene no kosoo Paulo mu, kyerɛɛ sɛ wɔmfa nkɔnsɔnkɔnsɔn abien ngu no. Afei obisae se, “Hena ne saa ɔbarima yi? Bɔne bɛn na wayɛ?” ³⁴ Nnipa no ano antumi ankɔ bɛnkoro; ebinom ka sɛɛ a, na afoforo nso aka sɛɛ. Saa basabasa yi amma ɔsahene no antumi anhu aɛm pɔtee a asi. Eno nti, ɔhyɛɛ n’asraafo no sɛ wɔmfa Paulo nkɔ aban mu. ³⁵ Wɔde Paulo duu atrapoe no ano no, dɔm no bɔ toaa no enti asraafo no maa no so kɔɛ. ³⁶ Dɔm no tu dii wɔn akyi teɛteɛɛ mu se, “Munkum no!”

Paulo Yi Ne Ho Ano

³⁷ Wɔde Paulo rekɔ aban mu no, obisaa ɔsahene no se, “Mesrɛ wo, metumi aka aɛm bi akyerɛ wo ana?”

ɔsahene no nso bisaa no se, “Enti, wote Hela kasa? ³⁸ ɛnyɛ wo ne Misraimni a da bi ofii basabasayɛ ase dii mmarima awudifo mpem anan anim kɔɔ sare so no?”

³⁹ Paulo buaa no se, “Meyɛ Yudani a wɔwoo me wɔ Tarso; Kilikia kurow a agye din no mu nipa ne me. Mesrɛ wo, ma me ho kwan na me ne nnipa no nkasa.”

⁴⁰ Ɔsahene no maa Paulo kwan ma ogyinaa atrapoe no so nyamaa nnipa no. Wɔyɛɛ komm no, Paulo kasa kyerɛɛ wɔn wɔ Arameike kasa mu se:

22

¹ “Anuanom ne agyanom, muntie m’anoyi yi.”

² Wɔtee sɛ ɔka Arameike no, wɔyɛɛ komm koraa.

Paulo toaa so se, ³ “Meyɛ Yudani a wɔwoo me wɔ Tarso a ɛwɔ Kilikia. Wɔtetew me wɔ Yerusalem wɔ Gamaliel nan ase. Misuaa sɛnea wodi Yudafo mmara ne wɔn amanne so pɛpɛɛpɛ. Mebɔɔ mmɔden sɛ biribiara a meyɛ no, mede bɛhyɛ Onyankopɔn anuonyam sɛnea mo nyinaa nso reyɛ nnɛ yi. ⁴ Metaa nnipa a wodi Awurade aɛm so no nyinaa kunkum wɔn. Mekyeree mmea ne mmarima de wɔn guu afiase. ⁵ Ɔsɔfopanyin ne agyinatufɔ no nyinaa di me adanse sɛ, aɛm a mereka yi yɛ nokware. Wɔn nkyɛn mpo na migyee tumi nhoma sɛ mede rekɔma anuanom Yudafo a wɔwɔ Damasko no. Saa nhoma no na anka megyina so makyekyere nnipa a wodi Awurade aɛm so no agu wɔn nkɔnsɔnkɔnsɔn, de wɔn aba Yerusalem na wɔatwe wɔn aso.

⁶ “Owigyinae a mereyɛ adu Damasko no, mpofirim na hann bi twa faa me ho. ⁷ Mitwa hwee fam, na metee nne bi a ɛrebisa me se, ‘Saulo! Saulo! Adɛn nti na wotaa me?’

⁸ “Mibisae se, ‘ɛyɛ wo hena, Awurade?’

“Nne no buaa me se, ‘ɛyɛ me Nasareni Yesu a wotaa me no.’ ⁹ Nnipa a na wɔne me nam no huu hann no de, nanso wɔante nne a ɛkasa kyerɛɛ me no.

¹⁰ “Mibisae se, ‘Dɛn na menyɛ, Awurade?’

“Awurade ka kyerɛɛ me se, ‘Sɔre na kɔ Damasko, na hɔ na mɛkyerɛ wo biribiara a mepɛ sɛ woyɛ.’ ¹¹ Hann no hyɛɛn ano den no maa m’ani furae enti nnipa a na me ne wɔn rekɔ no susoo me nsa de me kɔɔ Damasko.

¹² “Na Onipa bi a wɔfrɛ no Anania a odi Mose mmara so a na Yudafo nyinaa di no ni no te Damasko hɔ. ¹³ Ɔbaa

me nkyen bekae se, ‘Onua Saulo, hu ade bio!’” Na ho ara m’ani buei.

¹⁴ “Ɔka kyerɛɛ me se, ‘Yɛn nenanom Nyankopɔn ayi wo sɛnea ɛbɛyɛ a wobɛyɛ n’apɛde na woahu ɔtreneeni no, na wobɛte n’ankasa ne nne sɛ ɛkasa kyerɛ wo. ¹⁵ Wubedi adanse afa biribiara a woahu na woate wɔ Awurade ho no akyerɛ nnipa nyinaa. ¹⁶ Afei, dɛn na woretwɛn bio? Sɔre na ma wɔmmɔ wo asu nhohoro wo bɔne wɔ Yesu din mu.’

Wɔsoma Paulo Amanamanmufo Nkyɛn

¹⁷ “Mesan kɔɔ Yerusalem na merebɔ mpae wɔ asɔredan mu no, ¹⁸ mihuu Awurade wɔ anisoadehu mu na ɔka kyerɛɛ me se, ‘Yɛ ntɛm fi Yerusalem ha, efisɛ nnipa a wɔwɔ ha no rentie adanse a wudi fa me ho no.’

¹⁹ “Mekae se, ‘Awurade, wɔn nyinaa nim pefee sɛ mekɔɔ hyiadan mu kɔkyekyeree asuafo boroo wɔn. ²⁰ Saa ara na bere a wokum wo dansefo Stefano no, na mewɔ ho bi. Mepeneɛ ne kum no so, hwɛɛ awudifo no ntama so.’

²¹ “Awurade ka kyerɛɛ me se, ‘Sɔre na kɔ, efisɛ mɛsoma wo akɔ akyirikyiri, amanamanmufo nkyɛn!’”

²² Bere a Paulo kae se wɔasoma no amanamanmufo nkyɛn pɛ na dɔm no fii ase teɛteɛɛ mu dennen se, “Munkum no! Ɔmfata sɛ ɔtena wiase!”

²³ Nnipa no kɔɔ so teɛteɛɛ mu, hugyaa wɔn ntama saw mfutuma tow petee wim. ²⁴ Roma sahene no hyɛɛ sɛ wɔmfɔ Paulo nkɔ aban mu nkɔbɔ no mmaa sɛnea ɛbɛyɛ a ɔbɛka nea enti a nnipa no nyinaa mpɛ sɛ wotie n’asɛm no. ²⁵ Bere a wɔkyekyeree no wiewe a wɔrebɛbɔ no mmaa no, Paulo bisaa ɔsraani panyin a na ogyina ho no se, “Mowɔ ho kwan sɛ mobɔ Romani a wonnii n’asɛm mmuu no fɔ no mmaa ana?”

²⁶ Bere a ɔsraani panyin no tee saa asɛm no, ɔkɔɔ ɔsahene no nkyɛn kobisaa no se, “Dɛn na wopɛ sɛ woyɛ yi? Onipa no yɛ Romani!”

²⁷ Afei ɔsahene no kɔɔ Paulo nkyɛn kobisaa no se, “Woyɛ Romani ana?”

Paulo buaa no se, “Yiw meɛ Romani.”

²⁸ ɔsahene no kae se, “Mituaa sika bebreɛ na mede tɔɔ me Roma maniyɛ.”

Paulo nso kae se, “Me de, wɔwoo me sɛ Romani.”

²⁹ Ntɛm ara, nnipa a na wɔrebebisa Paulo nsɛm no twee wɔn ho fii ne nkyɛn. ɔsafohene no tee sɛ Paulo yɛ Romani no, osuroe sɛ wama wɔagu Paulo nkɔnsɔnkɔnsɔn.

Paulo Gyina Asennii

³⁰ Esiane sɛ na ɔsafohene no pɛ sɛ ohu nea enti a Yudafɔ no asɔre atia Paulo no nti, ade kyee no, ɔhyɛ ma woyii Paulo fii nkɔnsɔnkɔnsɔn mu. ɔmaa asɔfo mpanyin ne agyinatufɔ no nyinaa hyiae. Afei ɔde Paulo kɔɔ se wɔnhwehwɛ n’asɛm no mu.

23

¹ Paulo hwɛɛ agyinatufɔ no dinn kae se, “Anuanom, ahonim pa na mede ayɛ Onyankopɔn adwuma de abesi nnɛ da yi.” ² Anania a na ɔyɛ ɔsɔfopanyin no hyɛɛ nnipa a na wogyina Paulo ho no se wɔmmɔ n’ano so. ³ Paulo ka kyerɛɛ no se, “Wo a wote sɛ ɔfasu a wɔasra ho fitaa, Onyankopɔn bebɔ wo. Wote ha de mmara rebu me atɛn, nanso wubu mmara no so hyɛ sɛ wɔmmɔ me!”

⁴ Nnipa a na wogyina Paulo nkyɛn no bisaa no se, “Sɛɛ na ɛsɛ sɛ wokasa kyerɛ Onyankopɔn sɔfopanyin?”

⁵ Paulo buaa wɔn se, “Anuanom, minnim sɛ ɔyɛ ɔsɔfopanyin. Kyerɛwsɛm no ka se, ‘Monnkasa ntia wɔn a wodi mo so.’”

⁶ Bere a Paulo huu sɛ nnipa no bi yɛ Sadukifo na bi yɛ Farisifo no, ɔteɛɛ mu wɔ agyinatufɔ no anim se, “Me nuanom, meɛ Farisini. M’awofo yɛ Farisifo. Gyidi a mewɔ wɔ awufosɔre mu no nti na migyina ha ama wɔredi

m'asem yi.” ⁷ Asem a Paulo kae yi maa ntawntaw sii Farisifo ne Sadukifo no ntam maa won mu kyee abien ⁸ efise na Sadukifo no nnye owusore, abofo ne honhom nni. Nanso Farisifo no de, wogyee saa nneema abiesaa no di.

⁹ Nteetee mu no koo so kosii se Kyerewsem no akyerakyerefo no mu bi a woye Farisifo no sore gyinaa ho kae se, “Yenhu bone biara a saa onipa yi aye! Ebia honhom anaa obofo na okasa kyere no!” ¹⁰ Akasakasa no mu yee den maa osafohene no suroo se anhwae a wobetetew Paulo mu; eno nti ohyee n'asraafo se, wonko nnipa no mu na wonkogyee Paulo mfi won nsam mfa no nko aban mu.

¹¹ Anadwo no, Awurade begyinaa Paulo nkyen ka kyere no se, “Nsuro! Senea woadi me ho adanse wo Yerusalem ha no, saa ara nso na kodi me ho adanse wo Roma.”

Woboo Paulo Ho Pow

¹² Ade kyee no, Yudafo bi hyia kaa ntam, dii nsew se worenidi na worennom nso kosi se wobekum Paulo. ¹³ Na saa nnipa no dodow bebore aduanan. ¹⁴ Afei wokoo asofo mpanyin ne mpanyin no nkyen koka kyere won se, “Yeaka ntam adi nsew se hwee renka yen ano kosi se yebekum Paulo. ¹⁵ Mo ne agyinatufu no nsoma nko Roma osafohene no nkyen nhye da nka se, moye se mubisa nea Paulo aye no mu yiye enti omma womfa no mmra mo anim. Ansa na wode no bedu ho no na yeakum no dedaw.”

¹⁶ Nanso Paulo wofaase bi tee pow a waboo no nti okoo aban mu ho koboo Paulo amannee.

¹⁷ Paulo frere asraafo mpanyin no mu baako ka kyere no se, “Wo ne aberante yi nko osahene no nkyen efise owo asem bi ka kyere no.” ¹⁸ Osraani panyin no ne aberante no koo osahene no nkyen.

Woduu hɔ no, ɔka kyerɛɛ ɔsahene no se, “Paulo a ɔda afiasɛ no asoma me sɛ memfa aberante yi mmehu wo na ɔwɔ asɛm bi ka kyerɛ wo.”

¹⁹ ɔsahene no soo aberante no nsa de no kogyinaa nkyɛn baabi bisaa no se, “Asɛm bɛn na wowɔ ka kyerɛ me?”

²⁰ Aberante no ka kyerɛɛ no se, “Yudafo mpanyin no abɔ pɔw sɛ ɔkyena wɔbɛhyɛ da abɛsrɛ wo na woama wɔde Paulo abrɛ agyinatufɔ no sɛ wɔrebɛbisa no ne nɛm no mu yiye. ²¹ Mma wɔnnaadaa wo. Efisɛ mmarima bɛboro aduanan bi a wɔaka ntam adi nsew sɛ wɔremfa hwee nka wɔn ano kosi sɛ wobɛnya Paulo akum no no bɛtetew no wɔ ɔkwan so. Nea wɔretwɛn ara ne sɛ wobɛma ho kwan.”

²² ɔsafohene no gyaa aberante no kwan ka kyerɛɛ no se, “Nka nkyerɛ obiara sɛ woabɛka asɛm biara akyerɛ me.”

Wɔde Paulo Kɔ Kaesarea

²³ ɔsahene no frɛɛ n’asraafo mpanyimfo baanu ka kyerɛɛ wɔn se, “Mompɛ asraafo ahannu ne apɔnkɔsotefo ne mpeawkurafo ahannu na mumfi ha anadwo nnɔnkron yi ara nkɔ Kaesarea. ²⁴ Mompɛ ɔpɔnkɔ mma Paulo na momfa no nkɔma Amrado Felike dwoodwo.”

²⁵ Afei, ɔsahene no kyerɛw nhoma a emu nɛm ka se:

²⁶ Me Klaudio Lisia a

Merekyerɛw wo Onuonyamfo Amrado Felike saa nhoma yi:

Kyia wo!

²⁷ Yudafo kyeree saa ɔbarima yi a anka wɔrekum no, nanso metee sɛ ɔyɛ Romani no, me ne m’asraafo kogyee no fii wɔn nsam. ²⁸ Mɛpɛɛ sɛ mihi bɔne ko a wayɛ, enti mede no kɔmaa wɔn agyinatufɔ no. ²⁹ Mihui sɛ ɔnyɛɛ biribiara a ɛsɛ sɛ wogyina so kum no anaasɛ

wɔde no to afiase. AseM a wɔka too ne so no fa wɔn mmara ho. ³⁰ Eno nti bere a metee se Yudafo bi abɔ ne ho pɔw se wɔbetew no akum no no, meyeɛ m'adwene se mede no bebɛre wo. Maka akyerɛ wɔn a wɔwɔ aseM bi ka tia no no se, wɔmmra w'anım mmɛka.

³¹ Asraafo no yeɛ biribiara a wɔhyɛɛ wɔn se wɔnye no. Anadwo no ara wɔde Paulo kɔɔ Antipatri. ³² Ade kyee no asraafo a wɔnam fam no san wɔn akyi, na wɔn a wɔte apɔnkɔ so no toaa so kɔɔ Kaesarea. ³³ Woduu no wɔde nhoma no maa Amrado no de Paulo hyɛɛ ne nsa. ³⁴ Amrado no kenkan nhoma no wiee no obisaa Paulo ɔman ko a ofi mu. ɔtee se ofi Kilikia no, ³⁵ ɔkae se, "Wɔn a wɔwɔ aseM bi ka tia wo no ba a na metie w'aseM." Afei ɔhyɛɛ se wɔmfa Paulo nkɔ Herode ahemfi na asraafo nweɛn no.

24

Wodi Paulo AseM Wɔ Felike Anim

¹ Nnaanum akyi no, ɔsɔfopanyin Anania ne mpanyimfo bi ne mmaranımfo bi a ne din de Tertulo kɔɔ Kaesarea. Woduu hɔ no, wɔkɔɔ Amrado Felike nkyɛn de nseM a wɔwɔ tia Paulo no too n'anım. ² Wɔfrɛɛ Tertulo ma ɔbɔɔ ne nkuro se, "Onuonyamfo! Esiane wo nimdeɛ ne w'akwankyerɛ pa nti efi bere a wobaa yi, nsakrae pa pii aba yeɛn man yi mu ama yeɛn ho atɔ yeɛn. ³ Baabiara a yeɛwɔ no yeɛka eyi ho aseM na yeɛn ani sɔ nea woaye ama yeɛn no da wo ase papaapa. ⁴ Mempo se meseɛ wo bere enti meseɛ wo se nya bere tiaa bi ma me na tie aseM a merebɛka afa saa ɔbarima yi ho no.

⁵ "Yeahu se saa ɔbarima yi ye ɔmammɔfo a ɔde basabasaye ba Yudafo nyinaa mu. ɔye Nasarefo fekuw no mu panyin. ⁶ ɔpɛɛ se ogu asɔredan no ho fi. Eno nti yeɛkyeree no yeɛ yeɛn adwene se anka yeɛbɛfa yeɛn mmara so abu no atɛn. ⁷ Nanso ɔsahene Lisia begyee no fii yeɛn

nsam abran so, ⁸ hyɛɛ sɛ wommedi n'asɛm wɔ w'anim. Sɛ wubisa no a, wo ara ankasa wubehu sɛ nsɛm a yɛreka afa ne ho no nyinaa yɛ nokware.”

⁹ Yudafo no nso foaa nsɛm a wɔkaa no so se ɛyɛ nokware.

Paulo Yi Ne Ho Ano

¹⁰ Amrado no maa Paulo kwan sɛ onyi ne ho ano no, Paulo buae se, “Minim sɛ woyɛɛ ɔman yi so otemmufo akyɛ, ɛno nti sɛ migyina w'anim reyi me ho ano a, minsuro. ¹¹ Sɛnea ebia woate no bɛyɛ nnaɸua dumien ni na mekɔɔ Yerusalem asɔredan mu sɛ merekɔsom. ¹² Yudafo a wɔde me baa ha yi anhu me sɛ me ne obi regye akyinnye wɔ asɔredan mu hɔ anaase meretu nnipa aso wɔ hyiadan mu anaa ɔman no mu baabiara. ¹³ Saa ara nso na wɔrentumi nkyerɛ sɛ, nsɛm a wɔreka ato me so yi nyinaa yɛ nokware. ¹⁴ Nanso migye to mu sɛ menam Awurade asɛm a Yudafo yi kasa tia no so som yɛn Agyanom Nyankopɔn. Na migye nsɛm a wɔakyerɛw wɔ Mose mmara no ne adiyifo nhoma no mu no nso di. ¹⁵ Mewɔ anidaso a saa nnipa yi nso wɔ wɔ Onyankopɔn mu sɛ da bi, nnipa pa ne nnipa bɔne nyinaa bɛsɔre aɸi owu mu no nso bi. ¹⁶ Eyi nti, da biara meɔ mmɔden sɛ mede ahonim pa bɛbɔ me bra wɔ Onyankopɔn ne nnipa anim.

¹⁷ “Mfe bebree akyi a mifii Yerusalem no, mesan baa hɔ sɛ mede ayɛyɛde rebrɛ me nuanom na mabɔ aɸɔre. ¹⁸ Bere a madwira me ho awie na migu so rebɔ aseda aɸɔre wɔ asɔredan no mu no, na nnipa a wɔde me baa ha yi huu me. Na matwitwa me tinwi sɛnea mmara no kyerɛ no. Saa bere no nso na dɔm biara nka me ho na basabasayɛ bi aba. ¹⁹ Saa bere no, na Yudafo bi a wofi Asiaman mu wɔ hɔ. Wɔn na sɛ anka wɔwɔ asɛm bi ka tia me a ɛsɛ sɛ wɔka. ²⁰ Sɛ saa nnipa a wɔwɔ ha yi nso nim asɛm bi

a wogyina so buu me fɔ wɔ agyinatufɔ no anim a wɔnka. ²¹ Asɛm baako pɛ na migyina wɔn anim no mekae. Saa asɛm no ne sɛ, ‘Gyidi a mewɔ wɔ awufosɔre no mu nti na migye di sɛ morebu me atɛn nnɛ.’”

²² Felike a na onim saa Awurade asɛm no yiye no tuu asɛm no hyɛɛ da, kae se, “Sɛ ɔsahene Lisia ba a na medi w’asɛm no.” ²³ ɔhyɛɛ ɔsraani panyin a na ɔhwɛ Paulo so no sɛ ɔmma wɔnwɛn no, nanso wɔmma no ahotɔ kakra. Na sɛ ne nnamfonom de biribiara a ɛho hia no no rebɛ no a, wɔmma ho kwan.

Paulo Gyina Felike Ne Drusila Anim

²⁴ Nna bi akyi no, Felike ne ne yere Drusila a ɔyɛ Yudani no bae. ɔsoma ma wɔkɔfrɛɛ Paulo brɛɛ no ma ɔbɛkaa gyidi a ɔwɔ wɔ Kristo Yesu mu no kyerɛɛ wɔn. ²⁵ Paulo reka trenee, ahohyɛso ne atemmuda ho asɛm no, Felike suroe, enti ɔkae se, “Kɔ! Akyiri no, sɛ minya adagyew a, mɛsoma abɛfrɛ wo.” ²⁶ Na Felike ani da so sɛ Paulo bɛma no sika na wagyaa no, ɛno nti na ɔma wɔtaa kɔfrɛ no ntiantia mu ba ne nkyɛn ne no bɔ nkɔmmɔ no.

²⁷ Mfe abien akyi no Porkio Festo besii Felike anan mu sɛ amrado. Esiane sɛ na Felike pɛ sɛ ɔsɔ Yudafo no ani no nti, ogyaw Paulo wɔ afiase hɔ.

25

Festo Di Paulo Asɛm

¹ Festo besii Felike anan mu sɛ amrado wɔ Kaesarea no, ne nnansa so no ɔkɔɔ Yerusalem. ² Asɔfo mpanyin ne Yudafo mpanyin no de nsɛm a wɔwɔ tia Paulo no bɛtoo n’anim. ³ Esiane sɛ na wɔabɔ Paulo ho pɔw sɛ wɔbɛtɛw no wɔ ɔkwan so akum no nti, wɔsrɛɛ no sɛ wɔmma wɔmfa no mmra Yerusalem. ⁴ Nanso Festo buaa wɔn se, esiane sɛ Paulo da afiase wɔ Kaesarea na ɛrenkyɛ biara ɔno ankasa bɛkɔ hɔ nti, ⁵ wɔn a wodi asɛm no anim no ne no nkɔ nkodi asɛm no wɔ hɔ.

⁶ Festo dii βεϑε nnaawɔtwe anaa nnaɖua du ansa na ɔresan aba Kaesarea. Obeduu adekyee no, ɔtenaa agua mu dii Paulo asεm. ⁷ Bere a Paulo beduu asennii hɔ no, Yudafo a wofi Yerusalem no twaa ne ho hyiae fii ase kekaa nsεm a εnyε nokware too no so.

⁸ Paulo yii ne ho ano se, “Minni biribiara ho fɔ, efise menkasa ntiaa Yudafo mmara; minguu asɔredan ho fi, na menkasa ntiaa Roma aban nso.”

⁹ Esiane sε na Festo pε sε ɔsɔ Yudafo no ani nti obisaa Paulo se, “Wopε sε mede wo kɔ Yerusalem kodi w’asεm wɔ hɔ ana?”

¹⁰ Paulo buae se, “Esiane sε ɔhempɔn Kaesare asennii na migyina nti, εha ara na εsε sε wodi m’asεm, bu me atεn efise menyεε Yudafo bɔne biara sεnea wo ara wunim no. ¹¹ Sε mabu mmara so anaa mayε biribiara a εno nti εsε sε wobu me kumfɔ a, minsuro. Nanso sε nsεm a saa Yudafo yi ka tia me no nyε nokware a, obiara rentumi mfa me mma wɔn. Miguan toa ɔhempɔn Kaesare.”

¹² Festo ne ne mpanyimfo tuu agyina wiei no, ɔka kyerεε Paulo se, “Esiane sε woaguan atoa ɔhempɔn Kaesare no nti yεde wo βεkɔ n’anim.”

Paulo Ho Nkɔmmɔdi

¹³ Nna bi akyi no, ɔhene Agripa ne Berenike baa Kaesarea βεmaa Festo akwaaba. ¹⁴ Wɔwɔ hɔ no, Festo ne ɔhene Agripa dii Paulo asεm no ho nkɔmmɔ. Festo ka kyerεε ɔhene no se, “ɔbarima bi wɔ ha a Felike gyaw no sε odeduani; ¹⁵ na mekɔɔ Yerusalem no, Yudafo asɔfo mpanyimfo ne mpanyin kaa nsεm bi tiaa no sε minnyina so mmu no kumfɔ.

¹⁶ “Nanso meka kyerεε wɔn se, Roma mmara mma ho kwan sε wobu obi fɔ wɔ bere a wonnii n’asεm ε, enti wɔmma no kwan na onyi ne ho ano wɔ asεm a wɔka tia no no ho. ¹⁷ Wɔbae no mansεε bere koraa na ade

kyee no, mehyɛɛ sɛ wɔmfɔ no mmra na minni n'asɛm. ¹⁸ Nanso wɔanka nsɛm a misusuwii no mu biara anto no so. ¹⁹ Nsɛm a wɔkaa no fa wɔn nyamesom ne ɔbarima bi a wɔfrɛ no Yesu a owui nanso Paulo ka se ɔte ase no ho. ²⁰ Esiane sɛ na asɛm no kyere m'adwene nti, mibisaa Paulo sɛ ɔpɛ sɛ mikodi n'asɛm wɔ Yerusalem ana? ²¹ Nanso Paulo guan toaa ɔhempɔn Kaesare. Enti mesan ma wɔde no kɔtoo afiase kosi bere a metumi de no akɔ ɔhempɔn Kaesare anim.”

²² ɔhene Agripa ka kyereɛ Festo se, “Mepɛ sɛ m'ankasa mitie n'anom asɛm.”

Festo ka kyereɛ no se, “ɔkyena mede no bɛba na woatie n'anom asɛm.”

Paulo Gyina ɔhene Agripa Anim

²³ Ade kyee no ɔhene Agripa ne Berenike hyehyɛɛ wɔn ho de ahokeka ne asraafo mpanyimfo ne kurow no mu mpanyin kɔɔ asennii hɔ. Festo hyɛ ma wɔde Paulo baa asennii hɔ. ²⁴ Festo kae se, “ɔhene Agripa ne mo a moahyia ha nyinaa, saa ɔbarima yi na Yudafo a wɔwɔ ha ne Yerusalemfo aka nsɛm atia no, de no abrɛ me sɛ mimmu no kumfɔ no, ²⁵ nanso mannya asɛm biara annyina so a mede bebu no kumfɔ. Esiane sɛ ɔno ankasa guan toaa ɔhempɔn Kaesare no nti, mayɛ m'adwene sɛ mede no bɛkɔ n'anim. ²⁶ Esiane sɛ minni asɛm pɔtee bi a mɛkyerɛw akɔma ɔhempɔn Kaesare nti, na mede no aba wo, ɔhene Agripa anim se sɛ wuwie wo nhwehwɛmuyɛ a manya biribi agyina so de akyerɛw ne ho asɛm. ²⁷ Minnye nni sɛ ntease wɔ mu sɛ mede odeduani bɛkɔ n'anim a menkyerɛw biribi pɔtee bi a etia no!”

¹ Ɖhene Agripa ka kyerɛɛ Paulo se, “Afei mema wo ho kwan sɛ wuyi wo ho ano.”

Paulo maa ne nsa so kasae se, ² “Ɖhene Agripa! Ɖyɛ me anigye sɛ nnɛ manya mu kwan gyina w’anim ha reyi me ho ano wɔ asɛm a Yudafo aka atia me no ho. ³ Nea ɛma meka saa ne sɛ, wunim Yudafo mmara ne wɔn amanne nyinaa fekoɔ. Enti mesrɛ wo, tɔ wo bo ase tie me.

⁴ “Yudafo no nim m’asetena mu nsɛm nyinaa fi me mmofraase. Wonim m’asetena mu nsɛm wɔ me kurom ne Yerusalem nso. ⁵ Sɛ wɔbɛka nokware a, wonim sɛ meye Farisini a midi Yudafo mmara ne wɔn som so pɛpɛpɛ. ⁶ Na afei esiane bɔ a Onyankopɔn hyɛɛ yɛn nenanom no nti na migyina ha nnɛ na wɔrebu me atɛn yi. ⁷ Saa bɔhyɛ yi na yɛn mmusuakuw dumien hwɛ kwan sɛ ɛbɛba mu no nti na wɔsom Onyankopɔn awia ne anadwo no. Ɖhene, saa anidaso yi nti na Yudafo asɔre atia me yi. ⁸ Adɛn nti na mo Yudafo nnye nni sɛ Onyankopɔn nyan awufo?

⁹ “Mmere bi a atwam no, na m’adwene nyinaa ne sɛ mɛyɛ biribiara a metumi de atia Yesu a ofi Nasaret no din. ¹⁰ Saa ara na meyɛɛ wɔ Yerusalem. Migyee tumi nhoma fii asɔfo mpanyin nkyɛn gyinaa so kyekyeree Onyankopɔn akyidifo guu afiase; na sɛ wobu wɔn kumfo a, midi mu akoten. ¹¹ Mema wɔtwee wɔn aso mmere pii wɔ hyiadan mu sɛnea ɛbɛyɛ a wɔbɛpa wɔn gyidi. M’ani beree wɔn so yiye ma metaa wɔn koduu aman afoforo so.”

Paulo Ka N’adwensakra Ho Asɛm

¹² “Saa ɔtaa yi nti na mikogyee tumi nhoma fii asɔfo mpanyin nkyɛn sɛ mede rekɔ Damasko no. ¹³ Daasebrɛ, da bi owigyinae a mereko Damasko no hann bi a ɛkyɛn owia hyɛn fii ɔsoro betwaa me ne wɔn a yɛnam no ho hyiae. ¹⁴ Yɛn nyinaa twitwa hwehwee fam na metee nne bi wɔ Arameike kasa mu se, ‘Saulo! Saulo! Adɛn nti na

wotaa me? Nea woyε yi nyinaa wode rehaw wo ho sεnea nantwi tu ne nan wɔ ɔkafo pema ano.’

¹⁵ “Mibisae se, ‘Eyε wo hena, Awurade?’

“Awurade buae se, ‘Eyε me Yesu a wotaa me no. ¹⁶ Sɔre gyina hɔ. Nnε mayi me ho adi akyerε wo; mεma woayε me somfo na woadi adanse wɔ nea woahu afa me ho yi ne nea mεkyerε wo nyinaa ho. ¹⁷ Megye wo afi Israelfo ne amanamanmufo a wɔresoma wo akɔ wɔn nkyεn no nsam. ¹⁸ Wubebue wɔn ani na woatwe wɔn afi sum mu aba hann mu, na woayi wɔn afi ɔbonsam tumi ase aba Onyankopɔn nkyεn. Na wɔnam wɔn gyidi a wɔwɔ wɔ me mu no so anya bɔnefakyε na wɔayε Onyankopɔn mma.’

¹⁹ “Eno nti ɔhene Agripa, meyεε osetie maa nne a efi ɔsoro no. ²⁰ Mifii ase kaa asempa no wɔ Damasko ne Yerusalem ne Yudeafo aman nyinaa so ne amanamanmufo mu sε, εsε sε wɔsakra wɔn adwene na wɔde wɔn ho ma Onyankopɔn na wɔmma wɔn nneyεe nkyerε sε wɔasakra. ²¹ Saa asεm yi ara nti na na mewɔ asɔredan mu resom a Yudafo no bεkyeree me sε wɔrekokum me no. ²² Nanso besi nnε yi Onyankopɔn abɔ me ho ban nti na migyina ha redi adanse akyerε obiara yi. Asεm koro a Mose ne adiyifo no kae se ²³ εsε sε Agyenkwa no hu amane na wadi awufo sɔre mu kan, na wɔaka hann ho asεm akyerε Yudafo ne amanamanmufo.”

Festo Bu Paulo ɔbɔdamfo

²⁴ Paulo gu so rekasa no, Festo twaa n’ano se, “Paulo, woabɔ dam! Wo nhomanim bebrebe no abɔ wo dam.”

²⁵ Nanso Paulo buae se, “Daasebrε, memmɔɔ dam ε. Nsεm a mereka no yε nokware a aba wɔ mu. ²⁶ ɔhene Agripa, esiane sε wunim saa nsεm yi nyinaa nti, metumi agyina w’anim de akokoduru akasa. Migye di sε biribiara a esii no wunim, efisε emu biara nni hɔ a eyε

kokoamsɛm. ²⁷ Ɖhene Agripa, wugye adiyifo no di ana? Minim sɛ wugye wɔn di.”

²⁸ Agripa bisaa Paulo se, “Wugye di sɛ wubetumi adan m’adwene ama mayɛ Kristoni saa bere tiaa yi mu ana?”

²⁹ Paulo buae se, “Sɛ nsɛm a mereka no ho hia anaa ɛho nhia no, me mpaebɔ ara ne sɛ, Onyankopɔn bɛma wo ne wɔn a wɔretie me nnɛ yi nyinaa asakra abɛyɛ sɛ me, gye nkɔnsɔnkɔnsɔn a egu me yi nko ara.”

³⁰ Afei Ɖhene no ne Amrado ne Berenike ne wɔn a wɔahyia hɔ no nyinaa sɔree. ³¹ Wɔrekɔ no wɔkeka kyerɛɛ wɔn ho wɔn ho se, “Saa onipa yi nyɛɛ biribiara a ɛsɛ sɛ wogyina so bu no kumfɔ anaasɛ wɔde no to afiasɛ.”

³² Ɖhene Agripa ka kyerɛɛ Festo se, “Sɛ onipa yi nguan ntoaa Kaesare a anka yebetumi agyaa no.”

27

Paulo Kɔ Roma

¹ Wosii gyinae wiee sɛ yɛnkɔ Italia no, wɔde Paulo ne nneduafo bi hyɛɛ Yulio a ɔyɛ Roma asraafo panyin no nsa. ² Yɛkɔtenaa hyɛn bi a ɛrekɔ Asia fam no mu wɔ Adramitio. Na Makedoniani Aristarko a ofi Tesalonika no ka yɛn ho.

³ Ade kyee no, yekoduu Sidon. Yulio yɛɛ Paulo adɔɛ ma ɔkɔsraa ne nnamfo ma wɔmaa no nneɛma a ɛho hia no.

⁴ Esiane sɛ yetuu wɔ hɔ no na mframa bɔ hyia yɛn no nti yɛka kɔɔ Kipro nifa fam. ⁵ Yɛnam po so kɔfaa Kilikia ne Pamfilia koduu Mira a ɛwɔ Likia mantam mu no mu. ⁶ ɛhɔ na asraafo panyin no huu hyɛn bi a efi Aleksandria rekɔ Italia. Enti ɔde yɛn kɔtenaa mu. ⁷ Hyɛn no kɔɔ brɛoo enti yedii nna wɔ po no so. Yɛbrɛɛ ansa na yɛredu Knido. Esiane sɛ na mframa bɔ hyia yɛn no nti, yɛfaa Salmoni hyɛngyinabea ka kɔɔ Kreta nifa fam. ⁸ Yɛka kɔɔ mpoano

nkakrankakra kosii sE yEdE ɔbrE beduu baabi a wɔfrE hɔ HyEn Agyinae a eBEn kurow Lasea.

⁹ Na yEasEe mmere pii, na saa bere no nso po no sofa yE hu efise na EyE Mpata Da akyi. Paulo tuu wɔn fo se, ¹⁰ “Anuanom, mi hu sE, sE yEtoa yEn akwantu yi so a, yebehu amane ama ebia hyEn no abɔ ama emu nneEma asEe ama nnipa ahwere wɔn nkwa.” ¹¹ Nanso asraafo panyin no antie fo a Paulo tuu wɔn no, na mmom otiee nsEm a hyEnkafo no ne hyEn no wura kae no. ¹² Esiane sE na hyEngyinabea hɔ nye mma sE wɔbEtena hɔ awɔwbere mu no nti nnipa no bebreE pEe sE, sE ebetumi a anka hyEn no betu afi hɔ akɔ Foinike. Foinike yE hyEngyinabea a Ewɔ Kreta a Eda atifi ne anafo ntam wɔ Atɔe fam. EyE baabi a wobetumi atena hɔ awɔwbere mu.

Po So Mframa A EyE Den No

¹³ Mframa a ano nyE den bɔ fii anafo fam no, nnipa no susuw sE wobetumi atoa wɔn akwantu no so sEnea wɔahyehyE no. Enti wotuu sEkyE no de hyEn no faa Kreta mpoano. ¹⁴ AnkyE koraa na mframa kEse bi a wɔfrE no “Apueitifi Mframa” bɔ fii supɔw no so. ¹⁵ Mframa no bɔ bunkam faa yEn hyEn no so twee no kɔɔ po no mu. YEbɔɔ mmɔden sE yEbEdan hyEn no ani na anyE yiye no, yegyae maa mframa no twee no kɔe. ¹⁶ Yeduu supɔw ketewa bi a wɔfrE no Klauda ho a na Ehɔ mframa ano nyE den mpo no, yEbREe ansa na yEretumi atwe hyEn no korow a EsEn akyi no aba mu. ¹⁷ HyEn no mu nnwumayEfo no maa so baa hyEn no mu bEkyekyeree no denneennen. Esiane sE na wosuro sE wɔbEkɔ akɔka nwea mu nti, woyiyii hyEn dua no so ntama maa mframa no bɔɔ hyEn no kɔɔ baabiara a epE. ¹⁸ Mframahweam no kɔɔ so bɔe; Eno nti ade kyee no woyiyii hyEn no mu nneEma no bi tow guu po no mu. ¹⁹ Ne nnansa so no, wɔsesaw hyEn no ho nneEma no bi tow gui. ²⁰ Nna bebreE twaa mu a na yenhu owia

anaa nsoromma a na mframahweam no gu so retu. Eyi maa yEn anidaso nyinaa sae.

Paulo Kyekye Wɔn Werɛ

²¹ Nna bebreɛ twaa mu a na obiara nnidi no, Paulo ka kyerɛɛ wɔn se, “Anuanom, sɛ mutieɛ me na yɛantu amfi Kreta a anka ɛnyɛ ɛne yɛn amanehunu yi. ²² Nanso momma mo bo ntɔ mo yam, efisɛ mo mu biara renwu na mmom, hyɛn no na ɛbɛbɔ. ²³ Nnɛra anadwo, Onyankopɔn a mesom no no bɔfo baa me nkyɛn ²⁴ bɛka kyerɛɛ me se, ‘Paulo, nsuro! Nea ɛbɛyɛ biara wubedu Kaesare anim ama wɔadi w’asɛm. Wɔn a wɔka wo ho yi nso, Onyankopɔn adom nti, biribiara renyɛ wɔn.’ ²⁵ Anuanom, momma mo bo ntɔ mo yam, efisɛ migye Onyankopɔn di na asɛm a waka akyerɛ me no bɛba mu pɛpɛɛpɛ. ²⁶ Nanso nea ɛbɛyɛ biara no hyɛn no bɛbɔ wɔ supɔw bi mpoano.”

Hyɛn No Bɔ

²⁷ Ne nnaawɔtwe abien anadwo no a na mframahweam no nti hyɛn no redi akɔneaba wɔ Adria po so no, ɔdasu mu na hyɛn no mu adwumayɛfo huu sɛ yɛrebɛn asase. ²⁸ Wɔtoo susuhama huu sɛ asu no mu tenten yɛ anammɔn ɔha ne aduonu. ɛyɛɛ kakra a wosusuw bio no, wohuu sɛ ɛyɛ anammɔn aduɔkron. ²⁹ Esiane sɛ na wosuro sɛ anyɛ a hyɛn no bɛpɛm ɔbotan bi nti wɔtoo sɛkyɛ anan wɔ hyɛn no akyi twɛn kosii adekyee. ³⁰ Hyɛn no mu nnwumayɛfo pɛɛ sɛ woguan. Enti wogyaw hyɛn no korow no sii po no ani boapa yɛɛ sɛnea wɔrɛkɔto sɛkyɛ wɔ hyɛn no anim. ³¹ Paulo ka kyerɛɛ asraafo panyin no ne asraafo a wɔka ne ho no se, “Sɛ hyɛn yi mu nnwumayɛfo no guan a, mubewuwu.” ³² Eyi nti asraafo no twaa hama a ɛkyekye hyɛn no korow no mu no ma ɛkɔɛ.

³³ Ade reyε akye no, Paulo srEE wɔn nyinaa se wonnidi. Nea ɔkae ne sE, “Nnaawɔtwe abien ni, mo mu biara mfaa aduan nkaa n’ano. ³⁴ MesrE mo, obiara nnidi sEnea εbEyE a, mubenya ahoɔden. Biribiara renyE obiara.” ³⁵ Paulo kasa wiei no, ɔfaa brodo bɔɔ mpae daa Onyankopɔn ase wɔ wɔn nyinaa anim na obuu bi dii. ³⁶ Amono mu hɔ ara wɔn nyinaa bo tɔɔ wɔn yam ma wofii ase didii. ³⁷ Nnipa a na yEwɔ hyEn no mu no dodow yE ahannu ne aduɔson asia. ³⁸ Obiara didi mee no, hyEn no mu nnwumayEfo no tow aburow a Ewɔ hyEn no mu no guu po no mu maa hyEn no mu yEE hare.

³⁹ Ade kyee no, hyEn no mu nnwumayEfo no anhu sE wɔadu mpoano. Wohuu faako a po no adidi akɔ asase no mu a nsu taa hɔ. Enti wɔyEE wɔn adwene sE wɔbEka hyEn no akɔ hɔ ama akɔka. ⁴⁰ Eno nti wotwitwaa hyEn no sEkyE ahama no mu maa sEkyE no guu po mu. Afei wɔsansan hama a ekura akwankyerEde no mu na afei wosii ntama a Ewɔ hyEn no anim no sEnea εbEyE a mframa betumi abɔ hyEn no akɔ mpoano. ⁴¹ Nanso EhyEn no kɔpem nweatam bi ma Ekae. HyEn no anim kaa denneennen na asorɔkye a na Erebɔ no maa akyi no nso bubui.

⁴² Asraafo no yEE wɔn adwene sE wobekunkum nnedu-afɔ no* nyinaa sEnea εbEyE a, obiara rennya kwan nguan. ⁴³ Nanso esiane sE na asraafo panyin no pE sE ogye Paulo nkwa no nti wamma wɔn ho kwan. Mmom, ɔhyEE sE wɔn a wobetumi aguare no mfi ase nguare nkɔ mpoano. ⁴⁴ Wɔn a wɔaka no nso ntetare mmerEte ne nnua asinasin a abubu fi hyEn no mu no so nkɔ mpoano. Saa ɔkwan yi so na yEnam beduu mpoano nohɔ dwoodwoo.

* ^{27:42} sE odeduani bi guan a, wɔde ne sohwEfo no nkwa si n’anan mu. Enti na asraafo no nnyaagyaa wɔn ho na amma odeduani bi anguan.

28

Yedu Malta

¹ Yeduu mpoano hɔ no, ankyɛ na yehuu sɛ yɛwɔ supɔw Malta so. ² Supɔw no sofo no gyee yɛn fɛw so. Esiane sɛ na osu atɔ ama awɔw aba nti, wɔsɔɔ ogya ma yɛtoe. ³ Paulo bubuu mmabaa sɛ ɔde regu ogya no mu. ɔde regu mu no, ɔwɔ bi a ogya no hyew aka no no bebaree ne nsa ho. ⁴ Supɔw no sofo no huu ɔwɔ no sɛ ɔbebare ne nsa ho no, wɔkae se, “Saa onipa yi yɛ owudifo a wanya ne ti adidi mu wɔ po akwanhyia mu, nanso esiane ne bɔne nti owu ara na etwa sɛ owu.” ⁵ Paulo petee ɔwɔ no too ogya no mu a hwee anyɛ no. ⁶ Na nkurɔfo no nyinaa susuw sɛ Paulo bɛhonhon anaasɛ obetwa ahwe awu. Nanso wɔtwɛn ara a biribiara anyɛ no no, wɔsakraa wɔn adwene kae se, “ɔyɛ onyame bi.”

⁷ Na ɔpanyin a ɔhwɛ supɔw no so a wɔfrɛ no Publio no fi bɛn mpoano hɔ; ogyee yɛn fɛw so som yɛn hɔho nnansa. ⁸ Saa bere no ara na Publio agya yare atiridii ne konkoruwa a aka no ato hɔ. Paulo kɔɔ ɔdan a na ɔda mu no mu de ne nsa guu no so, bɔɔ mpae maa ne ho yɛɛ no den. ⁹ Nea Paulo yɛɛ no maa ayarefo a wɔwɔ supɔw no so no nyinaa baa ne nkyɛn ma ɔsaa wɔn yare. ¹⁰ Wɔmaa yɛn akyɛde bebre. Yɛrebefi hɔ akɔ no nso wɔde biribiara a ɛho hia yɛn no beguu hyɛn no mu maa yɛn.

Yefi Malta Kodu Roma

¹¹ Yedii asram abiɛsa wɔ supɔw no so ansa na yenyaa hyɛn bi a efi Aleksandria a ne nsɛnkyerɛnne yɛ eti abien a egyina hɔ ma anyame baanu bi. Na saa hyɛn no abedi awɔwbere no wɔ supɔw no so. ¹² Yeduu Sidarakusa no, yedii nnansa wɔ hɔ. ¹³ Yefi hɔ toaa so koduu Regio. Ade kyee no, mframa bi bɔ fii anafo fam ma nnaanu akyi no yekoduu Puteoli. ¹⁴ ɛha na yehyiaa agyidifo bi a wɔsrɛɛ

yɛn se yɛntena wɔn nkyɛn nnaawɔtwe. Ɛno akyi no, yɛtoaa so koduu Roma. ¹⁵ Anuanom a wɔwɔ Roma no tee yɛn nka sɛ yɛreba no, ebinom behyiaa yɛn kwan wɔ aguabɔbea a ɛwɔ Apia kwan no so na afoforo nso hyiaa yɛn wɔ ahɔhobeaa bi a wɔfrɛ no Ahɔhodan Abiɛsa no. Bere a Paulo huu wɔn no, ne ho san no na ɔdaa Onyankopɔn ase. ¹⁶ Yeduu Roma no, wɔmaa Paulo ho kwan sɛ ɔnkɔtena baabiara a ɔpɛ na ɔsraani bi nwen no.

¹⁷ Nnansa akyi no, Paulo frɛɛ Yudafo mpanyin ne wɔn hyiaa. Ɔka kyerɛɛ wɔn se, “Anuanom, ɛwɔ mu sɛ manyɛ bɔne biara antia yɛn man ne yɛn amanne a yɛn agyanom de gyaw sɛ yɛn no de, nanso wɔkyeree me sɛ odeduani wɔ Yerusalem de me hyɛɛ Romafo nsa. ¹⁸ Wobisaa me nsɛm pɛɛ sɛ wogyaa me, efisɛ wɔannya afɔbude bi wɔ me ho a ɛno nti ɛsɛ sɛ wogyina so kum me. ¹⁹ Nanso bere a Yudafo kasatia gyae a wɔpɛ sɛ wogyaa me no, mihuu sɛ ɛsɛ sɛ miguan toa Kaesare. Ɛnyɛ me nkurɔfo ho adwemmɔne a mewɔ nti na meyɛɛ saa. ²⁰ Eyi nti na mepɛɛ sɛ mihi mo na me ne mo kasa no; na onipa a Israelfo ani da no so no nti na nkɔnsɔnkɔnsɔn gu me yi.”

²¹ Wobuaa Paulo se, “Yennyaa nhoma biara a efi Yudea a ɛfa wo ho na yɛntee wo ho asɛmmɔne biara nso mfii anuanom a wofi hɔ ba ha no nso nkyɛn. ²² Nanso yɛpɛ sɛ yehu w’adwene, efisɛ yenim sɛ nnipa kasa tia Kristofo a wo nso woka wɔn ho no wɔ baabiara.”

Paulo Asɛnka Wɔ Roma

²³ Wɔhyɛɛ da bi sɛ wobehyia Paulo. Saa da no dui no, nnipa bebree kɔɔ ne nkyɛn wɔ faako a ɔte hɔ no. Ɔkaa Onyankopɔn ahenni no ho asɛm kyerɛɛ wɔn. Ɔnam Mose mmara ne nsɛm a adiyifo no kae no so kaa Yesu ho asɛm fi anɔpa kosii anadwo kyerɛɛ wɔn pɛɛ sɛ ɔdan wɔn adwene. ²⁴ Nnipa no bi gyee Paulo asɛm a ɔkae no dii na bi nso annye anni. ²⁵ Bere a wɔregyigye wɔn ho wɔn ho

akyinnye no, wofii hɔ kɔe. Na aɛm a etwa to a Paulo kae ne sɛ, “Nokwasɛm na Honhom Kronkron nam Odiyifo Yesaia so ka kyerɛɛ mo agyanom se,

²⁶ “Monkɔka aɛm yi nkyerɛ Yudafo se,

‘Ɔte de mobɛte, nanso morente ase.

Ɔhwɛ de mobɛhwɛ, nanso morenɛhu,’

²⁷ efisɛ nnipa yi apirim wɔn koma;

moasisiw mo aso, akatakata mo ani.

ɛnyɛ saa a, anka mo ani behu ade,

na mo koma ate aɛm ase,

na moanu mo ho asan aba me nkyɛn, na masa mo yare.”

²⁸ Paulo kae se, “Ɛsɛ sɛ muhu sɛ Onyankopɔn nkɔwagye no adu amanamanmufo no nkyɛn. Wobetie!” ²⁹ Paulo kaa saa aɛm yi wiei no, Yudafo no fii hɔ kɔe a na wɔregyigye wɔn ho wɔn ho akyinnye denneennen.

³⁰ Paulo tenaa hɔ mfe abien, a na ɔte ofi a ɔno ankasa tua ho ka mu, na nnipa bebree kɔɔ ne nkyɛn. ³¹ Na ɔde akokoduru kaa Onyankopɔn Ahenni no ne Awurade Yesu Kristo ho aɛm.

Biblica® Wonhia ɛho kwamma nhoma Akuapem Twi
Nkwa Asɛm™
Twi: Biblica® Wonhia ɛho kwamma nhoma Akuapem Twi
Nkwa Asɛm™ (Bible)

copyright © 2020 Biblica, Inc.

Language: Akuapem Twi (Twi)

Dialect: Twi

Translation by: Biblica, Inc.

This work is made available under the Creative Commons Attribution-ShareAlike 4.0 International License (CC BY-SA). To view a copy of this license, visit <http://creativecommons.org/licenses/by-sa/4.0> or send a letter to Creative Commons, PO Box 1866, Mountain View, CA 94042, USA.

Biblica® is a trademark registered by Biblica, Inc., and use of the Biblica® trademark requires the written permission of Biblica, Inc. Under the terms of the CC BY-SA license, you may copy and redistribute this unmodified work as long as you keep the Biblica® trademark intact. If you modify a copy or translate this work, thereby creating a derivative work, you must remove the Biblica® trademark. On the derivative work, you must indicate what changes you have made and attribute the work as follows: “The original work by Biblica, Inc. is available for free at www.biblica.com and open.bible.”

Notice of copyright must appear on the title or copyright page of the work as follows:

Biblica® Open Akuapem Twi Contemporary Bible™

Copyright © 1996, 2020 by Biblica, Inc.

“Biblica” is a trademark registered in the United States Patent and Trademark Office by Biblica, Inc. Used with permission.

You must also make your derivative work available under the same license (CC BY-SA).

If you would like to notify Biblica, Inc. regarding your translation of this work, please contact us at <https://open.bible/contact-us>.

Biblica® is a trademark registered in the United States Patent and Trademark Office by Biblica, Inc. and may not be included on any derivative works. Unaltered content from open.bible must include the Biblica® trademark when distributed to others. If you alter the content in any way, you must remove the Biblica® trademark before

distributing your work.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2021-04-09

PDF generated using Haiola and XeLaTeX on 29 Jan 2022 from source files dated 14 Jan 2022

db9c1a75-e6f7-5999-979b-02f8eb612f40